

MESYUARAT PERTAMA, PENGGAL KEEMPAT
PARLIMEN KEEMPAT BELAS
2021

HARI ISNIN : 11 OKTOBER 2021

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 2, 11 HINGGA NO. 72)

**[SOALAN NO 2 DIJAWAB BERSEKALI DENGAN
SOALAN NO 8]**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. TUAN LIM LIP ENG [KEPONG]
TARIKH : 11 OKTOBER 2021 (ISNIN)

SOALAN

TUAN LIM LIP ENG [KEPONG] minta **MENTERI KEWANGAN** menyatakan proses pemberian kontrak 5G yang bernilai RM11 bilion kepada Syarikat Ericsson, memandangkan mengikut anggaran yang disediakan oleh Pasukan Petugas Khas 5G Kebangsaan, anggaran perbelanjaan untuk penyediaan sistem 5G ini hanya RM 7.5 bilion. Apa tindakan Suruhanjaya Pencegahan Rasuah Malaysia dilakukan tentang pemberian kontrak ini.

JAWAPAN

Tuan Yang di-Pertua,

Kerajaan tidak terlibat dalam proses pemberian kontrak 5G bernilai RM11 bilion. Sebagai sebuah entiti undang-undang yang berasingan, proses tender rangkaian 5G telah dilaksanakan di peringkat syarikat oleh Digital Nasional Berhad (DNB). DNB telah melaksanakan amalan tadbir urus perolehan terbaik dan menjamin ketelusan dalam penilaian, cadangan serta proses keseluruhan tender.

Proses Tender 5G telah bermula pada April tahun ini dengan **empat belas (14) buah syarikat pembekal perkakasan rangkaian (“Network Equipment Provider” atau NEP) global telah dikenalpasti** melalui tinjauan pasaran.

Daripada senarai tersebut, **lapan (8) buah NEP telah dijemput untuk mengemukakan Pelawaan Tunjuk Minat** (*“Expression of Interest”* atau EOI) berdasarkan dua (2) kriteria, iaitu:

1. Pengalaman melaksanakan rangkaian 5G yang telah terbukti; dan
2. *Local presence* dengan izin atau mempunyai operasi di Malaysia.

Daripada lapan (8) buah NEP yang dijemput untuk mengambil bahagian dalam Pelawaan Tawaran (*“Request for Proposal”* atau RFP), **hanya empat (4) buah NEP yang telah mengemukakan tawaran.**

Proses penilaian tender telah dilaksanakan pada Mei dan Jun 2021 berdasarkan nasihat daripada firma perunding antarabangsa Ernst & Young Consulting Sdn Bhd melibatkan lebih daripada 50 para profesional industri dan pakar bebas daripada lebih 10 buah negara.

Tuan Yang di-Pertua,

Tiga kriteria iaitu teknikal dan keupayaan (55%), komersial (30%) dan sosio-ekonomi (15%) telah ditetapkan untuk menentukan pembida yang berjaya. Ericsson telah mendapat penilaian tertinggi bagi ketiga-tiga kriteria tersebut.

Dari segi **teknikal**, Ericsson telah mencadangkan rangkaian yang kalis masa depan (*“future-proof”*) dan mampan, dengan fungsi-fungsi siber keselamatan yang jitu untuk memenuhi objektif DNB mencapai liputan 80% kawasan berpenduduk pada tahun 2024.

Dari segi **kos**, Ericsson telah menawarkan harga paling kompetitif manakala dari segi **sosio-ekonomi**, Ericsson telah memberi komitmen kepada program pembangunan sosio-ekonomi paling berimpak, termasuk penggunaan vendor tempatan dan Bumiputera.

Perancangan, pembinaan dan penyelenggaraan rangkaian 5G nasional dengan penglibatan Ericsson sebagai NEP dianggarkan **melibatkan kos sebanyak RM11 bilion**. Jumlah ini adalah kira-kira **RM700 juta lebih rendah berbanding jumlah kos pembida terhampir selepas Ericsson**. Walau bagaimanapun, **harga perbandingan kesemua**

pembida tidak boleh dinyatakan secara terus atas obligasi kerahsiaan yang telah ditetapkan dalam tender yang telah dijalankan.

Daripada RM11 bilion kos rangkaian 5G, sebanyak **RM4 bilion** melibatkan kos perkakasan rangkaian, perkhidmatan pelaksanaan, serta penyelenggaraan berterusan dan pengurusan rangkaian oleh Ericsson yang merupakan kos terendah dalam kalangan pembida. Sementara itu, baki sebanyak kira-kira **RM7 bilion** pula adalah berkaitan dengan kos infrastruktur rangkaian daripada pihak-pihak yang lain seperti kos menara telekomunikasi, gentian telekomunikasi, kuasa elektrik serta lain-lain kos bagi tempoh sepanjang 10 tahun.

Tuan Yang di-Pertua,

YB Kepong telah merujuk kepada Laporan Pasukan Petugas Khas 5G Kebangsaan. Namun laporan tersebut telah menganggarkan kos tambahan (*incremental*) naiktaraf bagi satu rangkaian adalah kira-kira RM7.5 bilion. **Kos tersebut hanya untuk sebuah rangkaian liputan dan tidak mengambil kira apa-apa pelaburan dalam kapasiti yang diperlukan.** Laporan Pasukan Petugas tersebut turut menyatakan bahawa **kos yang dinyatakan merupakan anggaran indikatif dan bukan anggaran yang pasti tertakluk kepada beberapa andaian subjektif seperti rundingan dengan vendor.** Berdasarkan anggaran yang dinyatakan juga, **pelaksanaan rangkaian 5G secara kolektif oleh kesemua operator rangkaian mudah alih sedia ada berkemungkinan melibatkan kos melebihi RM30 bilion** bagi negara secara keseluruhannya, berbanding hanya RM11 bilion bagi DNB. Malah, **jumlah kos pemilikan (*total cost of ownership*) sebanyak RM11 bilion bagi 10 tahun akan datang juga jauh lebih rendah daripada anggaran awal kos rangkaian 5G yang dianggarkan sebanyak RM15 bilion.**

Tuan Yang di-Pertua,

Dalam hal yang berkaitan, Kementerian Kewangan berpandangan bahawa **Suruhanjaya Pencegahan Rasuah Malaysia (SPRM) bebas untuk menjalankan siasatan sekiranya mempunyai bukti terdapat**

unsur salah laku dalam proses tender 5G yang dijalankan. Walau bagaimanapun, **Kementerian Kewangan tidak bersetuju sekiranya SPRM diminta menjalankan siasatan hanya berdasarkan prejudis.**

Akhir sekali, untuk makluman ahli Yang Berhormat juga, **pihak DNB atas dasar ketelusan turut telah mengadakan sesi taklimat awal kepada beberapa orang Ahli Parlimen mengenai pelaksanaan 5G yang telah diadakan pada 23 Julai 2021** yang lalu. Sesi tersebut telah dihadiri oleh seramai sebelas (11) orang Ahli Parlimen seperti berikut:

- i. YB Dato' Seri Ahmad Faizal Bin Azumu (Tambun)
- ii. YB Tuan Ahmad Fahmi Bin Mohamed Fadzil (Lembah Pantai)
- iii. YB Tuan Haji Yamani Hafez Bin Musa (Sipitang)
- iv. YB Puan Nurul Izzah Binti Anwar (Permatang Pauh)
- v. YB Datuk Mohamad Bin Alamin (Kimanis)
- vi. YB Tuan Syed Ibrahim Bin Syed Noh (Ledang)
- vii. YB Tuan Ahmad Tarmizi Bin Sulaiman (Sik)
- viii. YB Dr. Ong Kian Ming (Bangi)
- ix. YB Tuan Lukanisman Bin Awang Sauni (Sibuti)
- x. YB Puan Wong Shu Qi (Kluang)
- xi. YB Puan Alice Lau Kiong Yieng (Lanang)

Dokumen taklimat dan minit mesyuarat bagi sesi tersebut juga telah disampaikan kepada Ahli-Ahli Yang Berhormat berkenaan serta kepada YB Tuan Syed Saddiq Bin Syed Abdul Rahman (Muar) yang tidak dapat hadir ke sesi tersebut untuk perhatian dan rujukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 11 OKTOBER 2021 (ISNIN)

SOALAN

TUAN YUSUF BIN ABD. WAHAB minta **MENTERI KANAN PENDIDIKAN** menyatakan berapa jumlah sekolah daif dan peruntukan disediakan untuk memperbaiki sekolah-sekolah daif di Parlimen Tanjong Manis. Apakah status pembinaan beberapa buah sekolah daif yang telah diluluskan sebelum ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada usaha menyediakan fasiliti bangunan dan kemudahan sekolah yang dapat berfungsi dengan baik untuk semua sekolah di seluruh negara. Ini adalah penting untuk memastikan pengajaran dan pembelajaran dilaksanakan dalam keadaan selamat serta selesa di sekolah.

Untuk makluman Ahli Yang Berhormat, jumlah bangunan di sekolah yang mengalami kerosakan dan kemerosotan dari segi kondisi fizikal bangunan berubah dari semasa ke semasa dan bersifat dinamik.

Sepanjang tempoh Rancangan Malaysia Ke-11 (RMKe-11) iaitu bagi tahun 2016 sehingga tahun 2020 dan Rancangan Malaysia Ke-12 *Rolling Plan 1* (RP1) tahun 2021, sebanyak 14 projek naik taraf dan pembangunan semula sekolah yang mempunyai bangunan daif dengan kos berjumlah RM69.44 juta telah diluluskan bagi Parlimen Tanjung Manis. Sehingga 30 September 2021, 5 projek telah siap, 2 projek berada dalam fasa pembinaan dan 7 projek lagi berada dalam fasa pra bina.

Berdasarkan rekod KPM, masih terdapat 13 buah sekolah yang mempunyai bangunan daif di Parlimen Tanjung Manis. 3 daripada 13 buah sekolah ini mempunyai bangunan dalam skala 7, iaitu disahkan tidak selamat digunakan oleh Jabatan Kerja Raya (JKR). Manakala 10 buah sekolah lagi mempunyai bangunan daif dalam skala 6, iaitu disahkan tidak selamat oleh pihak teknikal PPD atau JPN.

Untuk makluman Ahli Yang Berhormat, mengambil kira kondisi fizikal bangunan berubah dari semasa ke semasa dan bersifat dinamik, terdapat sekolah yang telah diluluskan untuk naik taraf dan penggantian bangunan daif sebelum ini masih lagi tersenarai sebagai sekolah yang mempunyai bangunan daif. Ini kerana, terdapat bangunan lain di sekolah tersebut telah berubah kepada skala 6 dan 7. Senarai sekolah berkenaan adalah seperti yang berikut:

- i. SK St Andrew;
- ii. SK Sg. Selidap;
- iii. SK Bukit Kinyau;
- iv. SK Muara Payang;
- v. SK Adin; dan
- vi. SK Abang Haji Matahir.

Manakala 7 sekolah yang mempunyai bangunan daif yang belum pernah diluluskan naik taraf dan pembangunan semula adalah seperti berikut:

- i. SK Jawa;
- ii. SK Mandur Aris;
- iii. SK Mupong Ulin;
- iv. SK Sarikei;
- v. SK Sg. Sentebu;
- vi. SK Sg. Sian; dan
- vii. SK Tanjung Bundung.

Kesemua 13 buah sekolah yang mempunyai bangunan daif ini akan dimohon dalam RMKe-12 untuk dinaik taraf dan dibangunkan semula. Kelulusan permohonan ini tertakluk kepada kedudukan kewangan semasa kerajaan.

KPM sentiasa komited untuk memastikan sekolah dalam keadaan baik dan selamat digunakan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 11 OKTOBER 2021 (ISNIN)

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI PERTANIAN DAN INDUSTRI MAKANAN** menyatakan apakah status program SMART SBB :-

- (a) nama dan apakah latar belakang 11 syarikat peneraju; dan
- (b) jumlah pesawah yang terlibat dan adakah pesawah akan dipaksa untuk menandatangani perjanjian ladang kontrak ini

JAWAPAN

Tuan Yang Di Pertua,

Untuk makluman Ahli Yang Berhormat, program SMART Sawah Berskala Besar (SMART SBB) merupakan hala tuju baharu industri padi dan beras negara yang digariskan Kementerian Pertanian dan Industri Makanan (MAFI) bagi meningkatkan produktiviti serta mewujudkan pengurusan sawah secara cekap dan sistematik menerusi pelaksanaan secara koperasi, persatuan atau berkelompok untuk penggunaan sumber secara optimum.

Tumpuan MAFI dalam tempoh Rancangan Malaysia Kedua Belas (RMKe-12) adalah untuk melaksanakan penanaman padi menggunakan konsep SMART SBB bagi meningkatkan kadar Tahap Sara Diri (SSL) beras negara kepada 75% menjelang tahun 2025 sekaligus memastikan jaminan sekuriti makanan negara sepanjang masa.

SOALAN NO : 14

Pelaksanaan program SBB ini akan mengurangkan peranan orang tengah, penjimatan kos penanaman kepada pesawah, meningkatkan pendapatan pesawah, menjadikan industri padi dan beras negara lebih kompetitif dan berdaya saing di sepanjang rantai nilai melalui pelaburan swasta sekaligus akan mampu mengurangkan keperluan input pertanian bersubsidi secara berperingkat.

Dalam hal ini, program SMART SBB ini juga dapat mengurangkan beban kewangan Kerajaan dalam pengurusan tanah-tanah sawah melalui kerjasama dengan peneraju projek (syarikat berkaitan Kerajaan atau swasta) di mana segala kos yang terlibat akan ditanggung oleh pihak peneraju secara berperingkat di samping turut menggunakan pelbagai kaedah teknologi moden dan terkini.

Setakat ini, terdapat sebelas (11) syarikat peneraju yang telah menandatangani Memorandum Persefahaman (MoU) dengan MAFI seperti berikut:

Bil	Syarikat Peneraju	Pemilik Kilang Beras
1	Hugeturn Sdn Bhd	Kilang Beras JATI
2	Sinaran Murni Sdn Bhd	Kelang Beras OEL
3	Eco Agro Pentagon Sdn Bhd	Kilang Beras Jasmine
4	CC Jaya Innovation Sdn Bhd	Kilang Beras Cap Sireh
5	Hartamas Sentosa Sdn Bhd	Kilang Beras Sunflower
6	Jelapang Padi Emas Sdn Bhd	Kilang Beras Cap 88
7	Kilang Beras Rajang Sdn Bhd	Kilang Beras Seri Merbok Sdn Bhd
8	Kilang Beras Rakyat Sekinchan Sdn Bhd	Kilang Beras Cap Asas
9	Padiberas Nasional Berhad (BERNAS)	Kilang BERNAS
10	Persatuan Pengilang Beras Melayu Malaysia (PPBMM)	Skim Pengilang Bumiputera
11	FGV Integrated Farming Holdings	Kilang Beras SAJI

MAFI juga dalam proses rundingan dengan beberapa buah syarikat peneraju lain yang juga telah menyatakan hasrat untuk turut terlibat dalam program ini.

Untuk makluman Ahli Yang Berhormat jua, buat masa kini, pelaksanaan Program SMART SBB ini masih dalam peringkat awal memandangkan ianya disasarkan dilaksanakan sehingga tahun 2030. Syarikat peneraju yang terlibat akan mengadakan sesi libat urus bersama agensi yang berkaitan kepada pesawah-pesawah yang berminat untuk menyertai program SMART SBB ini. Penyertaan pesawah dalam program ini adalah secara sukarela tanpa sebarang paksaan untuk menyertai program ini dan kontrak akan dibuat antara pihak yang terlibat bagi menjamin kepentingan bersama.

Sebagai permulaan, MAFI telah melaksanakan program SMART SBB ini di beberapa tempat sebagai perintis program di Kawasan Pembangunan Pertanian Bersepadu (IADA) Barat Laut Selangor dan IADA Seberang Perak di bawah seliaan Syarikat Peneraju iaitu FGV Integrated Farming Holdings Sdn. Bhd. Seramai 200 orang pesawah dengan kawasan seluas 173 hektar di IADA Barat Laut Selangor dan 140 hektar di IADA Seberang Perak terlibat di bawah program tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. XAVIER JAYAKUMAR A/L
ARULANANDRAM [KUALA LANGAT]**

TARIKH : 11 OKTOBER 2021 (ISNIN)

SOALAN

DATO' DR. XAVIER JAYAKUMAR A/L ARULANANDRAM [KUALA LANGAT] minta **MENTERI TENAGA DAN SUMBER ASLI** menyatakan apakah usaha pihak Kementerian dalam membantu pengusaha-pengusaha zoo di Semenanjung Malaysia yang terjejas teruk dari segi ekonomi hingga menyebabkan kebajikan hidupan liar di zoo-zoo juga terjejas akibat Perintah Kawalan Pergerakan yang telah dilaksanakan pada tahun 2020 dan 2021.

JAWAPAN

Tuan Yang di-Pertua,

1. Pandemik COVID-19 serta pelaksanaan Perintah Kawalan Pergerakan (PKP) pada tahun 2020 dan 2021 telah memberi kesan yang besar kepada Zoo dan Pameran Tetap (ZPT). Selain pengurangan atau ketiadaan sumber pendapatan daripada kutipan tiket masuk, ZPT juga terpaksa menanggung kos operasi yang tinggi termasuk penyediaan bekalan makanan, ubat-ubatan dan pengurusan husbandri.

2. Kementerian Tenaga dan Sumber Asli (KeTSA) melalui Jabatan Perlindungan Hidupan Liar dan Taman Negara (PERHILITAN) Semenanjung Malaysia sentiasa prihatin dan telah mengambil inisiatif dalam membantu ZPT sejak Mac 2020. Sebagai langkah segera

membantu ZPT, **inisiatif jangka pendek** yang dilaksanakan adalah seperti berikut:

- a) penyaluran Dana Prihatin Kebajikan Hidupan Liar bermula Mei 2020 hingga Ogos 2021 dengan peruntukan sebanyak RM7.3 juta kepada premis ZPT yang terjejas. Dana ini bertujuan membantu meringankan bebanan kos operasi ZPT dengan menampung keperluan bekalan makanan hidupan liar, pengurusan husbandri dan ubat-ubatan. Dana ini telah disalurkan secara berperingkat kepada 22 ZPT;
- b) pemberian diskaun 15% bil elektrik selama enam (6) bulan kepada semua ZPT di Semenanjung Malaysia di bawah Pakej Rangsangan Ekonomi (PRE 1.0); dan
- c) pengagihan lebih 205.9 tan barang sitaan makanan mentah iaitu daging dan tulang sejuk beku bernilai RM4.1 juta kepada ZPT melalui kolaborasi bersama Jabatan Perkhidmatan Kuarantin dan Pemeriksaan Malaysia (MAQIS).
- d) penyediaan bantuan teknikal dalam pengurusan husbandri seperti khidmat nasihat dan bantuan kepakaran kakitangan serta pegawai veterinar Jabatan PERHILITAN dalam aktiviti pemindahan hidupan liar dan pemantauan tahap kesihatan.

3. **Inisiatif jangka panjang** pula melibatkan pembangunan Model Baharu ZPT dan mengkaji semula peraturan-peraturan berkaitan pengendalian ZPT di bawah Akta Pemuliharaan Hidupan Liar 2020 [*Akta 716*] melalui sesi konsultasi dengan Malaysian Association of Zoological Park and Aquaria (MAZPA) serta ZPT. Ia bertujuan untuk mengurangkan kebergantungan ZPT kepada Kerajaan serta mengukuhkan operasi ZPT supaya lebih berdaya maju dan pada masa yang sama memastikan kebajikan hidupan liar sentiasa terpelihara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : YB DATUK ROZMAN BIN ISLI [LABUAN]

TARIKH : 11 OKTOBER 2021 (ISNIN)

SOALAN

DATUK ROZMAN BIN ISLI [LABUAN] minta **MENTERI PELANCONGAN, SENI DAN BUDAYA** menyatakan faktor yang diambil oleh Kementerian dalam menentukan destinasi rintis program *COVID-19 Free Destination* dan adakah Kementerian bercadang untuk menjadikan Labuan sebagai destinasi rintis memandangkan penduduk Labuan telah mencapai imuniti kelompok dan kadar vaksinasi golongan dewasa akan mencapai 100% dalam masa terdekat.

JAWAPAN

Tuan Yang di-Pertua,

1. Inisiatif Gelembung Pelancongan Domestik yang diperkenalkan oleh Kementerian Pelancongan, Seni dan Budaya (MOTAC) melalui Pelan Pemulihan Pelancongan telah mengambil kira banyak faktor dan implikasi terhadap ekonomi, kesejahteraan rakyat dan sensitiviti masyarakat.
2. Keputusan kerajaan untuk memilih Langkawi sebagai destinasi rintis untuk Gelembung Pelancongan bermula 16 September 2021 adalah setelah melalui pertimbangan dan penilaian yang sewajarnya serta unik berdasarkan data khusus di Langkawi. Beberapa siri libat urus membabitkan pelbagai pihak termasuklah penggiat industri dan turut membabitkan pakar-

pakar yang arif dari sudut kawalan risiko, telah diadakan bagi mendapatkan formula terbaik untuk menjayakan inisiatif ini.

3. Penilaian ini, antara lain meliputi:

- (i) kadar vaksinasi lengkap populasi dewasa di Langkawi merangkumi penduduk tempatan dan *frontliners* industri pelancongan;
- (ii) tahap ketersediaan pemain industri dan produk pelancongan; serta
- (iii) tahap kesediaan pihak-pihak berkuasa berkaitan.

4. SOP Gelembung Pelancongan Langkawi telah dibangunkan agar kita dapat mengurangkan risiko penularan wabak COVID-19 di kalangan pelancong dan juga penduduk tempatan Langkawi. Ini bagi memastikan bahawa Gelembung Pelancongan Langkawi ini kekal “hijau”.

5. Sepertimana Ahli Yang Berhormat sedia maklum, YAB Perdana Menteri pada 10 Oktober 2021 telah mengumumkan kebenaran semula aktiviti rentas negeri, termasuk untuk tujuan pelancongan, bermula hari ini, Isnin, 11 Oktober 2021. Dengan perkembangan ini, pelancongan domestik diyakini akan kembali rancak dan seterusnya menjadi pemangkin untuk membantu industri ini pulih semula.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI HAJI IDRIS BIN JUSOH [BESUT]

TARIKH : 11 OKTOBER 2021 (ISNIN)

SOALAN

DATO' SERI HAJI IDRIS BIN JUSOH [BESUT] minta **MENTERI PERTANIAN DAN INDUSTRI MAKANAN** menyatakan apakah tindakan yang diambil dalam memastikan teknologi pertanian mengikut Dasar Revolusi Perindustrian Keempat (4IR) dapat dikembangkan dalam pelbagai aktiviti pertanian seperti fertigasi pintar, akuakultur pintar, pengairan pintar dan sebagainya.

JAWAPAN

Tuan Yang Di Pertua,

Untuk makluman Ahli Yang Berhormat, pemodenan sektor agromakanan dan pertanian pintar sememangnya menjadi antara tumpuan utama dalam Dasar Agromakanan Negara 2.0 yang pelaksanaannya bermula pada 2021 sehingga 2030. Dasar ini juga telah mengambil kira strategi-strategi yang digariskan dalam Dasar Revolusi Perindustrian Keempat (4IR). Oleh itu, Kementerian Pertanian dan Industri Makanan (MAFI) melalui jabatan dan agensinya sudah mula melaksanakan inisiatif berorientasikan teknologi 4IR dan sentiasa meneroka teknik dan teknologi terkini untuk disesuaikan dan diaplikasikan kepada petani, penternak, nelayan dan usahawan industri makanan.

SOALAN NO : 17

Bagi sektor tanaman, Jabatan Pertanian (DOA) sedang melaksanakan projek menaiktaraf sistem pengairan ladang sedia ada kepada pengairan pintar (*smart irrigation*) lengkap dengan teknologi IoT (*Internet Of Things*) dan juga projek pembangunan data geospasial sebagai alat bantuan di ladang.

Dalam sektor perikanan pula, antara teknologi yang diperkenalkan oleh Jabatan Perikanan Malaysia (DOF) adalah sistem pintar dan tepat untuk ternakan ikan marin melalui jaringan teknologi *wireless sensor* berasaskan IoT. Penggunaan teknologi juga diperluaskan menerusi aplikasi kepintaran buatan atau *artificial intelligence* bagi mengesan penyakit bagi ikan marin.

Bagi aktiviti penyelidikan dan pembangunan (R&D), beberapa projek teknologi 4IR telah dimulakan oleh Institut Penyelidikan Dan Kemajuan Pertanian Malaysia (MARDI). Antara kajian yang dilaksanakan melibatkan sistem pemantauan tumbuhan berasaskan visual untuk buah tomato, rumah cendawan IoT dan juga sistem agro robotik tanaman. Selain itu, MARDI juga bekerjasama dengan syarikat telekomunikasi MAXIS dalam pembangunan kit pertanian pintar iaitu inisiatif *Narrow Band Internet of Things* (NB-IoT) bagi pemantauan persekitaran, pengairan dan kelembapan tanah di bawah struktur lindungan hujan.

Seterusnya, di peringkat kumpulan sasar, Lembaga Pertubuhan Peladang (LPP) sedang melaksanakan inisiatif ladang e-Satelit yang merupakan projek agromakanan menggunakan sistem IoT. Inisiatif ini adalah replikasi bagi projek fertigasi pintar tanaman cili yang telah berjaya dilaksanakan oleh Pertubuhan Peladang Kawasan (PPK) Kuala Langat, Selangor dengan kerjasama *Malaysian Digital Economy Corporation* (MDEC).

MAFI akan terus komited dalam menggalakkan penggunaan teknologi 4IR dalam sektor agromakanan bagi peningkatan produktiviti dan menjamin bekalan makanan negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN AHMAD BIN HASSAN [PAPAR]

TARIKH : 11 OKTOBER 2021 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan bentuk pemantauan daripada FINAS terhadap penghasilan filem-filem genre *political thriller* yang dihasilkan oleh pengeluar filem tempatan yang boleh mewujudkan persepsi umum yang negatif terhadap penyertaan serta kematangan demokrasi bipartisan yang menjadi amalan kita.

JAWAPAN

Tuan Yang Dipertua,

Untuk makluman Ahli Yang Berhormat, Kementerian melalui FINAS mengeluarkan Lesen Pengeluaran Filem seperti yang diperuntukan dalam seksyen 22 (1), Akta Perbadanan Kemajuan Filem Nasional Malaysia 1981 (Pindaan 2013) [Akta 244]:

“Tiada seseorang boleh mengambil bahagian dalam mana-mana aktiviti mengeluarkan, mengedar dan mempamer filem-filem atau mana-mana gabungan aktiviti-aktiviti yang dinyatakan dalam seksyen 21 (1) melainkan jika suatu lesen dikeluarkan yang memberikuasa kepadanya untuk berbuat demikian”.

Selain itu, FINAS juga mengeluarkan Surat Perakuan Penggambaran (SPP) seperti yang diperuntukan Syarat-Syarat Tambahan Pada Lesen Pengeluaran, Pengedaran dan Pameran Filem [Peraturan 4, Peraturan-Peraturan Perbadanan Kemajuan Filem Nasional Malaysia (Perlesenan) 1983].

Polisi baharu tahun 2021 bagi permohonan Lesen Pengeluaran Filem, FINAS menetapkan pemohon lesen perlu menyertai sesi temuduga dan seminar khas bagi tujuan menerangkan (*educate*) tentang tanggungjawab bagi seseorang pemegang lesen.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN JUGAH ANAK MUYANG @ TAMBAT
[LUBOK ANTU]**

TARIKH : 11 OKTOBER 2021 (ISNIN)

SOALAN

TUAN JUGAH ANAK MUYANG @ TAMBAT minta **MENTERI KANAN PENDIDIKAN** menyatakan apakah status terkini projek penyelenggaraan sebuah sekolah di kawasan Ulu Engkari iaitu Sekolah Kebangsaan Nanga Tibu. Pada tahun 2019 peruntukan untuk pelaksanaan projek ini telah diluluskan dan jika mengikut perancangan asal projek ini akan dimulakan pada tahun 2021, adakah projek ini ditangguhkan atau telah dibatalkan.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan rekod Kementerian Pendidikan Malaysia (KPM), tiada peruntukan diluluskan untuk penyelenggaraan bangunan sekolah di Sekolah Kebangsaan Nanga Tibu pada tahun 2019. Walau bagaimanapun, KPM ada menyelenggara asrama di sekolah berkenaan dengan kos sebanyak RM20,000 dan telah siap pada bulan Ogos 2019.

Pada tahun 2020, sebanyak RM200,000 telah diperuntukkan untuk penyelenggaraan bilik darjah di sekolah berkenaan di bawah Pakej Rangsangan Ekonomi 2020. Namun begitu, projek penyelenggaraan bilik darjah ini tidak sempat dilaksanakan akibat pandemik COVID-19 dan pelaksanaan Perintah Kawalan Pergerakan. Projek penyelenggaraan ini akan dilaksanakan pada awal tahun 2022.

Manakala, untuk tahun 2021, KPM dengan kerjasama Jabatan Kerja Raya (JKR) Sarawak telah memulakan proses perolehan bagi kerja pendawaian semula elektrik dengan kos sebanyak RM250,000 untuk sekolah tersebut. Kerja ini akan bermula pada bulan November 2021 dan dijangka siap pada bulan Mac 2022.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN MUHAMMAD BAKHTIAR BIN WAN
CHIK [BALIK PULAU]**

TARIKH : 11 OKTOBER 2021 (ISNIN)

SOALAN

TUAN MUHAMMAD BAKHTIAR BIN WAN CHIK [BALIK PULAU minta **MENTERI PELANCONGAN, SENI DAN BUDAYA** menyatakan sama ada Malaysia bersedia untuk turut menjalankan kempen 3V (*Visit, Vaccinate and Vacation*) sepertimana yang dilakukan di Maldives, Alaska dan New York dalam usaha menghidupkan pelancongan antarabangsa.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa meneroka peluang untuk merancakkan sektor pelancongan negara. Pada masa ini usaha-usaha MOTAC adalah tertumpu kepada menggalakkan pergerakan (*mobility*) dalam negara yang seterusnya boleh merancakkan semula pelancongan domestik dan merangsang ekonomi tempatan.
2. Dalam perkembangan terkini, MOTAC yakin dengan pengumuman Yang Amat Berhormat Perdana Menteri mengenai kebenaran rentas negeri bermula hari ini, pelancongan domestik akan kembali rancak dan seterusnya menjadi pemangkin untuk membantu industri ini pulih semula.
3. MOTAC kini sedang giat merancang, mempersiapkan dan meneroka segala peluang untuk pembukaan Gelembung Pelancongan Antarabangsa membabitkan destinasi atau negara luar untuk membolehkan Malaysia kembali menerima kehadiran pelancong asing setelah hampir 2 tahun penutupan sempadan antarabangsa negara bagi tujuan pelancongan.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK SERI DR. SHAMSUL ANUAR BIN
HAJI NASARAH [LENGGONG]**

TARIKH : 11 OKTOBER 2021 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan berdasarkan situasi semasa pandemik COVID-19 di dalam negara, sistem penyampaian pelajaran dalam talian harus diperkasakan, sejauh mana tindakan yang telah dilaksanakan oleh Kementerian dalam memastikan capaian Internet yang sempurna di kawasan luar bandar serta bentuk bantuan peranti elektronik yang boleh diberikan kepada pelajar dari keluarga B40.

JAWAPAN

Tuan Yang Dipertua,

Untuk makluman Ahli Yang Berhormat, pandemik COVID-19 ini telah mewujudkan kebergantungan kepada Internet yang tinggi di kalangan rakyat terutamanya para pelajar sama ada di kawasan bandar mahupun luar bandar. Kerajaan melalui Suruhanjaya Komunikasi dan Multimedia Malaysia (MCMC) telah mengambil beberapa inisiatif dalam menghasilkan Pelan Jalinan Digital Negara (JENDELA), sebuah rancangan yang dapat menangani isu akses kepada Internet berkualiti bagi perkhidmatan tetap dan mudah alih termasuk Pengajaran dan Pembelajaran di Rumah (PdPR).

Untuk makluman Ahli Yang Berhormat, pembinaan menara baharu akan meluaskan liputan jalur lebar mudah alih 4G, manakala penaiktarafan menara sedia ada daripada 3G kepada 4G akan menyediakan liputan 4G dengan kualiti dan kelajuan jalur lebar yang lebih baik di kawasan berkenaan.

Pelaksanaan JENDELA bukan sahaja tertumpu di kawasan-kawasan bandar, malah turut mengambilkira penyediaan infrastruktur digital di kawasan-kawasan luar bandar dan pedalaman melalui program Pemberian Perkhidmatan Sejagat (USP) seperti berikut:

- a. Sehingga 31 Ogos 2021, melalui kaedah penyumbang utama, sebanyak 702 stesen pemancar daripada 5,394 stesen pemancar telah siap dinaiktaraf kepada teknologi 4G di seluruh negara. Manakala, sebanyak 362 menara baharu akan dibina menjelang penghujung 2022 yang akan meningkatkan kadar liputan 4G di kawasan berpenduduk di seluruh negara.
- b. Selain itu, sebanyak 1,661 menara baharu akan dilaksanakan secara kaedah tender terbuka di kawasan-kawasan luar bandar dan pedalaman di seluruh negara melalui pelantikan Penyedia Perkhidmatan Sejagat yang Dilantik atau *Designated Universal Service Provider* pada suku keempat tahun 2021 untuk melonjakkan lagi kadar liputan 4G kepada 96.9% di kawasan berpenduduk di seluruh Malaysia, penghujung 2022 nanti.
- c. Manakala di kawasan pedalaman di Sabah dan Sarawak serta perkampungan Orang Asli, penyediaan perkhidmatan jalur lebar akan dipercepatkan melalui penyediaan perkhidmatan jalur lebar secara kolektif menggunakan teknologi satelit. Bagi tujuan ini, sebanyak 839 lokasi di seluruh negara telah dikenalpasti bagi memastikan ianya dapat memberikan liputan jalur lebar di kawasan-kawasan yang sukar diakses dengan teknologi gentian optik dan mudah alih. Inisiatif ini dalam proses pelaksanaan dan dijangka akan siap secara berperingkat bermula November 2021 sehingga awal tahun 2022.

SOALAN NO : 21

Untuk meningkatkan liputan di Perak dan Parlimen Lenggong, perancangan dan pencapaian JENDELA setakat 31 Ogos 2021 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Perancangan	Siap	Perancangan	Siap	Perancangan	Siap	Perancangan	Siap
Lenggong	17	-	46	14	1,360	440	4	-
Perak	176	45	1,882	1,523	252,475	96,329	73	-

Secara umumnya pelaksanaan kesemua inisiatif JENDELA ini telah bermula sejak bulan Oktober 2020 dan inisiatif yang dalam perancangan akan siap secara berperingkat sehingga penghujung tahun 2022.

Untuk makluman Ahli Yang Berhormat, peratusan liputan 4G di kawasan berpenduduk di seluruh negara telah meningkat kepada 94.03% pada suku kedua 2021 berbanding 91.8% sebelum pelaksanaan JENDELA pada suku kedua 2020. Peratusan liputan 4G di kawasan berpenduduk di Perak telah meningkat kepada 94.81% pada suku kedua 2021 berbanding 94.71% sebelum pelaksanaan JENDELA pada suku kedua 2020. Manakala, di Parlimen Lenggong pula telah meningkat kepada 62.08% pada suku kedua 2021 berbanding 43.37% sebelum pelaksanaan JENDELA pada suku kedua 2020. Apabila kesemua inisiatif Fasa 1 siap kelak, liputan 4G di kawasan berpenduduk di Parlimen Lenggong dijangka akan meningkat kepada 78.35% menjelang penghujung tahun 2022. Tidak dinafikan peratusan ini masih rendah berbanding sasaran liputan kebangsaan, namun begitu pihak Kementerian sentiasa mengkaji keperluan untuk meningkatkan kualiti dan mengisi kelompondan liputan dalam Jendela Fasa 2 kelak. Selain itu, usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

Peratusan Liputan di seluruh negara, Negeri Perak dan Parlimen Lenggong

	% LTE Kawasan berpenduduk	
	Sebelum JENDELA (Q2 2020)	JENDELA (Q2 2021)
Seluruh negara	91.8%	94.03%
Perak	94.71%	94.81%
Lenggong	43.37%	62.08%

Selain dari pembinaan menara-menara telekomunikasi, Pihak Kerajaan turut akan melaksanakan Penyediaan infrastruktur jalur lebar menggunakan kaedah Point of Presence (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hab untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Fasa 1 akan melibatkan 630 lokasi berhampiran sekolah dan Fasa 2 pula akan melibatkan 3,693 lokasi berhampiran sekolah di kawasan luar bandar di seluruh negara. Sekurang-kurangnya sebanyak 432,300 premis akan menerima perkhidmatan jalur lebar berkelajuan tinggi apabila projek ini siap kelak.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan.

Menerusi portal *JENDELA Map* (<https://jendela.my>) yang telah dilancarkan pada Julai lepas, maklumat yang diperolehi daripada

pengguna secara terus menerus sumber khalayak atau *crowdsourcing*, dapat digunakan sebagai maklumat bagi membuat perancangan penambahbaikan liputan dan kualiti perkhidmatan jalur lebar dari semasa ke semasa. Oleh itu, para pengguna disarankan melayari portal *JENDELA Map* bagi melaporkan lokasi yang kurang mendapat liputan agar boleh dimasukkan ke dalam perancangan masa hadapan.

Pelaksanaan Pengajaran Dan Pembelajaran Di Rumah (PdPR)

Kerajaan mengambil maklum berkenaan maklumbalas rakyat yang menginginkan kesalinghubungan lebih baik, harga mampu milik dan memastikan penyampaian lebih berkualiti lebih-lebih lagi semasa tempoh Perintah Kawalan Pergerakan (PKP) yang menyaksikan peningkatan mendadak penggunaan Internet untuk pelbagai urusan seperti aktiviti pembelajaran, e- dagang dan juga hiburan.

Untuk meringankan beban rakyat dan memastikan kesalinghubungan digital tidak terjejas semasa tempoh pandemik ini, terutamanya agar sesi Pengajaran dan Pembelajaran di Rumah (PdPR) berjalan dengan lancar, pihak MCMC bersama-sama dengan syarikat telekomunikasi telah pun menjalankan pelbagai program dan inisiatif supaya rakyat Malaysia terus berpeluang menikmati perkhidmatan internet.

Selain daripada inisiatif Kerajaan bagi menambahbaik infrastruktur digital, terdapat 873 Pusat Internet Komuniti (PIK) yang telah tersedia di kawasan miskin bandar, pinggir bandar dan luar bandar juga boleh dimanfaatkan oleh orang ramai terutamanya para pelajar dalam memastikan proses PdPR berjalan lancar sebagai persediaan menghadapi peperiksaan besar seperti SPM dan STPM. Terdapat 66 PIK sedang beroperasi di negeri Perak, manakala di Parlimen Lenggong terdapat 3 PIK sedang beroperasi.

Pakej Remaja dan Peranti Keluarga Malaysia

Kerajaan bertanggungjawab memastikan bahawa setiap orang mempunyai akses pada kos yang berpatutan untuk memanfaatkan

Internet. Baru-baru ini, Kementerian telah bertemu dengan syarikat telekomunikasi untuk berbincang mengenai cara-cara membantu rakyat dalam jangka masa pendek.

Pada 15 September 2021, Kementerian telah mengumumkan pakej baharu untuk membantu golongan remaja dan pelajar memperoleh akses Internet dan bagi semua terutamanya golongan yang kurang berkemampuan, peranti pintar yang mampu milik.

Pakej Remaja Keluarga Malaysia adalah pakej prabayar khusus untuk golongan remaja dan pelajar termasuk pelajar pascasiswazah. Dengan hanya RM10/sebulan (Dibayar untuk 3 bulan/RM30), mereka akan mendapat data 20GB untuk tiga (3) bulan. Selain itu, turut diberikan adalah data 1GB (Jumlah 90GB) percuma untuk aktiviti produktiviti setiap hari serta Internet asas tanpa had. Dengan pakej ini, pengguna boleh melakukan aktiviti seperti penghantaran mesej dan melayari Internet. Manakala, bagi data produktiviti, pembelajaran dalam talian serta aktiviti bekerja dari rumah boleh dilakukan tanpa kekangan data.

Bagi data 20GB pula, ianya boleh digunakan untuk aktiviti seperti penurunan video ataupun permainan dalam talian. Ia boleh membantu pengguna untuk merehatkan diri dengan kebolehan untuk hiburan.

Pakej ini memudahkan pelanggan remaja dan pelajar, yang kini tidak perlu lagi menambah nilai setiap bulan. Remaja dan pelajar di bawah umur 21 tahun hanya perlu mendaftar dengan MyKad sementara pelajar melebihi 21 tahun perlu mendaftar dengan kad pelajar. Kerajaan berharap agar golongan ini dapat memanfaatkan kemudahan dan melancarkan pembelajaran serta urusan seharian mereka.

Kerajaan juga sedar bahawa setiap keluarga memerlukan alat peranti pintar agar tidak ketinggalan dalam meneruskan kelangsungan hidup. Oleh itu, turut disediakan adalah pakej baharu untuk mampu milik peranti iaitu **Pakej Peranti Keluarga Malaysia**. Pakej Peranti Keluarga Malaysia akan membolehkan rakyat Malaysia memiliki atau menaik taraf kepada peranti mudah alih dan VoLTE secara percuma. Peranti tersebut dapat dimiliki dengan langganan serendah RM40 sebulan melalui kontrak

selama 12 hingga 24 bulan tertakluk kepada jenis peranti dan perkhidmatan yang dilanggan. Pakej ini termasuk 1GB data percuma untuk aktiviti produktiviti. Setiap pengguna yang layak boleh melanggan sehingga dua (2) pakej dengan mendaftar kad pengenalan yang sama. Adalah diharapkan agar lebih ramai ahli keluarga mendapat manfaat sempurna daripada pemilikan peranti mudah alih 4G dan VoLTE ini, untuk melengkapkan pengalaman Internet mereka. Tempoh mendaftar untuk kedua-dua pakej tersebut adalah mulai 15 Oktober 2021 hingga 15 April 2022.

Kerajaan yakin dengan kedua-dua pakej ini, Keluarga Malaysia bukan sahaja akan menikmati kesalinghubungan yang lebih baik bahkan juga harga yang mampu milik dan tahap penyampaian perkhidmatan yang lebih berkualiti.

Pemberian data internet percuma 1GB

Pemberi perkhidmatan mudah alih utama menawarkan internet secara percuma sebanyak 1GB setiap hari (bersamaan 30GB data percuma setiap bulan) bermula dari 1 April 2020 di bawah Pakej Rangsangan Ekonomi Prihatin Rakyat (PRIHATIN), yang kini dilanjutkan sehingga akhir tahun 2021 di bawah Pakej Perlindungan Rakyat dan Pemulihan Ekonomi (PEMULIH). Penggunaan data percuma 1GB ini terhad kepada aktiviti produktiviti dan khusus untuk tujuan pengajaran dan pembelajaran atas talian.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI ANWAR BIN IBRAHIM
[PORT DICKSON]**

TARIKH : 11 OKTOBER 2021 (ISNIN)

SOALAN

DATO' SERI ANWAR BIN IBRAHIM [PORT DICKSON] minta **MENTERI PERTANIAN DAN INDUSTRI MAKANAN** menyatakan kesan menyeluruh ke atas nelayan, petani dan pekebun kecil akibat Perintah Kawalan Pergerakan dan sejauh mana langkah-langkah diambil bagi menangani permasalahan pendapatan mereka yang terjejas.

JAWAPAN

Tuan Yang Di Pertua,

Untuk makluman Ahli Yang Berhormat, penularan pandemik COVID-19 dan pelaksanaan Perintah Kawalan Pergerakan (PKP) sememangnya telah memberi kesan kepada sektor agromakanan negara secara langsung dan tidak langsung di mana kelancaran rantai makanan terganggu antaranya pengeluaran, pengedaran, pemasaran dan peruncitan produk hasil pertanian dan industri makanan.

Kesan pandemik COVID-19 kepada subsektor tanaman menyebabkan saiz penanaman ladang terpaksa dikecilkan, jadual penanaman disusun semula, penjualan hasil tuaian semakin berkurangan serta pertukaran kepada tanaman lain yang boleh memberikan pulangan segera kepada pengusaha. Subsektor ternakan turut terjejas akibat

peningkatan kos input penternakan, pengurangan pengeluaran dan kebolehpasaran ternakan serta hasil ternakan. Manakala bagi subsektor perikanan pula, pengeluaran perikanan bagi tahun 2020 mengalami sedikit penurunan sebanyak 4.4% berbanding tahun 2019.

Kementerian Pertanian dan Industri Makanan (MAFI) komited dalam memastikan kesinambungan bekalan makanan kekal terjamin dalam apa jua keadaan. Antara langkah-langkah yang telah diambil bagi membantu golongan petani yang terkesan dengan pandemik COVID-19 termasuk pelaksanaan Inisiatif Dana Jaminan Makanan (DJM) berjumlah RM1 bilion bermula pada bulan Mac 2020 yang lalu bertujuan untuk menjamin bekalan makanan kekal terjamin dan mencukupi, menstabilkan harga produk pertanian serta meluas dan memperkukuh ruang pasaran sepanjang tempoh pandemik COVID-19.

Pelaksanaan DJM ini merangkumi empat (4) fasa pelaksanaan yang telah disesuaikan dengan pelaksanaan pelan pemulihan negara iaitu;

- i) Pakej Ransangan Ekonomi Prihatin Rakyat 2020 **(PRIHATIN 2020) – RM190 juta**
- ii) Pakej Pelan Jana Semula Ekonomi Negara 2020 **(PENJANA 2020) – RM227.32 juta**
- iii) Pakej Pelan Jana Semula Ekonomi Negara 2021 **(PENJANA 2021) – RM150 juta; dan**
- iv) Pakej Inisiatif Dana Jaminan Makanan 2021 **(DJM 2021) – RM338 juta.**

Ini menjadikan jumlah keseluruhan Dana Jaminan Makanan adalah sebanyak RM 905.3 juta. Penyediaan DJM ini merupakan langkah intervensi untuk membantu pengusaha pertanian dengan segera, serta secara tidak langsung telah menyuntik dana untuk mengaktifkan kembali rangkaian ekonomi agromakanan bermula daripada pengeluar sehinggalah ke peringkat hiliran dan runcit. Pelaksanaan DJM ini juga merupakan pelengkap kepada pelbagai subsidi, insentif dan bantuan yang disediakan di bawah MAFI kepada golongan sasaran iaitu pesawah, petani, penternak, nelayan dan pengusaha pertanian.

Untuk makluman Ahli Yang Berhormat jua, DJM tidak termasuk pelaksanaan Pakej Rangsangan Ekonomi (PRE) 2020 sebanyak RM50 juta yang merangkumi 918 perolehan dan projek kecil di seluruh negara bagi merangsang perniagaan kontraktor Bumiputera yang terkesan dengan kelembapan ekonomi yang disebabkan oleh kesan awal pandemik COVID-19 pada ketika itu.

Selain daripada bantuan-bantuan dan inisiatif menerusi Dana Jaminan Makanan dan Pakej Rangsangan Ekonomi yang diberikan, MAFI melalui Jabatan dan agensi terlibat membantu kumpulan sasar yang terkesan disebabkan oleh Perintah Kawalan Pergerakan adalah seperti berikut:

- i. Program Bakul Makanan di bawah program MAFI Prihatin yang memberi sumbangan berbentuk makanan bagi meringankan bebanan golongan yang terjejas akibat pandemik COVID 19. Seramai 86,246 penerima di 326 lokasi seluruh negara telah menerima manfaat yang disampaikan melalui pelbagai jabatan dan agensi kementerian pada tahun ini sehingga Julai 2021;
- ii. Sebanyak 35,681 surat kelulusan kebenaran beroperasi telah dikeluarkan semasa tempoh pandemik bagi tempoh Januari hingga Ogos 2021 bagi memastikan pengeluaran hasil dan rantaian nilai makanan tidak terjejas memandangkan aktiviti pertanian juga telah dikategorikan sebagai perkhidmatan penting negara (*essential services*) dan dibenarkan beroperasi sepanjang masa;
- iii. Sebanyak 48,281 latihan secara atas talian telah dibuat bagi meningkatkan kemahiran dan khidmat nasihat sama ada melalui panggilan telefon, panggilan video, webinar serta melalui platform media sosial seperti facebook dan aplikasi whatsapp yang melibatkan 50,182 petani dan 436,487 pengunjung melalui media sosial;
- iv. Platform pemasaran digital (e-dagang) bagi membantu meningkatkan peluang pemasaran para petani dan pengusaha melalui platform e-dagang seperti Agrobazaar Online dan

NekmatBiz serta kerjasama strategik dengan syarikat swasta seperti Lazada, Shopee dan AirAsia;

- v. Pemberian kadar bayaran sewaan premis kerajaan sebanyak 50% kepada pengusaha di semua kemudahan Ladang Satelit di Taman Kekal Pengeluaran Ruminan (TKPR) dan operator swasta di rumah sembelih serta program;
- vi. Memberikan penangguhan pembaharuan semua lesen vesel penangkapan ikan sehingga 1 Oktober 2021 serta meneruskan pemberian Elaun Sara Hidup Nelayan Laut dan Darat dengan kadar yang telah ditingkatkan;
- vii. Memberikan pengecualian syarat minimum pendaratan ikan melalui Laporan Operasi Vesel (LOV) dan purata keaktifan Mobile Transducer Unit (MTU) untuk pembaharuan lesen vesel penangkapan ikan laut dalam Zon C2; dan
- viii. Program Geran Pemadanan *Change Upgrade Products* (CUP) bagi aktiviti ekonomi hiliran dalam sektor agromakanan yang memanfaatkan seramai 154 orang pengusaha industri asas tani pada tahun 2020 dengan peruntukan bernilai RM4 juta, manakala pada tahun 2021, sehingga kini seramai 141 pengusaha telah menerima manfaat dengan peruntukan bernilai RM4.4 juta.

MAFI berharap agar inisiatif-inisiatif termasuk program dan projek serta bantuan khas yang dilaksanakan dapat membantu para petani, nelayan dan penternak serta pengusaha agromakanan yang terjejas disebabkan COVID-19 pandemik dalam meneruskan kelangsungan perusahaan masing-masing dan memberikan sumber pendapatan yang mampan. MAFI akan terus mengambil segala tindakan bagi memastikan kepentingan kumpulan sasar sektor agromakanan terus terjamin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG KAH WOH [IPOH TIMUR]

TARIKH : 11 OKTOBER 2021 (ISNIN)

SOALAN

TUAN WONG KAH WOH minta **MENTERI KANAN PENDIDIKAN** menyatakan hala tuju Kerajaan dalam bidang pendidikan dalam masa pandemik COVID-19. Bagaimanakah pembelajaran dapat diteruskan dengan berkesan dengan memastikan kesihatan para pelajar dapat dijamin pada masa yang sama.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid. PdPR boleh dilaksanakan melalui tiga pendekatan iaitu secara dalam talian (online), luar talian (off-line) dan *off-site* mengikut kesesuaian guru dan murid.

Bagi membantu murid yang tidak mempunyai akses internet atau peranti yang sesuai, guru mengambil inisiatif untuk melaksanakan PdP secara luar talian melalui penggunaan buku teks. Buku aktiviti pula boleh digunakan untuk membuat latihan ulangkaji. Guru menyediakan modul pembelajaran dan membuat serahan bahan tersebut kepada murid. Guru juga mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerksaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

KPM juga telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya. KPM akan terus memastikan pembelajaran murid diberi perhatian dan hak mereka untuk belajar sentiasa diberi keutamaan.

Tuan Yang di-Pertua, KPM juga telah merangka satu pelan komprehensif pembukaan semula sekolah bagi memastikan murid dapat kembali belajar secara bersemuka di sekolah dalam keadaan selamat.

Dalam merangka pelan ini, KPM telah mengadakan sesi libat urus yang menyeluruh bagi mendapatkan input, pandangan serta cadangan berhubung pembukaan semula sesi persekolahan. Sesi libat urus ini melibatkan kumpulan pentadbir sekolah, guru dan juga wakil Persatuan Ibu Bapa dan Guru (PIBG) di negeri Perlis, Negeri Sembilan, Sarawak serta Wilayah Persekutuan Labuan. KPM juga telah mengadakan sesi libat urus melibatkan kumpulan pakar dari sektor kesihatan awam, pendidikan, psikologi kanak-kanak dan pediatrik. Sesi tersebut juga melibatkan wakil Kesatuan Perkhidmatan Perguruan Kebangsaan Malaysia (NUTP), Gabungan Majlis Guru Besar Malaysia dan Majlis Pengetua Sekolah Malaysia. Selain itu, KPM turut mendapatkan pandangan daripada calon Sijil Pelajaran Malaysia (SPM) tahun 2021, termasuk calon dalam kalangan Murid Berkeperluan Khas (MBK).

KPM juga telah membuat analisis amalan terbaik pembukaan semula sekolah di negara-negara lain bagi meneliti pendekatan yang

berkesan dalam memastikan pengoperasian sekolah secara bersemuka dapat dilaksanakan dalam keadaan yang selamat.

Berdasarkan input daripada sesi libat urus dan dapatan analisis, KPM telah membuat penambahbaikan kepada kerangka asal pelan komprehensif pembukaan semula sekolah. Kerangka ini kemudiannya diperincikan bersama Kementerian Kesihatan Malaysia (KKM) dan Majlis Keselamatan Negara (MKN).

Mengambil kira situasi semasa, termasuk kadar vaksinasi dalam kalangan guru, anggota kumpulan pelaksana (AKP) dan pekerja perkhidmatan sokongan (PPS) serta pandangan KKM dan MKN, KPM telah mengumumkan bahawa sekolah akan dibuka untuk pengajaran dan pembelajaran (PdP) bersemuka mulai 3 Oktober 2021 bagi negeri kumpulan A dan 4 Oktober 2021 bagi negeri kumpulan B. Pembukaan sekolah dibuat secara berperingkat mengikut fasa dalam Pelan Pemulihan Negara (PPN).

Bagi negeri di Fasa 1 PPN, murid kelas Tingkatan 6 Semester 2 dan kelas peperiksaan antarabangsa (IGCSE O-Level) akan hadir ke sekolah. Murid lain akan melaksanakan PdPR. Bagi negeri di Fasa 2 PPN pula, kehadiran ke sekolah adalah kumpulan murid di Fasa 1. Selain itu, bagi murid sekolah rendah, MBK di Sekolah Kebangsaan Pendidikan Khas (SKPK) dan Program Pendidikan Khas Integrasi (PPKI) akan mula hadir ke sekolah. Untuk sekolah menengah di fasa ini, MBK di Sekolah Menengah Kebangsaan Pendidikan Khas (SMKPK), Sekolah Menengah Pendidikan Khas Vokasional (SMPKV) dan PPKI akan mula hadir secara bersemuka. Selain itu, murid *International Baccalaureate Diploma* (IBD) Tahun 2, kelas peperiksaan antarabangsa (A-Level, Australia Higher School Certificate dan IBD) dan Program Prauniversiti Semester 3 di Sekolah Sukan Malaysia (SSM) turut mula hadir bersemuka. Murid lain akan melaksanakan PdPR.

Bagi negeri di Fasa 3 PPN, kehadiran ke sekolah adalah semua kumpulan murid di Fasa 2. Selain itu, prasekolah juga akan mula beroperasi. Bagi peringkat sekolah menengah, semua murid kelas peperiksaan awam, kelas peperiksaan antarabangsa dan Program

Prauniversiti di SSM juga akan mula hadir ke sekolah. Murid lain akan melaksanakan PdPR.

Bagi negeri di Fasa 4 PPN, kehadiran ke sekolah adalah semua kumpulan murid di Fasa 3. Untuk sekolah rendah, selepas 2 minggu, murid Tahun 1, 2 dan 3 akan hadir ke sekolah. Selepas 2 minggu berikutnya, murid Tahun 4, 5 dan 6 pula akan mula hadir ke sekolah. Bagi sekolah menengah, selepas 2 minggu, murid Tingkatan 3 dan 4 akan hadir ke sekolah. Selepas 2 minggu berikutnya, murid peralihan, Tingkatan 1 dan 2 pula akan mula hadir ke sekolah.

Untuk makluman Ahli Yang Berhormat, KPM juga mengambil ketetapan untuk mengehadkan kapasiti murid di sekolah pada kadar 50 peratus enrolmen keseluruhan. Bagi tujuan tersebut, kaedah yang digunakan adalah dengan mengehadkan kapasiti murid di dalam kelas kepada 50 peratus daripada jumlah murid dalam kelas tersebut. Justeru, sistem penggiliran murid hadir ke sekolah mengikut minggu akan dilaksanakan. Kaedah ini diguna pakai untuk semua kelas kecuali:

- i. MBK di SKPK/SMKPK/SMPKV dan PPKI;
- ii. murid di Tingkatan 6 Semester 2 dan IBD Tahun 2;
- iii. murid di sekolah asrama sepenuhnya;
- iv. murid kelas peperiksaan antarabangsa;
- v. murid prasekolah/tadika swasta/pusat perkembangan minda (4-6 tahun); dan
- vi. murid di Sekolah Kurang Murid (kurang 150 murid).

Selain daripada pendekatan di atas, KPM juga telah mengambil beberapa ketetapan lain bagi mewujudkan persekitaran sekolah yang selamat. KPM menetapkan bahawa hanya guru dan AKP yang lengkap divaksin sahaja dibenarkan untuk melaksanakan PdP di dalam kelas dan berinteraksi dengan murid. Selain itu, hanya PPS yang lengkap divaksin sahaja dibenarkan memasuki dan bekerja di dalam kawasan sekolah.

KPM juga memantau rapi kadar vaksinasi warga sekolah yang layak divaksin. Sehingga 24 September 2021, seramai 378,842 orang guru (91.5 peratus) telah lengkap divaksin. Manakala, seramai 58,612 orang AKP (87.4 peratus) telah lengkap divaksin. Selain daripada itu,

seramai 92,448 orang PPS (78.6 peratus) melibatkan pekerja kawalan keselamatan, kebersihan, dewan makan, kantin sekolah dan pemandu van sekolah telah lengkap divaksin. KPM sentiasa bekerjasama rapat dengan Pasukan Petugas Khas Imunisasi COVID-19 (CITF) bagi memastikan kadar vaksinasi dalam kalangan guru, AKP dan PPS dapat terus ditingkatkan.

Di samping itu, KPM bekerjasama dengan pihak Kementerian Sains, Teknologi dan Inovasi (MOSTI) dan KKM dalam pemberian vaksin kepada murid sekolah. KPM menyambut baik keputusan Kerajaan untuk memberikan vaksinasi kepada murid sekolah berumur 12 hingga 17 tahun di bawah Program Imunisasi COVID-19 Kebangsaan Remaja (PICK Remaja) bagi melindungi mereka. PICK Remaja yang dikelola oleh Pasukan Petugas Khas Imunisasi COVID-19 (CITF-A) telah dimulakan di Sarawak pada 8 September lalu, diikuti Wilayah Persekutuan Labuan, Sabah dan kini diperluaskan ke seluruh negara.

KPM mengambil maklum akan sasaran KKM supaya sekurang-kurangnya 80 peratus remaja termasuk murid sekolah berumur 12 hingga 17 tahun di seluruh negara divaksin lengkap sebelum sekolah dibuka pada sesi 2022.

KPM turut mewajibkan pemakaian pelitup muka kepada semua warga sekolah termasuk murid. Murid yang bergejala tidak dibenarkan hadir ke sekolah bagi mengelakkan risiko jangkitan dalam kawasan sekolah. Semua sekolah perlu memastikan pengudaraan yang baik di dalam kelas. Murid akan makan di dalam kelas semasa waktu rehat dengan seliaan guru. Bagi kelas yang menggunakan penyaman udara pula, murid perlu makan di ruang terbuka dengan seliaan guru.

Pada masa yang sama, prosedur operasi standard (SOP) yang telah ditetapkan oleh KKM seperti kerap mencuci tangan, saringan suhu badan serta penjarakan fizikal akan terus dilaksanakan di dalam sekolah.

Bagi murid yang akan pulang ke sekolah asrama sepenuhnya, KPM akan melaksanakan ujian saringan COVID-19 menggunakan kit ujian sendiri COVID-19 ke atas murid sebanyak 3 kali, iaitu semasa pendaftaran masuk, hari ke-6 dan hari ke-14. Bagi murid asrama harian,

ujian saringan COVID-19 menggunakan kit ujian sendiri COVID-19 akan dilaksanakan semasa pendaftaran masuk. Selain itu, kit ujian sendiri COVID-19 akan disediakan bagi kegunaan sekolah harian untuk membuat saringan awal sekiranya terdapat murid yang menunjukkan gejala ketika di sekolah.

Bagi memastikan kelancaran pengoperasian sekolah, KPM telah mengeluarkan Garis Panduan Pengurusan dan Pengoperasian Sekolah 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru di sekolah.

Kerangka pelan pembukaan sekolah ini adalah satu perancangan komprehensif KPM bagi memastikan pengoperasian sekolah secara bersemuka berjalan dengan teratur dan selamat.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. DATO' HAJI MOHD FASIAH BIN HAJI
MOHD FAKEH [SABAK BERNAM]
TARIKH : 11 OKTOBER 2021 (ISNIN)

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI KEWANGAN** menyatakan setakat manakah pencapaian dan kejayaan Pelan Pemulihan Negara (PPN) yang telah diumumkan pada 26 Julai 2021 lalu dan nyatakan strategi seterusnya bagi memerangi pandemik COVID-19 ini secara lebih berkesan lagi dan dapat memulihkan dan seterusnya menstabilkan ekonomi negara.

JAWAPAN

Tuan Yang di-Pertua,

Kerajaan telah membentangkan Pelan Pemulihan Negara (PPN) di Parlimen pada 26 Julai 2021 bertujuan mengawal penularan COVID-19 bagi membolehkan pembukaan semula negara secara progresif yang dalam masa sama mengimbangi perlindungan nyawa dan kelangsungan hidup rakyat. Selain itu, Pelan ini juga adalah merupakan strategi penyelesaian bagi membolehkan negara membuka semula sektor ekonomi dan aktiviti sosial secara berfasa dan selamat daripada krisis pandemik COVID-19.

Pencapaian terkini negara berdasarkan indikator di dalam PPN yang ditetapkan adalah seperti berikut:

1. Kadar Vaksinasi

Setakat 3 Oktober 2021, peratusan jumlah penduduk dewasa yang telah lengkap divaksinasi adalah sebanyak 87.6% atau melebihi 20 juta orang dan sebanyak 94.3% atau 22 juta individu telah mendapat sekurang-kurangnya satu dos. Ini menunjukkan kesediaan rakyat untuk memainkan peranan bersama-sama Kerajaan dalam mengekang penularan wabak pandemik COVID-19.

2. Peralihan fasa di negeri-negeri seluruh negara.

Selaras dengan pengumuman PPN di Parlimen pada 26 Julai 2021, beberapa negeri berjaya menunjukkan kemajuan positif dengan mencapai penurunan kes yang ketara serta kadar penggunaan wad ICU yang menurun kepada tahap mencukupi dan sederhana. Beberapa negeri juga berjaya mencapai nilai ambang yang ditetapkan untuk beralih fasa seperti Negeri Sembilan daripada fasa 3 kepada fasa 4, Pahang daripada fasa 2 kepada fasa 3, dan Johor daripada fasa 1 kepada fasa 2.

3. Penurunan kes baharu dan kes kematian di Lembah Klang.

Penubuhan *Greater Klang Valley Special Task Force* (GKV STF) telah berjaya mengurangkan tempoh menunggu di wad kecemasan

bagi pesakit COVID-19. Terdapat penurunan mendadak daripada 1,600 kes pada awal Ogos ketika pasukan itu ditubuhkan, kepada 120 kes untuk kesemua wad kecemasan di hospital dalam Lembah Klang.

4. Pembukaan semula sektor ekonomi dan aktiviti sosial secara berfasa.

Kerajaan juga telah mengambil keputusan untuk pembukaan semula 14 sektor ekonomi bermula 16 Ogos 2021. Keputusan itu dibuat setelah mengambil kira indikator dan penilaian risiko yang dijalankan oleh Kementerian Kesihatan Malaysia (KKM) serta Kementerian Perdagangan Dalam Negeri dan Hal Ehwal Pengguna (KPDNHEP) yang telah menunjukkan penurunan kes secara bersasar.

5. Kelonggaran sekatan kepada penerima lengkap vaksin.

Kerajaan telah mengumumkan kelonggaran sekatan atau kemudahan yang diberikan kepada penerima lengkap dua dos vaksin secara berperingkat. Kelonggaran ini termasuk kebenaran '*dine-in*' di restoran, kedai makan dan *club house* serta aktiviti solat di masjid dan surau serta rumah ibadat bagi bukan Islam dibenarkan untuk penerima dua dos vaksin sahaja. Kelonggaran SOP ini adalah merupakan satu permulaan kepada pembukaan semula sektor ekonomi dan sosial dan menggalakkan rakyat untuk mendaftar dan mendapatkan vaksin secepat mungkin.

6. Pakej Rangsangan Ekonomi

Kerajaan telah mengumumkan lapan (8) pakej rangsangan ekonomi dan bantuan komprehensif bernilai RM530 bilion. Selain itu, terdapat juga beberapa inisiatif yang telah dilaksanakan di bawah pakej PEMULIH termasuk Bantuan Prihatin Rakyat 3.0, Geran Khas Prihatin 4.0 dan Baucar Perlindungan Tenang untuk golongan B40.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' MOHD. NIZAR BIN HAJI
ZAKARIA [PARIT]**

TARIKH : 11 OKTOBER 2021 (ISNIN)

SOALAN

DATO' MOHD. NIZAR BIN HAJI ZAKARIA [PARIT] minta **MENTERI PEMBANGUNAN WANITA, KELUARGA DAN MASYARAKAT** menyatakan :-(a) apakah usaha yang telah dilaksanakan oleh Kementerian bagi menyelesaikan masalah peningkatan kes bunuh diri sepanjang pandemik COVID-19 melanda Malaysia; dan
(b) sejauh mana keberkesanan usaha yang telah dilaksanakan bagi membantu individu yang mengalami tekanan perasaan serta murung.

JAWAPAN

Tuan Yang di-Pertua,

Usaha bagi penyelesaian masalah peningkatan bunuh diri adalah di bawah bidang kuasa Kementerian Dalam Negeri dan Kementerian Kesihatan. Bagaimanapun Kementerian Pembangunan Wanita, Keluarga dan Masyarakat (KPWKM) melalui Lembaga Kaunselor turut sama melaksanakan pelbagai program sokongan psikososial bagi membantu masyarakat menangani masalah psikologi termasuk cubaan kes bunuh diri.

Bantuan sokongan psikologi dan sosial amat diperlukan untuk menjadikan masyarakat lebih sejahtera. KPWKM melalui Lembaga Kaunselor telah melaksanakan pelbagai inisiatif untuk membantu mereka yang mengalami masalah psikologi atau emosi semasa penularan wabak COVID-19 seperti:

- **Khidmat Aduan Atas Talian** melalui Talian Kasih 15999 atau aplikasi *WhatsApp* di nombor 019-26 15999. Perkhidmatan ini beroperasi 24 jam setiap hari yang mana talian ini berfungsi sebagai *single point of contact* kepada semua masyarakat untuk mengemukakan sebarang pertanyaan, aduan mahupun permohonan bantuan. Skop perkhidmatan Talian Kasih merangkumi aspek berkaitan penderaan, kaunseling, gelandangan, perlindungan, kebajikan, talian kanak-kanak, perkhidmatan kesihatan reproduktif, masalah sosial remaja dan perkara yang melibatkan kumpulan sasar Kementerian.
- **Khidmat Sokongan Psikologi Atas Talian** bagi membantu masyarakat yang terkesan akibat penularan wabak COVID-19 serta Perintah Kawalan Pergerakan. Talian Khas ini melibatkan seramai 250 orang sukarelawan kaunselor berdaftar di bawah Lembaga Kaunselor Malaysia
- Selain daripada dua talian di atas, agensi-agensi kerajaan yang lain juga ada menyediakan perkhidmatan dalam talian seperti:

- Mental Health and Psychological Support Service yang diuruskan oleh Kementerian Kesihatan Malaysia
 - KSK Care Centre@Masjid Tunku Mizan Zainal Abidin yang diuruskan oleh Jabatan Kemajuan Islam Malaysia.
- KPWKM melalui Lembaga Kaunselor telah mendaftarkan Sukarelawan Kaunselor Berdaftar bagi membantu masyarakat dalam menangani isu psikososial. Sukarelawan Kaunselor Berdaftar ini merupakan satu entiti formal di bawah KPWKM dalam usaha membantu masyarakat dan menyediakan bantuan profesional kepada masyarakat yang memerlukan. Selain membantu melaksanakan aktiviti seperti Talian Kasih 15999 Khas COVID-19, Sukarelawan Kaunselor Berdaftar juga menyediakan khidmat psiko-sosial di peringkat komuniti dan bantuan psikologi semasa berlakunya bencana untuk melaksanakan sokongan bantu mula psikologi (*Psychological First Aid*) kepada mangsa dan waris yang terkesan.
- Sukarelawan Kaunselor Berdaftar terlibat membantu memberikan bantuan psiko-sosial kepada masyarakat melalui saluran YouTube TV yang disiarkan setiap malam untuk membincangkan isu kesihatan mental serta menyampaikan panduan (tips) untuk masyarakat. Kerjasama dengan Kementerian Komunikasi dan Multimedia (KKMM) untuk siaran program TV bagi sokongan kaunseling di dalam rancangan Selamat Pagi Malaysia bermula pada 1 Jun 2021.
- Lembaga Kaunselor juga telah menyediakan direktori sukarelawan kaunselor berdaftar untuk rujukan masyarakat di semua daerah.
- Bagi perancangan jangka panjang, Pusat Sokongan Sosial Setempat (PSSS) akan diwujudkan untuk memperluaskan khidmat psikososial setempat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN JUGAH ANAK MUYANG @
TAMBAT [LUBOK ANTU]**

TARIKH : 11 OKTOBER 2021 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan apakah langkah-langkah yang diambil oleh Kementerian bagi menyelesaikan masalah capaian Internet di kawasan luar bandar. Adakah hanya dengan menambah bilangan menara telekomunikasi tanpa memperluaskan lagi radius liputan dan mempertingkatkan lagi kadar kelajuan Internet

JAWAPAN

Tuan Yang Dipertua,

Untuk makluman Ahli Yang Berhormat, pandemik COVID-19 ini telah mewujudkan kebergantungan kepada Internet yang tinggi di kalangan rakyat terutamanya para pelajar sama ada di kawasan bandar mahupun luar bandar. Kerajaan melalui Suruhanjaya Komunikasi dan Multimedia Malaysia (MCMC) telah mengambil beberapa inisiatif dalam menghasilkan Pelan Jalinan Digital Negara (JENDELA), sebuah rancangan yang dapat menangani isu akses kepada Internet berkualiti bagi perkhidmatan tetap dan mudah alih.

Untuk makluman Ahli Yang Berhormat, pembinaan menara baharu akan meluaskan liputan jalur lebar mudah alih 4G, manakala penaiktarafan menara sedia ada daripada 3G kepada 4G akan menyediakan liputan 4G dengan kualiti dan kelajuan jalur lebar yang lebih baik di kawasan berkenaan.

Pelaksanaan JENDELA bukan sahaja tertumpu di kawasan-kawasan bandar, malah turut mengambilkira penyediaan infrastruktur digital di kawasan-kawasan luar bandar dan pedalaman melalui program Pemberian Perkhidmatan Sejagat (USP) seperti berikut:

- a. Sehingga 31 Ogos 2021, melalui kaedah penyumbang utama, sebanyak 702 stesen pemancar daripada 5,394 stesen pemancar telah siap dinaiktaraf kepada teknologi 4G di seluruh negara. Manakala, sebanyak 362 menara baharu akan dibina menjelang penghujung 2022 yang akan meningkatkan kadar liputan 4G di kawasan berpenduduk di seluruh negara.
- b. Selain itu, sebanyak 1,661 menara baharu akan dilaksana secara kaedah tender terbuka di kawasan-kawasan luar bandar dan pedalaman di seluruh negara melalui pelantikan Penyedia Perkhidmatan Sejagat yang Dilantik atau *Designated Universal Service Provider* pada suku keempat tahun 2021 untuk melonjakkan lagi kadar liputan 4G kepada 96.9% di kawasan berpenduduk di seluruh Malaysia, penghujung 2022 nanti.
- c. Manakala di kawasan pedalaman di Sabah dan Sarawak serta perkampungan Orang Asli, penyediaan perkhidmatan jalur lebar akan dipercepatkan melalui penyediaan perkhidmatan jalur lebar secara kolektif menggunakan teknologi satelit. Bagi tujuan ini, sebanyak 839 lokasi di seluruh negara telah dikenalpasti bagi memastikan ianya dapat memberikan liputan jalur lebar di kawasan-kawasan yang sukar diakses dengan teknologi gentian optik dan mudah alih. Inisiatif ini dalam proses pelaksanaan dan dijangka akan siap secara berperingkat bermula November 2021 sehingga awal tahun 2022.

SOALAN NO : 26

Untuk meningkatkan liputan di Sarawak, perancangan dan pencapaian JENDELA setakat 31 Ogos 2021 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Perancangan	Siap	Perancangan	Siap	Perancangan	Siap	Perancangan	Siap
Lubok Antu	36	-	48	6	183	97	26	-
Sarawak	823	74	3,012	1,615	73,588	47,223	523	-

Secara umumnya pelaksanaan kesemua inisiatif JENDELA ini telah bermula sejak bulan Oktober 2020 dan inisiatif yang dalam perancangan akan siap secara berperingkat sehingga penghujung tahun 2022.

Peratusan liputan 4G di kawasan berpenduduk di Sarawak telah meningkat kepada 80.84% pada suku kedua 2021 berbanding 73.67% sebelum pelaksanaan JENDELA pada suku kedua 2020. Di Parlimen Lubok Antu pula, liputan 4G telah meningkat kepada 46.08% pada suku kedua 2021 berbanding 39.46% sebelum pelaksanaan JENDELA pada suku kedua 2020. Apabila kesemua inisiatif Fasa 1 siap kelak, liputan 4G di kawasan berpenduduk di Parlimen Lubok Antu dijangka akan meningkat kepada 72.45% menjelang penghujung tahun 2022. Tidak dinafikan peratusan ini masih rendah berbanding sasaran liputan kebangsaan, namun begitu pihak Kementerian sentiasa mengkaji keperluan untuk meningkatkan kualiti dan mengisi kelompongan liputan dalam Jendela Fasa 2 kelak. Selain itu, usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

Peratusan Liputan di Lubok Antu

Parlimen	% LTE Kawasan berpenduduk	
	Sebelum JENDELA (Q2 2020)	JENDELA (Q2 2021)
Lubok Antu	39.46%	46.08%

Selain dari pembinaan menara-menara telekomunikasi, Pihak Kerajaan turut akan melaksanakan Penyediaan infrastruktur jalur lebar menggunakan kaedah Point of Presence (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hab untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Fasa 1 akan melibatkan 630 lokasi berhampiran sekolah dan Fasa 2 pula akan melibatkan 3,693 lokasi berhampiran sekolah di kawasan luar bandar di seluruh negara. Sekurang-kurangnya sebanyak 432,300 premis akan menerima perkhidmatan jalur lebar berkelajuan tinggi apabila projek ini siap kelak.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan.

Menerusi portal *JENDELA Map* (<https://jendela.my>) yang telah dilancarkan pada Julai lepas, maklumat yang diperolehi daripada pengguna secara terus secara sumber khalayak atau *crowdsourcing*, dapat digunakan sebagai maklumat bagi membuat perancangan penambahbaikan liputan dan kualiti perkhidmatan jalur lebar dari semasa ke semasa. Oleh itu, para pengguna disarankan melayari portal *JENDELA Map* bagi melaporkan lokasi yang kurang mendapat liputan agar boleh dimasukkan ke dalam perancangan masa hadapan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 11 OKTOBER 2021 (ISNIN)

SOALAN

DATO' SRI BUNG MOKTAR BIN RADIN minta **MENTERI KANAN
PENDIDIKAN** menyatakan:-

- (a) apakah usaha Kementerian dalam memastikan kualiti pembelajaran murid-murid sekolah dapat dikekalkan dan tidak terjejas berikutan penutupan sekolah. Apakah alternatif lain selain dari Pengajaran dan Pembelajaran Di Rumah (PDPR) memandangkan terdapatnya kekangan kepada keluarga yang tidak berkemampuan untuk mengikuti pembelajaran secara *online*; dan
- (b) sejauh manakah murid-murid sekolah boleh memahami dan mengikuti skop PdPR dan apakah prestasi pembelajaran murid-murid dapat dikekalkan seperti pembelajaran secara bersemuka dengan kehadiran di sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid.

Bagi menilai tahap keberkesanan PdP semasa tempoh penutupan sekolah, KPM telah melaksanakan Kajian Keberkesanan Pelaksanaan *Home-based Learning* yang ditadbir secara dalam talian. Kajian ini memfokuskan kepada PdPR semasa Perintah Kawalan Pergerakan (PKP). Skop kajian meliputi aspek pelaksanaan PdPR dalam tempoh Mac hingga Julai tahun 2020 yang merangkumi pendekatan, kaedah, strategi, aplikasi dan peralatan yang digunakan dalam pelaksanaan PdPR. Selain itu, kajian tersebut juga melihat kepada penjadualan PdPR, penyusunan semula Rancangan Pelajaran Tahunan (RPT) dan pentaksiran. Kajian ini melibatkan 13,156 orang pentadbir sekolah, 39,967 orang guru, 52,413 orang murid dan 59,624 orang ibu bapa/penjaga. Dapatan kajian menunjukkan pelibatan murid di bandar dalam PdPR secara dalam talian adalah sebanyak 59.3 peratus berbanding 51.4 peratus bagi murid di luar bandar. Bagi RPT pula, 46.2 peratus guru di bandar mencapai sasaran pelaksanaan berbanding dengan 39.1 peratus guru di luar bandar.

Dapatan kajian ini juga menunjukkan tahap keberkesanan PdPR adalah pada tahap sederhana. Sebanyak 34.1 peratus murid menyatakan hasil pembelajaran di rumah adalah tidak seperti yang diperolehi di sekolah dan merupakan punca pembelajaran kurang berkesan.

Selain itu, 51.2 peratus murid berasa tertekan semasa pembelajaran di rumah. Daripada kumpulan tersebut, 48.9 peratus murid menyatakan sebab tertekan adalah kerana interaksi yang terhad dengan guru, manakala 55.0 peratus murid tertekan disebabkan interaksi terhad

dengan rakan-rakan. Sebanyak 53.4 peratus murid pula tertekan disebabkan kurang bimbingan dalam sesi pembelajaran.

Sebaliknya, terdapat murid menganggap PdPR merupakan suatu pengalaman baharu. Sebanyak 56.6 peratus murid berjaya melibatkan diri secara aktif semasa sesi pembelajaran di rumah dan 49.7 peratus murid berasa seronok semasa mengikuti PdPR. Sebanyak 57.5 peratus murid berjaya menyiapkan tugas atau latihan yang diberikan oleh guru dalam masa yang ditetapkan. Dapatan kajian juga menunjukkan sebanyak 36.0 peratus murid boleh belajar sendiri menggunakan bahan pembelajaran di rumah dalam tempoh PKP.

Selain daripada pelaksanaan kajian tersebut, pada suku tahun pertama 2021, KPM telah menjalankan Tinjauan Pelaksanaan PdPR yang melibatkan 500 buah sekolah melalui pemerhatian terhadap PdPR yang dilaksanakan dalam talian atau gabungan dalam dan luar talian. Pemerhatian dilaksanakan melalui kehadiran Nazir Sekolah dalam kelas PdPR secara dalam talian. Pemerhatian ini dimaklumkan lebih awal kepada guru yang terlibat.

Sebanyak 1,053 pemerhatian dilaksanakan ke atas PdP guru. Tinjauan mendapati 98.7 peratus guru dapat mengelola isi pelajaran yang diajar mengikut peruntukan masa yang ditetapkan. Sebanyak 97.4 peratus guru berjaya membimbing murid untuk memahami dan menguasai isi, konsep dan fakta berkaitan pelajaran. Sementara itu, 96.7 peratus guru berjaya menarik perhatian murid untuk memberi respons terhadap pembelajaran dan memastikan keterlibatan murid semasa PdPR secara *real-time*.

Hasil tinjauan juga mendapati murid memberi respons positif terhadap tugas yang diberikan oleh guru dalam 97.5 peratus PdPR yang diperhatikan. Murid juga dapat melengkap dan menghantar tugas dengan pelbagai cara antaranya, melalui rakaman video, slaid pembentangan dan *voice call*.

Rumusan daripada tinjauan ini menunjukkan bahawa guru berupaya merangsang murid berfikir dan berkomunikasi dalam PdPR.

Guru juga dapat melaksanakan aktiviti pembelajaran yang menyeronokkan dan menarik minat murid untuk belajar.

Untuk makluman Ahli Yang Berhormat, dalam memastikan semua murid mengikuti PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

Secara kesimpulannya, dapatan kajian menunjukkan pelaksanaan PdPR berhadapan dengan pelbagai cabaran dan kekangan pada peringkat awal. Namun, intervensi yang dilaksanakan oleh KPM telah membantu murid mengikuti PdPR dengan lebih baik. KPM sentiasa komited untuk memastikan murid dapat meneruskan pembelajaran dalam keadaan yang selamat dan mendapat akses kepada pembelajaran yang berkualiti pada setiap masa.

KPM menyedari bahawa pandemik COVID-19 telah memberi kesan kepada sistem persekolahan. Sesi PdP secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah PdPR mengikut kesesuaian guru dan murid. PdPR boleh dilaksanakan melalui tiga pendekatan iaitu secara dalam talian (online), luar talian (off-line) dan *off-site* mengikut kesesuaian guru dan murid.

Bagi membantu murid yang tidak mempunyai akses internet atau peranti yang sesuai, guru mengambil inisiatif untuk melaksanakan PdP secara luar talian melalui penggunaan buku teks. Buku aktiviti pula boleh digunakan untuk membuat latihan ulangkaji. Guru menyediakan modul

pembelajaran dan membuat serahan bahan tersebut kepada murid. Guru juga mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

KPM juga telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM akan terus memastikan pembelajaran murid diberi perhatian dan hak mereka untuk belajar sentiasa diberi keutamaan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 11 OKTOBER 2021 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan apakah langkah-langkah untuk memperbaiki dan memudahkan komunikasi tentang SOPs untuk orang awam, termasuk warga bukan negara yang kurang faham Bahasa Malaysia supaya mengelakkan situasi “kemungkinan salah faham bahasa” yang berlaku di Pulau Pinang yang mana Ketua Polis mengatakan bahawa kumpulan di luar Masjid Juru pada Hari Raya Aidiladha (22 April 2021) telah melanggar SOP.

JAWAPAN

Tuan Yang Dipertua,

Untuk makluman Ahli Yang Berhormat, Kementerian Komunikasi dan Multimedia Malaysia (KKMM) menerusi agensi-agensinya seperti Jabatan Penyiaran Malaysia (RTM) dan Jabatan Penerangan Malaysia (JAPEN) sentiasa komited bagi memberi pemahaman kepada rakyat Malaysia dan warga asing di negara ini mengenai Prosedur Operasi Standard, ataupun dengan izin *Standard Operating Procedure* (SOP) berkaitan usaha mengekang penularan wabak COVID-19. Usaha ini dibuat bagi memastikan setiap peringkat masyarakat termasuk warga asing memahami dan seterusnya mematuhi SOP yang sedang berkuatkuasa.

Usaha-usaha yang dilaksanakan oleh RTM adalah seperti berikut:-

- a) Hebahan berkaitan keperluan mematuhi SOP atau SOP baharu yang diperkenalkan oleh kerajaan melalui pelbagai platform iaitu semua 6 saluran televisyen milik RTM dan 34 saluran radio termasuk di negeri-negeri serta media baharu (melalui hebahan infografik, video pendek atau pesanan khidmat masyarakat) dalam pelbagai bahasa (bahasa Melayu, Inggeris, Mandarin, Tamil, Orang Asli dan bahasa tempatan Sabah dan Sarawak); dan
- b) Liputan dan laporan isu berkaitan COVID-19 termasuk penguatkuasaan SOP dengan menggunakan pelbagai kaedah persembahan secara grafik, bergambar atau video agar mudah difahami dan diterima oleh semua pihak terutama pengumuman terkini kerajaan mengenai Pelan bagi mengekang penularan wabak COVID-19 yang secara tidak langsung mempunyai kaitan dengan SOP baharu.

Manakala JAPEN telah melaksanakan program mendekati rakyat bagi memberi penjelasan mengenai SOP melalui aktiviti hebahan unit bergerak menerusi program *Info on Wheels* (IOW). Program IOW melibatkan 153 Pejabat Penerangan Daerah di 14 negeri dan tiga (3) wilayah persekutuan sejak Januari 2020. Sehingga Ogos 2021 sebanyak 17,977 program di 88,105 lokasi termasuk 215 program melibatkan Orang Asli bagi menyalurkan maklumat dan membuat hebahan terus kepada kumpulan sasar di kawasan-kawasan pedalaman.

Program IOW menggunakan pelbagai dialek dan bahasa seperti empat bahasa utama (Melayu, Inggeris, Mandarin dan Tamil), di Sabah (Kadazan Dusun, Bajau dan Murut) dan Sarawak (Iban, Melanau dan Melayu Sarawak) serta bahasa lain (Siam, Jawa, Bugis, Myanmar dan Bangladesh) bagi mendekati masyarakat dan pendatang asing yang ada dalam negara ini. Di samping itu, loghat tempatan seperti loghat Perak, Negeri Sembilan, Melaka, Utara, Kelantan dan Terengganu digunakan dalam hebahan agar matlamat penyampaian maklumat kerajaan disampaikan secara holistik dan difahami di seluruh negara.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI HAJI IDRIS BIN JUSOH
[BESUT]**

TARIKH : 11 OKTOBER 2021 (ISNIN)

SOALAN

DATO' SERI HAJI IDRIS BIN JUSOH minta **MENTERI PERTANIAN DAN INDUSTRI ASAS TANI** menyatakan strategi Kementerian dalam meningkatkan kawalan ke atas aktiviti pencerobohan pemasangan pukut tunda khasnya di kawasan persisiran pantai Terengganu

JAWAPAN

Tuan Yang Di Pertua,

Untuk makluman Ahli Yang Berhormat, strategi Kementerian Pertanian dan Industri Makanan (MAFI) melalui Jabatan Perikanan Malaysia (DOF) sentiasa komited dalam usaha meningkatkan kawalan ke atas aktiviti pencerobohan pemasangan pukot tunda khasnya di kawasan persisiran pantai Terengganu. Antara strategi yang dilaksanakan adalah :

- i. Meneruskan aktiviti rondaan dan penguatkuasaan dengan kerjasama pelbagai agensi seperti Pasukan Polis Marin dan Agensi Penguatkuasaan Maritim Malaysia (APMM) bagi mengawal aktiviti pencerobohan zon penangkapan ikan terutamanya oleh vesel pukot tunda di kawasan pesisiran pantai;
- ii. Memasang tukun tiruan sebagai penghalang pukot tunda di negeri Terengganu sebagai langkah kawalan yang digunakan untuk menghalang vesel pukot tunda daripada menghampiri kawasan pesisiran pantai; dan
- iii. Menggalak penglibatan nelayan setempat sebagai sumber penyaluran maklumat dan aduan kepada Jabatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI AHMAD BIN HAJI
MASLAN [PONTIAN]**

TARIKH : 11 OKTOBER 2021 (ISNIN)

SOALAN

DATUK SERI HAJI AHMAD BIN HAJI MASLAN minta **MENTERI KANAN PENDIDIKAN** menyatakan cadangan-cadangan untuk membaiki prestasi pelajar yang ketinggalan kerana ketidaksempurnaan pencapaian pelajaran akibat sistem Pengajaran dan Pembelajaran di Rumah (PdPR) bagi anak-anak di semua peringkat pendidikan rendah, menengah, TVET dan pendidikan tinggi.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan

intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

Selain itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu,

kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui *Digital Educational Learning Initiative Malaysia* (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa.

Bagi membantu murid yang tidak mempunyai akses internet atau peranti yang sesuai, guru mengambil inisiatif untuk melaksanakan PdP secara luar talian melalui penggunaan buku teks. Buku aktiviti pula boleh digunakan untuk membuat latihan ulangkaji. Guru menyediakan modul pembelajaran dan membuat serahan bahan tersebut kepada murid. Guru juga mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

Untuk makluman ahli Yang Berhormat, dalam memastikan proses pembelajaran pelajar Program Matrikulasi KPM tidak terjejas, pensyarah Program Matrikulasi KPM sentiasa memberikan perhatian khusus kepada pelajar bagi memastikan semua pelajar dapat mengikuti PdPR tanpa sebarang masalah. Kehadiran pelajar dipantau setiap hari dan mana-mana pelajar yang tidak hadir akan dihubungi. Selain daripada itu, nota dan bahan rujukan yang disediakan oleh pensyarah diberikan kepada pelajar secara dalam talian melalui pelbagai medium seperti aplikasi *Telegram* dan *WhatsApp*. Pensyarah juga melaksanakan sesi PdPR

yang interaktif melalui penggunaan teknologi seperti *augmented reality* (AR) dan aplikasi gamifikasi.

Selain itu, KPM juga melaksanakan pelbagai penyesuaian terhadap kaedah pelaksanaan pembelajaran pelajar di Institut Pendidikan Guru Malaysia (IPGM). IPGM telah mengubah suai struktur dan kaedah pelaksanaan program latihan perguruan berdasarkan kepada cadangan Agensi Kelayakan Malaysia (MQA) sejajar dengan pelaksanaan PdPR. IPGM juga melaksanakan pemantauan berkala melalui Ketua Jabatan dan mendapatkan maklum balas pelajar sepanjang pelaksanaan PdPR bagi memastikan keberkesanan dan tiada pelajar yang ketinggalan dalam pelajaran.

IPGM bersama IPG Kampus di seluruh negara telah menyediakan 337 latihan berkaitan PdPR termasuk Pendidikan Digital sehingga Julai 2021. Latihan-latihan ini boleh dihadiri guru-guru secara dalam talian dan melalui siri bimbingan yang dilaksanakan secara berterusan. Antara contoh latihan adalah kursus-kursus yang memberikan pengetahuan dan kemahiran dalam memanfaatkan alatan dan resos digital dalam PdPR seperti penggunaan *Google Classroom*, *Google Meet*, *Google Sites*, *Youtube*, *Microsoft Teams*, *Padlet*, *Canva*, *Mentimeter*, *Quizizz* dan sebagainya. Kursus-kursus berkaitan PdPR secara dalam talian dan luar talian yang ditawarkan kepada guru-guru menerapkan konsep didik hibur, pembelajaran berasaskan projek, pembelajaran berasaskan masalah dan pembelajaran melibatkan sokongan ibu bapa dan komuniti.

KPM yakin kerangka holistik yang dirancang dan dilaksanakan ini membolehkan murid di semua peringkat mengikuti PdP secara berkesan, seterusnya dapat menangani keciciran murid dan memastikan mereka kekal dalam sistem pendidikan negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 11 OKTOBER 2021 (ISNIN)

SOALAN

DATO' SRI BUNG MOKTAR BIN RADIN [KINABATANGAN] minta **MENTERI PERTANIAN DAN INDUSTRI MAKANAN** menyatakan apakah bantuan-bantuan yang telah dan akan diberikan kepada golongan nelayan, petani dan penternak dalam membantu meringankan beban kewangan mereka yang terjejas sepanjang pelaksanaan Perintah Kawalan Pergerakan.

JAWAPAN

Tuan Yang Di Pertua,

Untuk makluman Ahli Yang Berhormat, Penularan pandemik COVID-19 dan pelaksanaan Perintah Kawalan Pergerakan (PKP) sememangnya telah memberi kesan kepada sektor agromakanan negara secara langsung dan tidak langsung di mana kelancaran rantai makanan terganggu antaranya pengeluaran, pengedaran, pemasaran dan peruncitan produk hasil pertanian dan industri makanan.

Kementerian Pertanian dan Industri Makanan (MAFI) komited dalam memastikan kesinambungan bekalan makanan kekal terjamin dalam apa jua keadaan. Antara langkah-langkah yang telah diambil bagi membantu golongan petani yang terkesan dengan pandemik COVID-19 termasuk pelaksanaan Inisiatif Dana Jaminan Makanan (DJM) berjumlah RM1 bilion bermula pada bulan Mac 2020 yang lalu bertujuan untuk menjamin bekalan

makanan kekal terjamin dan mencukupi, menstabilkan harga produk pertanian serta meluas dan memperkukuh ruang pasaran sepanjang tempoh pandemik COVID-19.

Pelaksanaan DJM ini merangkumi empat (4) fasa pelaksanaan yang telah disesuaikan dengan pelaksanaan pelan pemulihan negara iaitu;

- i) Pakej Ransangan Ekonomi Prihatin Rakyat 2020 **(PRIHATIN 2020) – RM190 juta**
- ii) Pakej Pelan Jana Semula Ekonomi Negara 2020 **(PENJANA 2020) – RM227.32 juta**
- iii) Pakej Pelan Jana Semula Ekonomi Negara 2021 **(PENJANA 2021) – RM150 juta; dan**
- iv) Pakej Inisiatif Dana Jaminan Makanan 2021 **(DJM 2021) – RM338 juta.**

Menjadikan jumlah keseluruhan Dana Jaminan Makanan adalah sebanyak RM 905.3 juta. Penyediaan DJM ini merupakan langkah intervensi untuk membantu pengusaha pertanian dengan segera, serta secara tidak langsung telah menyuntik dana untuk mengaktifkan kembali rantai ekonomi agromakanan bermula daripada pengeluar sehinggalah ke peringkat hiliran dan runcit. Pelaksanaan DJM ini juga merupakan pelengkap kepada pelbagai subsidi, insentif dan bantuan yang disediakan di bawah MAFI kepada golongan sasaran iaitu pesawah, petani, penternak, nelayan dan pengusaha pertanian.

Untuk makluman Ahli Yang Berhormat jua, DJM tidak termasuk pelaksanaan Pakej Rangsangan Ekonomi (PRE) 2020 sebanyak RM50 juta yang merangkumi 918 perolehan dan projek kecil di seluruh negara bagi merangsang perniagaan kontraktor Bumiputera yang terkesan dengan kelembapan ekonomi yang disebabkan oleh kesan awal pandemik COVID-19 pada ketika itu.

Selain daripada bantuan-bantuan dan inisiatif menerusi Dana Jaminan Makanan dan Pakej Rangsangan Ekonomi yang diberikan, MAFI melalui Jabatan dan agensi terlibat membantu kumpulan sasaran yang terkesan disebabkan oleh Perintah Kawalan Pergerakan adalah seperti berikut:

SOALAN NO: 31

- i. Program Bakul Makanan di bawah program MAFI Prihatin yang memberi sumbangan berbentuk makanan bagi meringankan bebanan golongan yang terjejas akibat pandemik COVID 19. Seramai 86,246 penerima di 326 lokasi seluruh negara telah menerima manfaat yang disampaikan melalui pelbagai jabatan dan agensi kementerian pada tahun ini sehingga Julai 2021;
- ii. Sebanyak 35,681 surat kelulusan kebenaran beroperasi telah dikeluarkan semasa tempoh pandemik bagi tempoh Januari hingga Ogos 2021 bagi memastikan pengeluaran hasil dan rantai nilai makanan tidak terjejas memandangkan aktiviti pertanian juga telah dikategorikan sebagai perkhidmatan penting negara (*essential services*) dan dibenarkan beroperasi sepanjang masa;
- iii. Sebanyak 48,281 latihan secara atas talian telah dibuat bagi meningkatkan kemahiran dan khidmat nasihat sama ada melalui panggilan telefon, panggilan video, webinar serta melalui platform media sosial seperti facebook dan aplikasi whatsapp yang melibatkan 50,182 petani dan 436,487 pengunjung melalui media sosial;
- iv. Platform pemasaran digital (e-dagang) bagi membantu meningkatkan peluang pemasaran para petani dan pengusaha melalui platform e-dagang seperti Agrobazaar Online dan NekmatBiz serta kerjasama strategik dengan syarikat swasta seperti Lazada, Shopee dan AirAsia;
- v. Pemberian kadar bayaran sewaan premis kerajaan sebanyak 50% kepada pengusaha di semua kemudahan Ladang Satelit di Taman Kekal Pengeluaran Ruminan (TKPR) dan operator swasta di rumah sembelih serta program;
- vi. Memberikan penangguhan pembaharuan semua lesen vesel penangkapan ikan sehingga 1 Oktober 2021 serta meneruskan pemberian Elaun Sara Hidup Nelayan Laut dan Darat dengan kadar yang telah ditingkatkan;

- vii. Memberikan pengecualian syarat minimum pendaratan ikan melalui Laporan Operasi Vesel (LOV) dan purata keaktifan Mobile Transducer Unit (MTU) untuk pembaharuan lesen vesel penangkapan ikan laut dalam Zon C2; dan
- viii. Program Geran Pemadanan *Change Upgrade Products* (CUP) bagi aktiviti ekonomi hiliran dalam sektor agromakanan yang memanfaatkan seramai 154 orang pengusaha industri asas tani pada tahun 2020 dengan peruntukan bernilai RM4 juta, manakala pada tahun 2021, sehingga kini seramai 141 pengusaha telah menerima manfaat dengan peruntukan bernilai RM4.4 juta.

MAFI berharap agar inisiatif-inisiatif termasuk program dan projek serta bantuan khas yang dilaksanakan dapat membantu para petani, nelayan dan penternak serta pengusaha agromakanan yang terjejas disebabkan COVID-19 pandemik dalam meneruskan kelangsungan perusahaan masing-masing dan memberikan sumber pendapatan yang mampan. MAFI akan terus mengambil segala tindakan bagi memastikan kepentingan kumpulan sasar sektor agromakanan terus terjamin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' WIRA HAJI AMIRUDDIN BIN HAJI
HAMZAH [KUBANG PASU]**

TARIKH : 11 OKTOBER 2021 (ISNIN)

SOALAN

DATO' WIRA HAJI AMIRUDDIN BIN HAJI HAMZAH minta **MENTERI KANAN PENDIDIKAN** menyatakan apakah perancangan jangka masa panjang Kementerian bagi Guru Interim yang berstatus kontrak di bawah Kementerian Pendidikan Malaysia.

JAWAPAN

Tuan Yang di-Pertua,

Kementerian Pendidikan Malaysia telah melaksanakan pengambilan guru secara lantikan *Contract of Service* (CoS) untuk menampung kekosongan guru bagi mata pelajaran yang kritikal terutamanya di sekolah rendah.

Tempoh perkhidmatan sebagai guru lantikan CoS adalah selama dua (2) tahun. Dalam tempoh tersebut, guru tersebut akan ditawarkan untuk mengikuti Program Diploma Pascasiswazah Pendidikan (PDPP) secara mod Kursus Dalam Cuti (KDC) yang dikendalikan oleh Institut Pendidikan Guru Malaysia (IPGM).

Setelah menamatkan PDPP dan memenuhi syarat skim sebagai Pegawai Perkhidmatan Pendidikan (PPP), KPM akan memperakukan nama guru tersebut ke Suruhanjaya Perkhidmatan Pendidikan (SPP) untuk ditemu duga. Guru lantikan kontrak yang berjaya dalam temuduga tersebut akan ditawarkan sebagai Pegawai Perkhidmatan Pendidikan (PPP) Gred DG41 lantikan tetap.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 11 OKTOBER 2021 (ISNIN)

SOALAN

TUAN LUKANISMAN BIN AWANG SAUNI minta **MENTERI KANAN PENDIDIKAN** menyatakan maklumat terkini jumlah pengambilan guru secara *one off* 2021 bagi negeri Sarawak.

JAWAPAN

Tuan Yang di-Pertua,

Pada 20 Jun 2021, Kementerian Pendidikan Malaysia (KPM) telah mengumumkan Pengambilan Khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* bagi mengisi kekosongan guru di sekolah KPM. Urusan pengambilan PPP ini adalah di bawah bidang kuasa Suruhanjaya Perkhidmatan Pendidikan (SPP) selaku Pihak Berkuasa Melantik.

Pengambilan ini adalah untuk mengisi kekosongan guru di sekolah bawah KPM di seluruh negara. Berdasarkan rekod KPM, Sarawak merupakan antara negeri yang mempunyai kekosongan guru yang tertinggi.

Urusan pengambilan guru secara *one off* ini, termasuk untuk negeri Sarawak, telah bermula pada 7 Julai 2021. Pada masa ini, SPP sedang melaksanakan temu duga secara berfasa mulai 8 September 2021 sehingga 12 November 2021. Proses pengambilan ini dijangka selesai pada bulan Disember 2021.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. TUAN FONG KUI LUN
[BUKIT BINTANG]
TARIKH : 11 OKTOBER 2021 (ISNIN)

SOALAN

TUAN FONG KUI LUN [BUKIT BINTANG] minta **MENTERI KEWANGAN** menyatakan umlah peminjam bank yang menerima moratorium bagi pinjaman mereka, jumlah amaun terlibat setakat ini.

JAWAPAN

Tuan Yang Di-Pertua,

1. Kerajaan telah memberikan kemudahan moratorium secara menyeluruh ke atas pinjaman bank sebagai sebahagian daripada langkah bantuan bagi Pakej Rangsangan Ekonomi Prihatin Rakyat (atau PRIHATIN), PEMERKASA Tambahan dan PEMULIH untuk membantu meringankan beban kewangan rakyat dan perniagaan yang terkesan dengan krisis pandemik COVID-19.

2. Sehingga 10 September 2021, nilai pinjaman terkumpul yang menerima bantuan moratorium dianggar berjumlah 469.4 bilion ringgit, dengan 105.9 bilion ringgit kepada PKS dan 363.5 bilion ringgit kepada peminjam individu. Seramai 2.7 juta peminjam telah menikmati kemudahan ini, yang terdiri daripada 2.6 juta peminjam individu dan 86,000 PKS.

3. Setakat Julai 2021, kadar kelulusan bantuan moratorium berkenaan kepada peminjam adalah sebanyak 99 peratus. Peminjam hanya perlu menghubungi bank masing-masing untuk membuat permohonan bantuan bayaran balik pinjaman dan kelulusan akan diberikan secara automatik kepada peminjam yang layak tanpa perlu mengemukakan bukti kelayakan atau dokumen sokongan.

Tuan Yang Di-Pertua,

4. Bagi semua pinjaman yang mendapat bantuan moratorium, pihak bank telah bersetuju untuk tidak mengkompauun faedah, iaitu tidak mengenakan faedah atas faedah, atau mengenakan faedah penalti dalam tempoh moratorium selama 6 bulan bagi semua produk pinjaman.

5. Dengan bank terus meluluskan hampir kesemua permohonan bantuan bayaran balik pinjaman, Kerajaan juga ingin menekankan bahawa bantuan bayaran balik pinjaman terus disediakan kepada mereka yang terjejas. Permohonan masih dibuka kepada peminjam yang memerlukan dan mereka hanya perlu menghubungi bank masing-masing.

6. Bagi peminjam yang menghadapi situasi yang lebih mencabar atau mereka yang mempunyai pinjaman di beberapa bank, mereka boleh merujuk kepada Agensi Kaunseling dan Pengurusan Kredit (atau AKPK) bagi mendapatkan khidmat nasihat mengenai bayaran balik pinjaman.

7. Sekiranya peminjam menghadapi kesukaran semasa berurusan dengan pihak bank atau permohonan bantuan bayaran balik pinjaman ditolak, mereka boleh menghubungi Bank Negara Malaysia secara terus melalui BNM TELELINK. Sebagai makluman, jumlah aduan yang diterima melalui BNM TELELINK adalah pada kadar yang agak antara bulan Jun hingga Ogos 2021, iaitu 0.46 peratus daripada jumlah permohonan yang diluluskan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 11 OKTOBER 2021 (ISNIN)

SOALAN

DATUK DR. HASAN BIN BAHROM minta **MENTERI KANAN PENDIDIKAN** menyatakan sejauh mana Kementerian cakna keciciran pembelajaran murid luar bandar semasa pandemik dan bagaimana Kementerian menangani masalah tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan

murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

Selain itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirancang dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui Digital Educational Learning Initiative Malaysia (DELIMa). Pelantar ini merupakan pusat rujukan sehenti yang mengandungi pelbagai aplikasi,

perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELiMa.

Bagi membantu murid yang tidak mempunyai akses internet atau peranti yang sesuai, guru mengambil inisiatif untuk melaksanakan PdP secara luar talian melalui penggunaan buku teks. Buku aktiviti pula boleh digunakan untuk membuat latihan ulangkaji. Guru menyediakan modul pembelajaran dan membuat serahan bahan tersebut kepada murid. Guru juga mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

Untuk makluman Ahli Yang Berhormat, KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM yakin kerangka holistik yang dirancang dan dilaksanakan ini membolehkan murid mengikuti PdP secara berkesan, seterusnya dapat menangani keciciran murid dan memastikan mereka kekal dalam sistem pendidikan negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 11 OKTOBER 2021 (ISNIN)

SOALAN

TUAN WONG LING BIU minta **MENTERI KANAN PENDIDIKAN** menyatakan berapa peratus bukan Bumiputera telah dipilih memasuki pengajian Matrikulasi pada 5 tahun yang lepas.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah menetapkan bahawa 10 peratus tempat dalam Program Matrikulasi Kementerian Pendidikan Malaysia adalah kepada pelajar bukan bumiputera mulai tahun 2002. Kuota pengambilan tersebut masih dikekalkan sehingga kini. Sebanyak 10 peratus daripada keseluruhan tempat dalam Program Matrikulasi telah ditawarkan kepada pelajar bukan bumiputera yang terpilih bagi setiap tahun sepanjang 5 tahun yang lepas.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. DATUK ZAKARIA BIN MOHD
EDRIS@TUBAU [LIBARAN]
TARIKH : 11 OKTOBER 2021 (ISNIN)

SOALAN

DATUK ZAKARIA BIN MOHD EDRIS@TUBAU [LIBARAN] minta **MENTERI KEWANGAN** menyatakan apakah status ekonomi dan kedudukan kewangan negara Malaysia akibat penularan pandemik COVID-19.

JAWAPAN

Tuan Yang di-Pertua,

1. Kemelesetan ekonomi dan perdagangan dunia pada tahun 2020 berikutan penularan wabak COVID-19 merupakan krisis yang terburuk sejak era, dengan izin, *the Great Depression* pada tahun 1930an. Sebagai sebuah ekonomi terbuka, ekonomi Malaysia turut terjejas dengan Keluaran Dalam Negeri Kasar benar menguncup sebanyak 5.6 peratus pada tahun 2020 disebabkan oleh langkah pembendungan yang ketat bagi mengawal pandemik COVID-19.

2. Sehubungan itu, Kerajaan telah dan sedang melaksanakan pelbagai inisiatif bagi memulihkan ekonomi yang terjejas akibat pandemik COVID-19 di samping melindungi nyawa dan kehidupan rakyat. Antara inisiatif utama untuk terus menyokong sektor yang terkesan dan merencanakan semula aktiviti ekonomi adalah melalui :

- Pertamanya, pelaksanaan strategi 6R yang sistematik dan menyeluruh bagi menangani krisis, iaitu dengan izin, *Resolve, Resilience, Restart, Recovery, Revitalise* dan *Reform.*;
- Keduanya, pelaksanaan sejumlah lapan pakej bantuan rangsangan ekonomi dan bantuan yang komprehensif bernilai 530 bilion ringgit sejak bulan Mac tahun 2020 (2020: RM305 bilion; 2021: RM225 bilion);
- Ketiga, inisiatif-inisiatif dalam Belanjawan 2021 dengan peruntukan berjumlah 322.5 bilion ringgit yang sedang berlangsung; dan
- Terakhirnya, pelaksanaan Pelan Pemulihan Negara (atau PPN) yang merupakan strategi peralihan keluar secara berfasa dan selamat daripada kemelut penularan COVID-19 susulan peningkatan kes mendadak yang mengancam sistem kesihatan awam.

3. Berikutan pelaksanaan pelbagai pakej, pelan dan langkah berkenaan, trend pemulihan ekonomi telah dapat dilihat di mana ekonomi negara telah berkembang sebanyak 7.1 peratus pada separuh pertama tahun 2021 berbanding penguncupan sebanyak 8.4 peratus pada tempoh

yang sama tahun 2020. Namun, pelaksanaan semula langkah pembendungan pandemik yang lebih ketat mulai Mei 2021 susulan ancaman varian baharu COVID-19 telah menjejaskan momentum pertumbuhan ekonomi pada tahun 2021. Justeru, unjuran pertumbuhan ekonomi tahun 2021 telah disemak semula pada bulan Ogos 2021 kepada antara 3 hingga 4 peratus, iaitu lebih rendah berbanding anggaran awal pada bulan Mac 2021 antara 6 hingga 7.5 peratus.

4. Semakan semula rasmi tersebut juga adalah berdasarkan andaian pembukaan semula sektor ekonomi dan sosial pada suku keempat 2021 berikutan kemajuan dan keberkesanan pelaksanaan program imunisasi COVID-19 yang memberangsangkan. Jangkaan pencapaian imuniti kelompok pada suku keempat 2021 berdasarkan kemajuan kadar vaksinasi terkini serta pembukaan semula sektor ekonomi secara berperingkat sepanjang fasa PPN akan turut mendorong sentimen positif dalam kalangan perniagaan dan pengguna.

5. Kini, sebahagian besar kes positif COVID-19 tidak bergejala atau bergejala ringan dan kadar kemasukan hospital bagi kes COVID-19 juga telah menurun. Pelaksanaan pelbagai pakej rangsangan, bantuan ekonomi, plan pemulihan dan langkah Bajet 2021 yang berterusan serta disokong oleh pemulihan ekonomi dan perdagangan global dijangka membantu mengekalkan momentum pertumbuhan KDNK sehingga tahun 2022.

6. Walau bagaimanapun, Kerajaan akan terus memantau perkembangan ekonomi global dan domestik terkini dengan teliti bagi mengenal pasti sebarang risiko yang boleh menjejaskan prospek pertumbuhan KDNK negara pada tahun 2021. Sekiranya terdapat keperluan untuk menyemak semula unjuran antara 3 hingga 4 peratus tersebut, Kerajaan akan mengumumkan unjuran terkini semasa pembentangan Bajet 2022 pada bulan Oktober 2021 kelak.

Tuan Yang di-Pertua,

7. Dalam Belanjawan 2021, defisit fiskal tahun 2021 telah diunjurkan sebanyak 5.4 peratus berbanding KDNK berdasarkan jangkaan ekonomi

akan berkembang antara 6.5 hingga 7.5 peratus. Walau bagaimanapun, bagi membendung gelombang ketiga penularan COVID-19, Kerajaan telah melaksanakan semula Perintah Kawalan Pergerakan (atau PKP). Pelaksanaan PKP bukan sahaja memberi kesan kepada kehidupan rakyat, malah dijangka turut mempengaruhi pertumbuhan ekonomi dan kutipan hasil Kerajaan. Berdasarkan semakan semula kadar pertumbuhan ekonomi kepada antara 3 hingga 4 peratus pada bulan Ogos 2021, paras defisit fiskal 2021 dijangka akan meningkat kepada sekitar 6.5 hingga 7 peratus daripada KDNK.

8. Bagi mengurangkan impak pengurangan hasil dan keperluan perbelanjaan tambahan, Kerajaan akan melaksanakan langkah rasionalisasi perbelanjaan dan mengenal pasti sumber hasil tambahan dalam ekosistem Kerajaan. Pada masa ini, keutamaan Kerajaan adalah melindungi rakyat daripada ancaman COVID-19 selain memastikan prospek pertumbuhan ekonomi kekal kukuh dalam jangka sederhana dan panjang, disokong oleh PPN serta pengurusan kewangan yang berhemat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 11 OKTOBER 2021 (ISNIN)

SOALAN

PUAN WONG SHU QI minta **MENTERI KANAN PENDIDIKAN** menyatakan apakah status pengagihan 150,000 unit laptop di bawah inisiatif CERDIK sehingga kini serta jumlah diterima oleh setiap negeri dan kawasan Parlimen.

JAWAPAN

Tuan Yang di-Pertua,

Untuk makluman Ahli Yang Berhormat, inisiatif Tabung CERDIK seperti yang diluluskan dalam Belanjawan 2021 adalah satu inisiatif pemberian peranti digital lengkap dengan pelan data kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC) bertujuan menyediakan peranti digital kepada murid B40 yang dikenal pasti.

Yayasan Hasanah menguruskan sumbangan peranti digital dan pelan data daripada GLC dan GLIC serta menyelaras penghantaran peranti digital berkenaan ke Pejabat Pendidikan Daerah (PPD), Kementerian Pendidikan Malaysia (KPM).

Peranti digital yang diterima oleh KPM akan terus diagihkan kepada murid B40 yang telah dikenal pasti. Sehingga 9 Oktober 2021, sebanyak 137,987 unit peranti digital telah diserahkan kepada murid B40 di 1,169 sekolah seluruh negara. Manakala, 6,387 unit telah diterima daripada Yayasan Hasanah dan akan diagihkan kepada murid dalam masa terdekat. Baki 5,626 unit lagi akan diagihkan sebaik sahaja diterima daripada Yayasan Hasanah.

Senarai agihan peranti digital CERDIK mengikut negeri seperti berikut:

NEGERI	BIL. PERANTI	BIL. SEKOLAH
JOHOR	14,336	136
KEDAH	8,696	69
KELANTAN	7,659	74
MELAKA	2,848	27
NEGERI SEMBILAN	4,983	57
PAHANG	9,857	117
PERAK	10,278	109
PERLIS	1,525	16

NEGERI	BIL. PERANTI	BIL. SEKOLAH
PULAU PINANG	3,536	25
SABAH	22,588	175
SARAWAK	24,689	192
SELANGOR	17,058	79
TERENGGANU	6,634	65
WP KUALA LUMPUR	2,351	18
WP LABUAN	677	5
WP PUTRAJAYA	272	5
JUMLAH	137,987	1169

Senarai agihan peranti digital CERDIK mengikut kawasan parlimen seperti berikut:

NEGERI - PARLIMEN	BIL. PERANTI	BIL. SEKOLAH
JOHOR	14,336	136
AYER HITAM	328	2
BAKRI	483	5
BATU PAHAT	182	4
ISKANDAR PUTERI	901	7
KLUANG	349	2
KOTA TINGGI	889	10
KULAI	558	4
LABIS	463	6
LEDANG	540	5
MERSING	844	9
MUAR	195	2
PAGOH	737	17
PARIT SULONG	665	4
PASIR GUDANG	261	1
PENGERANG	844	10
PONTIAN	439	4
PULAI	504	2
SEGAMAT	415	5
SEKIJANG	566	5

NEGERI - PARLIMEN	BIL. PERANTI	BIL. SEKOLAH
SEMBRONG	316	4
SIMPANG RENGAM	578	6
SRI GADING	378	3
TANJUNG PIAI	652	7
TEBRAU	1,716	8
TENGGARA	533	4
KEDAH	8,696	69
ALOR SETAR	24	1
BALING	615	6
JERAI	48	1
JERLUN	169	2
KUALA KEDAH	432	3
KUBANG PASU	596	5
KULIM-BANDAR BAHARU	200	4
LANGKAWI	1,136	8
MERBOK	636	2
PADANG SERAI	1,590	7
PADANG TERAP	889	9
PENDANG	737	7
POKOK SENA	73	2
SIK	667	8
SUNGAI PETANI	884	4
KELANTAN	7,659	74
BACHOK	279	2
GUA MUSANG	1,497	15
JELI	919	13
KOTA BHARU	175	1
KUALA KRAI	903	13
KUBANG KERIAN	167	1
MACHANG	158	1
PASIR MAS	335	2
PASIR PUTEH	605	5
PENKALAN CHEPA	340	2
RANTAU PANJANG	420	4
TANAH MERAH	729	7

NEGERI - PARLIMEN	BIL. PERANTI	BIL. SEKOLAH
TUMPAT	1,132	8
MELAKA	2,848	27
ALOR GAJAH	1,015	13
HANG TUAH JAYA	335	2
JASIN	528	5
MASJID TANAH	389	4
TANGGA BATU	581	3
NEGERI SEMBILAN	4,983	57
JELEBU	392	5
JEMPOL	1,062	14
KUALA PILAH	499	9
PORT DICKSON	993	11
REMBAU	895	9
SEREMBAN	758	5
TAMPIN	384	4
PAHANG	9,857	117
BENTONG	637	8
BERA	971	12
CAMERON HIGHLANDS	662	9
INDERA MAHKOTA	910	7
JERANTUT	922	11
KUALA KRAU	523	6
KUANTAN	245	1
LIPIS	522	8
MARAN	383	5
PAYA BESAR	474	7
PEKAN	1,342	14
RAUB	227	5
ROMPIN	1,123	14
TEMERLOH	916	10
PERAK	10,278	109
BAGAN DATUK	591	9
BAGAN SERAI	478	5
BATU GAJAH	777	5
BERUAS	329	5

NEGERI - PARLIMEN	BIL. PERANTI	BIL. SEKOLAH
BUKIT GANTANG	518	6
GERIK	671	6
GOPENG	375	4
KAMPAR	252	3
KUALA KANGSAR	325	4
LARUT	185	3
LENGGONG	356	5
LUMUT	800	5
PADANG RENGAS	208	3
PARIT	467	5
PARIT BUNTAR	600	4
PASIR SALAK	1,013	11
SUNGAI SIPUT	626	7
TAIPING	293	3
TAMBUN	637	5
TANJONG MALIM	340	5
TAPAH	300	3
TELUK INTAN	137	3
PERLIS	1,525	16
KANGAR	695	6
PADANG BESAR	830	10
PULAU PINANG	3,536	25
BAGAN	277	2
BALIK PULAU	371	5
BATU KAWAN	561	3
BAYAN BARU	377	2
BUKIT GELUGOR	394	3
BUKIT MERTA JAM	432	2
JELUTONG	271	1
KEPALA BATAS	144	2
NIBONG TEBAL	125	1
PERMATANG PAUH	247	2
TASEK GELUGOR	337	2
SABAH	22,588	175
BEAUFORT	942	15

NEGERI - PARLIMEN	BIL. PERANTI	BIL. SEKOLAH
BELURAN	934	7
KALABAKAN	521	3
KENINGAU	1,814	17
KIMANIS	778	19
KINABATANGAN	1,077	9
KOTA BELUD	1,576	13
KOTA MARUDU	799	5
KUDAT	1,199	11
LIBARAN	297	3
PAPAR	1,342	9
PENAMPANG	417	2
PENSIANGAN	857	4
PUTATAN	1,132	6
RANAU	1,318	10
SANDAKAN	213	1
SEMPORNA	913	4
SEPANGGAR	1,370	6
SILAM	2,339	12
SIPITANG	93	2
TAWAU	518	2
TENOM	694	6
TUARAN	1,445	9
SARAWAK	24,689	192
BANDAR KUCHING	92	1
BARAM	522	5
BATANG LUPAR	824	7
BATANG SADONG	502	6
BETONG	745	7
BINTULU	1,787	8
HULU RAJANG	499	5
IGAN	481	5
JULAU	337	4
KANOWIT	544	6
KAPIT	1,463	12
KOTA SAMARAHAN	2,150	10

NEGERI - PARLIMEN	BIL. PERANTI	BIL. SEKOLAH
LANANG	1,016	4
LAWAS	577	7
LIMBANG	783	7
LUBOK ANTU	533	5
MAS GADING	833	8
MIRI	1,194	4
MUKAH	977	11
PETRA JAYA	477	3
PUNCAK BORNEO	1,063	5
SANTUBONG	889	8
SARATOK	873	8
SARIKEI	1,026	9
SELANGAU	817	6
SERIAN	758	5
SIBU	289	3
SIBUTI	949	7
SRI AMAN	1,128	10
STAMPIN	132	1
TANJONG MANIS	429	5
SELANGOR	17,058	79
BANGI	1,225	4
DAMANSARA	639	3
GOMBAK	347	1
HULU LANGAT	799	4
HULU SELANGOR	1,585	8
KAPAR	1,738	6
KLANG	257	1
KOTA RAJA	966	3
KUALA LANGAT	1,631	7
KUALA SELANGOR	1,034	5
PETALING JAYA	413	2
PUCHONG	794	3
SABAK BERNAM	585	5
SELAYANG	490	2
SEPANG	1,637	9

NEGERI - PARLIMEN	BIL. PERANTI	BIL. SEKOLAH
SHAH ALAM	197	1
SUBANG	307	1
SUNGAI BESAR	632	6
SUNGAI BULOH	1,617	6
TANJONG KARANG	165	2
TERENGGANU	6,634	65
BESUT	778	6
DUNGUN	985	11
HULU TERENGGANU	346	5
KEMAMAN	1,804	17
KUALA NERUS	367	3
MARANG	1,283	10
SETIU	1,071	13
WP KUALA LUMPUR	2,351	18
BANDAR TUN RAZAK	645	4
BATU	277	2
BUKIT BINTANG	12	1
KEPONG	551	3
LEMBAH PANTAI	336	2
SEGAMBUT	60	2
SETIAWANGSA	225	2
WANGSA MAJU	245	2
WP LABUAN	677	5
LABUAN	677	5
WP PUTRAJAYA	272	5
PUTRAJAYA	272	5
JUMLAH	137,987	1,169

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 11 OKTOBER 2021 (ISNIN)

SOALAN

DATO' SRI RICHARD RIOT ANAK JAEM minta **MENTERI PENDIDIKAN** menyatakan bilakah Kementerian akan menyalurkan peruntukan yang diluluskan terdahulu dan mohon peruntukan tambahan untuk membina semula sekolah- sekolah daif di seluruh negeri Sarawak.

JAWAPAN

Tuan Yang di-Pertua,

Sepanjang pelaksanaan Rancangan Malaysia Ke-11 (RMKe-11) iaitu bagi tahun 2016 sehingga 2020 dan Rancangan Malaysia ke-12 *Rolling Plan* 1 (RP 1) tahun 2021, Kementerian Pendidikan Malaysia (KPM) telah diluluskan sebanyak 352 projek untuk naiktaraf dan pembangunan semula sekolah yang mempunyai bangunan daif di negeri Sarawak dengan kos berjumlah RM2.169 bilion. Sehingga 27 September 2021, sebanyak 178 projek telah siap, 64 projek masih dalam fasa pembinaan dan 110 projek berada di dalam fasa pra bina.

Berdasarkan kepada prestasi pelaksanaan, sehingga 27 September 2021, sejumlah RM686 juta telah dibelanjakan. Manakala keperluan peruntukan bagi membiayai projek dalam pelaksanaan dan pra bina akan disediakan berdasarkan kepada prestasi semasa projek dan unjuran keperluan oleh agensi pelaksana. Peruntukan bagi pelaksanaan projek ini akan disalurkan secara berperingkat oleh KPM kepada Jabatan Kerja Raya (JKR) Negeri Sarawak selaras dengan keperluan dan unjuran yang disediakan.

Untuk makluman Ahli Yang Berhormat, keutamaan KPM adalah terhadap sekolah-sekolah yang mempunyai bangunan daif pada skala 6 dan skala 7. Bangunan-bangunan daif ini akan dibaik pulih, dinaik taraf atau dibina bangunan gantian. Sehubungan itu, KPM akan mengemukakan cadangan pembinaan sekolah-sekolah tersebut kepada pihak agensi pusat untuk dipertimbangkan dalam Rancangan Malaysia Ke-12. Walau bagaimanapun kelulusan dan pelaksanaan projek ini adalah tertakluk kepada kedudukan kewangan semasa kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 11 OKTOBER 2021 (ISNIN)

SOALAN

TUAN KESAVAN A/L SUBRAMANIAM minta **MENTERI PENDIDIKAN** menyatakan status terkini bangunan baru SJK (T) Ladang Sungai Reyla yang masih belum disiapkan sepenuhnya.

JAWAPAN

Tuan Yang di-Pertua,

Projek pembinaan Sekolah Jenis Kebangsaan Tamil (SJKT) Sungai Reyla, Sungai Siput, Perak yang dilaksanakan secara Reka dan Bina ini telah dikeluarkan Surat Setuju Terima (SST) pada 28 Mei 2014. Tarikh Milik Tapak adalah pada 28 Jun 2014 dan Tarikh Siap Asal adalah pada 26 Jun 2016. Bagaimanapun, projek ini telah diluluskan Lanjutan Tempoh Masa (EOT) sebanyak 204 hari menjadikan tarikh siap baharu projek adalah pada 18 Januari 2017. Namun begitu, sehingga ke tarikh tersebut projek ini tidak dapat disiapkan sepenuhnya.

Berdasarkan laporan kemajuan, situasi semasa dan status terkini projek, kontraktor gagal dalam memenuhi tanggungjawab dan menyiapkan projek seperti yang telah ditetapkan di dalam dokumen kontrak secara Reka & Bina JKR. Antara punca kelewatan penyiapan projek ini adalah disebabkan kegagalan kontraktor menyiapkan baki kerja seperti kerja bekalan elektrik, kerja-kerja penurapan jalan dan pematuhan syarat-syarat Kebenaran Merancang (KM) daripada Pihak Berkuasa Tempatan (PBT).

Kementerian Pendidikan Malaysia (KPM) telah memastikan segala tanggungjawab Kementerian serta tuntutan bayaran kepada kontraktor seperti di dalam Dokumen Kontrak telah dilunaskan.

KPM berpandangan sekiranya pihak kontraktor masih gagal dalam menyempurnakan baki kerja yang ada dan gagal memenuhi syarat-syarat di dalam dokumen kontrak, tindakan penamatan kontrak akan diambil.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHE ALIAS BIN HAMID [KEMAMAN]

TARIKH : 11 OKTOBER 2021 (ISNIN)

SOALAN

TUAN CHE ALIAS BIN HAMID [KEMAMAN] minta **MENTERI PELANCONGAN, SENI DAN BUDAYA** menyatakan langkah panjang bagi memulihkan sektor pelancongan negara terutamanya pemain industri pelancongan di Terengganu yang terjejas teruk selain bantuan yang dikemukakan dalam pakej bantuan PEMULIH.

JAWAPAN

Tuan Yang di-Pertua,

1. Pandemik COVID-19 telah menjejaskan keseluruhan ekosistem pelancongan negara dan merencatkan pertumbuhannya sehingga industri ini berhadapan dengan saat-saat yang paling mencabar. Sebagai industri yang berorientasikan mobiliti, pelancongan adalah salah satu sektor ekonomi yang paling teruk terkesan. Justeru, rancangan pemulihan pelancongan yang efektif adalah kritikal dalam mencari keseimbangan antara kepentingan ekonomi dan kesihatan awam.
2. MOTAC melalui agensinya Tourism Malaysia secara berperingkat mempergiatkan program promosi domestik dan luar negeri bagi merancakkan dan menggalakkan semula aktiviti pelancongan negara. Salah satu strategi dalam menyampaikan maklumat pelancongan serta berkongsi pandangan dalam menyesuaikan elemen pelancongan di bawah norma baru. Antaranya melalui penyertaan pameran, seminar, jerayawara secara maya di peringkat antarabangsa untuk mewujudkan kesedaran ("*creating awareness*") bahawa Malaysia adalah destinasi pelancongan dan percutian yang selamat serta menyatakan kesediaan Malaysia dalam menerima pelancong antarabangsa apabila pintu sempadan dibuka kelak.
3. MOTAC turut menyokong inisiatif Kerajaan dalam menggalakkan rakyat Malaysia mendaftar pengambilan vaksin melalui Kempen Promosi *Rindu Melancong? Jom Vaksin Dulu!* yang giat dipromosikan agar misi Kerajaan dalam mencapai imunisasi kelompok dapat dicapai dengan segera dan sekaligus boleh mempercepatkan sektor pelancongan negara untuk kembali aktif.

NO. SOALAN : 41

4. Selain itu, Kerajaan telah menyediakan pelbagai bantuan bagi meringankan kepayahan penggiat industri pelancongan melalui pakej-pakej ransangan ekonomi yang telah diumumkan seperti PEMERKASA dan PEMULIH. Antaranya ialah Geran Bantuan Khas Secara *One-Off* kepada penggiat-penggiat industri seperti syarikat pengendalian pelancongan berlesen dengan MOTAC, ejen MM2H, pemandu pelancong, pengendali inap desa di bawah Program Pengalaman Homestay Malaysia MOTAC serta pengusaha Spa dan Pusat Urutan Kaki yang berdaftar dengan MOTAC.

5. Antara contoh bantuan lain yang turut diberikan adalah seperti:

- (i) pelanjutan diskaun bil elektrik kepada penggiat industri
- (ii) pengecualian cukai pelancongan dan cukai perkhidmatan kepada pengusaha hotel sehingga 31 Disember 2021; dan
- (iii) Skim Subsidi Upah.

6. Di samping itu, MOTAC sendiri turut telah melaksanakan inisiatif-inisiatif bukan kewangan untuk membantu syarikat pengendali pelancongan. Antaranya dengan memberi beberapa kelonggaran kepada syarikat pengendali pelancongan bagi membantu penggiat industri pelancongan seperti Kelonggaran Berkaitan Kompaun, Pengecualian Fi Kepada Pengusaha Pelancongan dan Kelonggaran Syarat Lesen Kepada Pengusaha Pelancongan. Semua bantuan ini telah memberi manfaat kepada 5,340 syarikat pengendali pelancongan yang berlesen di bawah MOTAC.

7. Bagi membolehkan industri pelancongan kembali bangkit, MOTAC, melalui beberapa siri perbincangan bersama penggiat industri pelancongan, telah merangka Pelan Pemulihan Pelancongan berpaksikan Dasar Pelancongan Negara 2020-2030 yang memberi tumpuan kepada pelbagai strategi seperti:

- (i) merencanakan semula pelancongan domestik;

NO. SOALAN : 41

- (ii) mengembalikan keyakinan awam untuk melancong sambil menyesuaikan diri dengan norma baharu;
- (iii) memberi keutamaan kepada digitalisasi proses perniagaan menerusi aplikasi teknologi tanpa sentuhan yang selamat dan lancar;
- (iv) meningkatkan kemahiran penggiat industri menerusi program pemahiran semula atau *reskilling and upskilling* yang berterusan demi meningkatkan kapasiti dan kredibiliti profesion pelancongan dalam norma baharu;
- (v) mempromosikan pembangunan pelancongan lestari dengan menyusun semula usaha untuk memulihara dan memelihara alam sekitar;
- (vi) memperkukuhkan kerjasama awam-swasta terutama dalam mencipta semula produk pelancongan, seni dan budaya agar lebih menarik dan inovatif; dan
- (vii) meneroka potensi dan peluang pelaksanaan gelembung pelancongan antarabangsa yang kreatif untuk memulakan semula aktiviti pelancongan antarabangsa.

8. Selain itu, segmen ekopelancongan menjadi salah satu fokus dalam merencanakan pelancongan domestik selaras dengan Pelan Ekopelancongan Kebangsaan (NEP) 2.0 2020 – 2030 yang mempunyai strategi-strategi dan plan tindakan bagi memastikan kelestarian produk ekopelancongan kekal mampan.

9. Bagi negeri Terengganu, NEP 2.0 telah mengenalpasti 7 kluster ekopelancongan yang berpotensi untuk dibangunkan iaitu:

- (i) Kampung Raja - Besut - Pulau Perhentian – Jerleh;
- (ii) Setiu - Merang – Penarik;
- (iii) Ajil - Kuala Berang - Tasik Kenyir;
- (iv) Kuala Terengganu - Kuala Nerus;
- (v) Marang - Pulau Kapas;
- (vi) Dungun - Rantau Abang - Al-Muktafi Billah Shah - Pulau Tenggol;
dan
- (vii) Kemaman - Kijal - Chukai – Kerteh.

10. Kesemua kluster ekopelancongan ini akan dipantau oleh *Destination Coordination Group* yang diterajui oleh Exco Pelancongan Negeri yang bertanggungjawab merancang serta melaksanakan pembangunan produk ekopelancongan secara holistik merangkumi pelancongan berasaskan komuniti atau *community based tourism* yang memberi manfaat kepada kesejahteraan komuniti setempat dan penjana ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB PUAN HAJAH FUZIAH BINTI SALLEH
[KUANTAN]**

TARIKH : 11 OKTOBER 2021 (ISNIN)

SOALAN

YB PUAN HAJAH FUZIAH BINTI SALLEH [KUANTAN] minta **MENTERI TENAGA DAN SUMBER ASLI** menyatakan mengenai SOP untuk industri perlombongan bauksit. Sama ada sudah dibuat satu kajian dalam bentuk projek rintis untuk keberkesanan SOP tersebut. Sekiranya sudah apakah dapatan dari kajian tersebut.

JAWAPAN

Tuan Yang di-Pertua,

1. Kementerian Tenaga dan Sumber Asli dengan kerjasama Jabatan Mineral dan Geosains (JMG), Pejabat Pengarah Tanah dan Galian (PTG) Negeri Pahang dan beberapa jabatan Persekutuan lain telah menyediakan Prosedur Operasi Standard (SOP) Aktiviti Perlombongan dan Pengeksportan Bauksit. SOP ini telah dikuatkuasakan pada 5 September 2019 bagi Negeri Pahang. Negeri Terengganu juga telah menguatkuasakan SOP Bauksit Terengganu pada 19 Mac 2020 dan diikuti oleh Negeri Johor pada 1 November 2020.

2. SOP ini melibatkan prosedur-prosedur utama untuk menjalankan aktiviti perlombongan dan pengeksportan bauksit seperti keluasan minimum tapak perlombongan, kaedah pengangkutan, tapak penyimpanan stokpil, pemprosesan, pengeksportan dan lain-lain.

3. Bagi menguji keberkesanan SOP ini, Pihak Berkuasa Negeri Pahang melalui Jawatankuasa Pemantauan Lombong Negeri Pahang telah menetapkan tempoh perintis di kawasan Gebeng mulai 1 Jun 2020 sehingga 30 November 2020 yang kemudiannya dilanjutkan sehingga 31 Mei 2021.

4. JMG Pahang telah menjalankan audit penilaian pematuhan SOP terhadap lombong-lombong yang telah diluluskan operasi bermula daripada 5 Julai 2021. Walau bagaimanapun, pengauditan penuh tidak dapat dijalankan kerana:

- a) penguatkuasaan beberapa siri Perintah Kawalan Pergerakan (PKP) dan Perintah Kawalan Pergerakan Diperketatkan (PKPD) yang ditetapkan oleh Kerajaan; dan
- b) hanya 2 tapak lombong dari 7 tapak lombong yang mendapat kebenaran beroperasi daripada JMG dan Pihak Berkuasa Negeri sedang beroperasi sepanjang tempoh pengauditan.

5. Kementerian melalui JMG akan melengkapkan pengauditan bagi meneliti keupayaan pematuhan terhadap prosedur-prosedur di dalam SOP ini oleh semua pihak yang berkaitan di peringkat pihak berkuasa dan juga penggiat industri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD KADIR
[SETIU]**

TARIKH : 11 OKTOBER 2021 (ISNIN)

SOALAN

**TUAN SHAHARIZUKIRNAIN BIN ABD KADIR [SETIU] minta
MENTERI PERTANIAN DAN INDUSTRI MAKANAN menyatakan**
sejauh mana pelaksanaan SMART Sawah Berskala Besar tidak akan
menjejaskan hak-hak petani memandangkan pemegang taruh
majoritinya daripada syarikat swasta dan korporat.

JAWAPAN

Tuan Yang Di Pertua,

Untuk makluman Ahli Yang Berhormat, Program SMART Sawah Berskala Besar atau lebih dikenali sebagai SMART SBB adalah satu inisiatif baharu Kementerian Pertanian dan Industri Makanan (MAFI) bertujuan untuk meningkatkan produktiviti pengeluaran padi dan beras negara. Dalam masa yang sama, program ini bermatlamat untuk meningkatkan pendapatan pesawah padi dengan penglibatan pemain industri secara langsung dalam rantai penanaman padi dan pengeluaran beras.

Secara khususnya, tujuan utama pelaksanaan SMART SBB adalah seperti berikut:

- i. Meningkatkan hasil padi domestik menerusi penglibatan pihak swasta yang telah sedia terlibat dalam industri menerusi pelaburan modal, kepakaran dan keupayaan teknologi yang dimiliki oleh mereka. Peningkatan hasil dan produktiviti padi tempatan ini penting bagi memperkukuhkan sekuriti bekalan makanan dan tahap sara diri negara terhadap beras, lebih-lebih lagi dalam keadaan negara berhadapan dengan pengecutan kawasan bertanam padi saban tahun. Program SMART SBB menyasarkan peningkatan purata hasil padi negara kepada 7.0 tan metrik sehektar dalam tempoh berakhirnya Rancangan Malaysia ke-12 (RMKe12) berbanding purata hasil semasa sekitar 3.5 hingga 4.3 tan metrik sehektar yang akan membantu pencapaian Tahap Sara Diri (SSL) beras negara kepada 75% menjelang tahun 2025 atau sebelum berakhirnya RMKe12;
- ii. Mengoptimumkan penggunaan sumber menerusi penyatuan pengurusan sawah dan memodenkan aktiviti penanaman padi menerusi penggunaan teknologi dan mekanisasi terkini. Hal sedemikian kerana penggembelengan sumber lebih

mudah dilakukan menerusi satu pengurusan manakala kos-kos tambahan akan diserap oleh syarikat peneraju; dan

- iii. Meningkatkan pendapatan pesawah yang sebahagian besarnya masih berada di bawah kategori B40 berikutan masih mengusahakan tanah sawah secara individu dan bersaiz tidak ekonomik iaitu kurang daripada 2 hektar. Penglibatan di dalam program ini akan membantu mereka menjana pendapatan tambahan menerusi peningkatan hasil serta pengurangan kos pengeluaran.

Terdapat tiga (3) entiti yang membentuk kerjasama sebagai *Special Purpose Vehicle* (SPV) dalam pelaksanaan program ini iaitu Syarikat Peneraju, Pesawah dan Pertubuhan Peladang Kawasan (PPK). Buat masa ini, sebanyak sebelas (11) Syarikat Peneraju telah bersetuju untuk turut serta di dalam program ini yang mana mereka ini disyaratkan mempunyai kilang beras untuk tujuan pemprosesan padi terus tanpa melibatkan orang tengah. MAFI juga dalam proses rundingan dengan beberapa buah syarikat peneraju lain yang juga telah menyatakan hasrat untuk turut terlibat dalam program ini.

Buat masa kini, pelaksanaan Program SMART SBB masih dalam peringkat awal kerana program ini disasarkan dilaksanakan sehingga tahun 2030. Antara kawasan yang telah dilaksanakan program ini adalah di Kawasan Pembangunan Pertanian Bersepadu (IADA) Barat Laut Selangor dan IADA Seberang Perak di bawah seliaan Syarikat Peneraju FGV Integrated Farming Holdings Sdn. Bhd. Seluas 313 hektar telah dilaksanakan sehingga kini dengan pecahan 173 hektar di IADA Barat Laut Selangor dan 140 hektar di IADA Seberang Perak.

Bagi memastikan pelaksanaan SMART SBB berjalan lancar, pihak Syarikat Peneraju akan dipantau secara dekat oleh MAFI bersama-sama agensi-agensi berkaitan seperti di Lembaga Kemajuan Pertanian Muda (MADA), Lembaga Kemajuan Pertanian Kemubu (KADA) dan Kawasan Pembangunan Pertanian Bersepadu (IADA). Jawatankuasa pemantauan juga telah ditubuhkan bagi memastikan pelaksanaan oleh Syarikat Peneraju menepati hasrat dan sasaran MAFI.

Untuk makluman Ahli Yang Berhormat jua, pelaksanaan Program SMART SBB ini tidak akan menjejaskan hak-hak petani. Ingin ditegaskan bahawa pelaksanaan program ini melibatkan persetujuan bersama antara pesawah/pengusaha dengan syarikat peneraju berteraskan kepada pendekatan sewaan dan pertanian kontrak yang mana hak pesawah masih kekal dan tidak terjejas. Penglibatan syarikat swasta dan korporat dalam program ini adalah bagi memastikan pelaksanaannya lebih berkesan memandangkan syarikat peneraju juga adalah merupakan pemain industri sedia ada yang akan membantu memendekkan rantai nilai pengeluaran dan pulangnya akan dapat dinikmati kembali oleh para pesawah sebagai rakan kongsi. Penglibatan syarikat peneraju dalam program ini juga diharap akan membantu Kerajaan daripada segi pengurangan kos kerana sebahagian kos pengeluaran yang terlibat termasuk pembelian input tambahan serta penggunaan teknologi moden dan terkini akan dibiayai oleh syarikat peneraju berkaitan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. DATO' ABDULLAH SANI BIN ABDUL
HAMID [KAPAR]
TARIKH : 11 OKTOBER 2021 (ISNIN)

SOALAN

DATO' ABDULLAH SANI BIN ABDUL HAMID [KAPAR] minta **MENTERI KEWANGAN** menyatakan apakah terdapat penambahan hutang negara bagi menampung kos melawan penularan COVID-19 dan pakej-pakej bantuan akibat pandemik. Sekiranya ada, berapa jumlah hutang tersebut.

JAWAPAN

Tuan Yang di-Pertua,

1. Susulan gelombang ketiga penularan COVID-19 sejak Januari 2021, Kerajaan telah melaksanakan semula Perintah Kawalan Pergerakan bagi membendung penularan COVID-19. Pandemik COVID-19 yang berterusan ini telah meningkatkan paras hutang Kerajaan Persekutuan berikutan keperluan penyediaan peruntukan untuk 4 pakej bantuan tambahan iaitu PERMAI, PEMERKASA, PEMERKASA Tambahan dan PEMULIH, yang kesemuanya bernilai 225 bilion ringgit dengan suntikan fiskal baharu yang dianggarkan berjumlah 25 bilion ringgit bagi terus meningkatkan kapasiti kesihatan awam, memelihara kebajikan rakyat dan kelangsungan perniagaan.

2. Nisbah hutang statutori Kerajaan Persekutuan sehingga akhir-Ogos 2021 yang merangkumi instrumen Sekuriti Kerajaan Malaysia, Terbitan Pelaburan Kerajaan Malaysia dan Bil Perbendaharaan Islam Malaysia, mencatat 59.2% kepada KDNK atau 902.7 bilion ringgit, iaitu masih di bawah had 60% yang ditetapkan dalam Akta Langkah-Langkah Sementara bagi Pembiayaan Kerajaan (Penyakit Koronavirus 2019 (COVID-19)) 2020. Selain itu, hutang Bil Perbendaharaan Malaysia pada akhir-Ogos 2021 berjumlah 8 bilion ringgit, tidak melebihi had 10 bilion ringgit yang ditetapkan di bawah Akta Bil Perbendaharaan (Tempatan) 1946. Hutang luar pesisir pula berjumlah 30.5 bilion ringgit, iaitu masih di bawah had 35 bilion ringgit yang ditetapkan dalam Akta Pinjaman Luar Negeri (1963). Justeru, hutang keseluruhan Kerajaan Persekutuan yang merangkumi kesemua instrumen adalah berjumlah 965.3 bilion ringgit atau 63.3% kepada KDNK.

3. Pada masa ini, keutamaan Kerajaan adalah untuk memastikan pelaksanaan semua langkah yang telah diumumkan dalam Belanjawan 2021 dan pakej-pakej bantuan bagi melindungi rakyat serta memastikan prospek pertumbuhan ekonomi kekal kukuh, disokong oleh Pelan Pemulihan Negara, kelancaran program vaksinasi di bawah Program Imunisasi COVID-19 Kebangsaan (atau PICK) serta pengurusan kewangan Kerajaan yang berhemat. Justeru, Kerajaan akan terus

memantau situasi penularan COVID-19 dan persekitaran ekonomi serta bersedia untuk memberi sokongan fiskal tambahan sekiranya diperlukan.

4. Selain itu, Kerajaan terus komited bagi meneruskan agenda pembangunan negara yang telah diperincikan dalam Rancangan Malaysia Kedua Belas serta langkah-langkah yang akan diumumkan dalam Belanjawan 2022. Oleh yang demikian, Kerajaan bercadang untuk menaikkan had siling Kumpulan Wang COVID-19 (atau KWC) daripada 65 bilion ringgit kepada 110 bilion ringgit dan meningkatkan had statutori hutang daripada 60% kepada 65% kepada KDNK untuk mewujudkan ruang fiskal tambahan. Satu rang undang-undang bagi meminda kedua-dua had ini akan dibentangkan pada mesyuarat kali ini. Had yang dicadangkan ini mengambil kira keperluan pembiayaan KWC serta pelaksanaan program dan projek di bawah RMKe-12. Pelan dan strategi yang lebih terperinci akan dibentangkan dalam Belanjawan 2022 kelak.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS

PERTANYAAN : JAWAB LISAN

DARIPADA : YB TUAN LARRY SOON @ LARRY SNG
WEI SHIEN [JULAU]

TARIKH : 11 OKTOBER 2021 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan sejauh manakah liputan *connectivity* internet menggunakan teknologi satelit MEASAT serta berapa kadar harga data dan berapa ringgit subsidi Kerajaan terutama sekali di luar bandar.

JAWAPAN

Tuan Yang Dipertua,

Untuk makluman Ahli Yang Berhormat Senator, MEASAT menyediakan 100% liputan internet kepada seluruh pelusuk geografi Malaysia melalui teknologi satelit. Melalui perkhidmatan CONNECTme NOW yang inovatif, komuniti yang berada di luar liputan 4G atau gentian optik juga dapat menikmati perkhidmatan jalur lebar berkelajuan tinggi secara pra-bayar.

Sehingga kini, MEASAT telah memasang lebih daripada 2,000 prasarana CONNECTme NOW WiFi hotspot dan kerja pemasangan masih diteruskan terutamanya di kawasan terpencil dan di pedalaman Sabah dan Sarawak.

Pengguna boleh mengakses internet melalui prasarana WiFi hotspot yang telah dipasang dengan hanya membeli baucar pra-bayar '*Prepaid Access Code (PAC)*' yang bernilai RM10 untuk data 1GB sehingga RM40 untuk data 5GB.

Buat masa ini, tiada subsidi kerajaan yang diberikan kepada perkhidmatan CONNECTme. Walau bagaimanapun, MEASAT dengan kerjasama Kementerian Sains, Teknologi dan Inovatif (KSTI), Sabah telah memilih sebanyak 50 buah tapak di Sabah bagi pemasangan perkhidmatan CONNECTme di mana sejumlah RM3,000 (*one-off*) diperuntukkan bagi setiap tapak sebahagian dari inisiatif pihak KSTI untuk merapatkan jurang digital di Sabah. Di samping itu, MEASAT baru sahaja dilantik oleh Suruhanjaya Komunikasi dan Multimedia Malaysia (SKMM) sebagai pembekal pemberian perkhidmatan sejagat untuk menyediakan perkhidmatan CONNECTme secara percuma di kawasan terpencil dan pedalaman Sabah bermula penghujung November 2021.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN MA'MUN BIN SULAIMAN
[KALABAKAN]**

TARIKH : 11 OKTOBER 2021 (ISNIN)

SOALAN

TUAN MA'MUN BIN SULAIMAN minta **MENTERI KANAN PENDIDIKAN** menyatakan strategi yang telah dirangka bagi mewujudkan sesi pembelajaran dan pengajaran fizikal berfokus mengikut subjek bagi calon-calon SPM dan STPM yang bersekolah di kawasan luar bandar yang masih belum divaksinasi, dan kerjasama bersama JKJAV dalam mempercepatkan vaksinasi buat golongan pendidik.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan calon peperiksaan awam tahun 2021 dapat membuat persediaan secukupnya walaupun berhadapan dengan situasi pandemik COVID-19 yang sangat mencabar.

KPM telah mengumumkan bahawa sekolah dibuka untuk pengajaran dan pembelajaran (PdP) secara bersemuka mulai 3 Oktober 2021 bagi negeri kumpulan A dan 4 Oktober 2021 bagi negeri kumpulan B. Pembukaan sekolah akan dibuat secara berperingkat mengikut fasa dalam Pelan Pemulihan Negara (PPN) dengan memberi keutamaan kepada murid kelas peperiksaan.

Untuk makluman Ahli Yang Berhormat, mengambil kira bahawa Program Imunisasi COVID-19 Kebangsaan Remaja (PICK Remaja) sedang

dalam pelaksanaan, pada masa ini murid dibenarkan ke sekolah tanpa mengambil kira status vaksinasi mereka. KPM sentiasa memantau kadar vaksinasi dalam kalangan murid dan memastikan PICK Remaja dapat dilaksanakan dengan teratur dan lancar. Sehingga 8 Oktober 2021, seramai 355,708 murid berumur 17 tahun (95.7 peratus) telah divaksin sekurang-kurangnya satu dos, manakala seramai 45,332 murid berumur 17 tahun (12.2 peratus) telah menerima vaksin lengkap. Selain itu, seramai 138,656 murid berumur 18 tahun (97.2 peratus) telah divaksin sekurang-kurangnya satu dos, manakala seramai 121,220 murid berumur 18 tahun (85.0 peratus) telah menerima vaksin lengkap.

Sebagai usaha melindungi kesihatan dan keselamatan murid yang kembali ke sekolah secara bersemuka, KPM telah mengambil beberapa ketetapan bagi mewujudkan persekitaran sekolah yang selamat. KPM menetapkan bahawa hanya guru dan anggota kumpulan pelaksana (AKP) yang lengkap divaksin sahaja dibenarkan untuk melaksanakan PdP di dalam kelas dan berinteraksi dengan murid. Selain itu, hanya pekerja perkhidmatan sokongan (PPS) yang lengkap divaksin sahaja dibenarkan memasuki dan bekerja di dalam kawasan sekolah.

KPM memantau rapi kadar vaksinasi warga sekolah yang layak divaksin. Sehingga 7 Oktober 2021, seramai 393,096 orang guru (95.1 peratus) telah lengkap divaksin. Daripada jumlah ini, seramai 86,738 orang guru (97.3 peratus) yang mengajar Tingkatan Lima dan Tingkatan Enam telah lengkap divaksin. Manakala, seramai 62,248 orang AKP (92.9 peratus) telah lengkap divaksin. Selain daripada itu, seramai 95,396 orang PPS (81.1 peratus) melibatkan pekerja kawalan keselamatan, kebersihan, dewan makan, kantin sekolah dan pemandu van sekolah telah lengkap divaksin. KPM sentiasa bekerjasama rapat dengan Pasukan Petugas Khas Imunisasi COVID-19 (CITF) bagi memastikan kadar vaksinasi dalam kalangan guru, AKP dan PPS dapat terus ditingkatkan.

Di samping itu, KPM telah menyediakan Garis Panduan Pengurusan dan Pengoperasian Sekolah 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru di sekolah bagi memastikan kelancaran pengoperasian sekolah.

Berdasarkan garis panduan ini, KPM mewajibkan pemakaian pelitup muka kepada semua warga sekolah, termasuk murid. Murid yang bergejala tidak dibenarkan hadir ke sekolah bagi mengelakkan risiko jangkitan dalam kawasan sekolah. Semua sekolah perlu memastikan pengudaraan yang baik di dalam kelas. Murid akan makan di dalam kelas semasa waktu rehat dengan seliaan guru. Bagi kelas yang menggunakan penyaman udara pula, murid perlu makan di ruang terbuka dengan seliaan guru.

Pada masa yang sama, prosedur operasi standard (SOP) yang telah ditetapkan oleh KKM seperti kerap mencuci tangan, saringan suhu badan serta penjarakan fizikal akan terus dilaksanakan di dalam sekolah.

KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan seperti mana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi persekolahan ini membolehkan guru dan pihak sekolah merancang serta melaksanakan intervensi, pengukuhan dan pengayaan secara intensif, termasuklah kepada calon SPM dan STAM 2021. Pelanjutan ini juga, akan memberi peluang kepada calon SPM dan STAM 2021 untuk membuat persediaan rapi bagi menghadapi peperiksaan.

KPM yakin bahawa usaha-usaha ini akan dapat memastikan calon peperiksaan SPM, STAM dan STPM 2021 mempunyai ruang dan peluang untuk membuat persiapan rapi sebelum menduduki peperiksaan.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' ABDULLAH SANI BIN ABDUL
HAMID [KAPAR]**

TARIKH : 11 OKTOBER 2021 (ISNIN)

SOALAN

Dato' Abdullah Sani bin Abdul Hamid [Kapar] minta **MENTERI
PEMBANGUNAN WANITA, KELUARGA DAN MASYARAKAT**
menyatakan komitmen dalam menangani krisis institusi keluarga kesan
dari pandemik COVID-19.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) amat komited dalam membantu mensejahterakan institusi keluarga di Malaysia dalam mendepani cabaran COVID-19. Bagi tempoh fasa Pelan Pemulihan Negara (PPN), Kementerian melalui Lembaga Penduduk dan Pembangunan Keluarga Negara (LPPKN) menyediakan perkhidmatan kaunseling keluarga dan siri program keibubapaan dan kekeluargaan sebagai usaha untuk membantu mengekalkan kesejahteraan keluarga.

Justeru, sepanjang tempoh tahun 2020 sehingga Julai 2021, KPWKM menerusi LPPKN telah mengadakan perkhidmatan dan program pendidikan kekeluargaan seperti berikut :

- (i) **Perkhidmatan kaunseling perkahwinan dan kekeluargaan** semasa pandemik ini telah diperluas menggunakan kaedah e-kaunseling dan tele kaunseling. Sebanyak 4,415 sesi telah diadakan melibatkan 26,808 klien. Perkhidmatan kaunseling remaja turut dijalankan secara hibrid dan aplikasi interaktif myKafeTEEN yang melibatkan sebanyak 1,837 orang klien remaja.
- (ii) **Pendidikan kekeluargaan secara dalam talian menerusi penubuhan Akademi Keluarga Sejahtera (AKS).** Siri program bual bicara keluarga (AKS) telah diadakan sebanyak 10 Siri program di platform media sosial dengan 62,300 penonton. Selain itu juga sebanyak 1,064 program pendidikan kekeluargaan telah dilaksanakan dengan pelbagai aktiviti melalui media sosial seperti *FB live*, *Instagram* dan *Zoom* dengan hampir 40 ribu tontonan.
- (iii) **Program Pendidikan dan Pembangunan Kemahiran Remaja** di 18 buah Pusat Remaja KafeTEEN LPPKN dilaksanakan secara fizikal dan dalam talian melibatkan penyertaan seramai 40,601 orang remaja. Manakala program Pengurusan Stres Dalam Kalangan Remaja Semasa COVID-19 juga diberi tumpuan dengan

pelaksanaan sebanyak 86 program yang melibatkan 1,402 orang remaja.

- (iv) **Program advokasi penerapan nilai-nilai murni** kekeluargaan turut dilaksanakan menerusi pengisian aktiviti sambutan Hari Ibu, Hari Bapa dan Bulan Keluarga sebagai menggalakkan penglibatan semua pihak untuk melindungi dan mengutamakan keluarga dalam menghadapi suasana persekitaran yang mencabar.
- (v) **Kolaborasi strategik bersama NGO** dengan mengadakan program pendidikan keibubapaan menggunakan pendekatan secara hibrid. Sebanyak 234 program Pendidikan Keibubapaan dan Kekeluargaan telah dilaksanakan dengan 16,430 orang ibu bapa yang terlibat.
- (vi) **Program bantuan segera** iaitu Kit Bantuan Sokongan Ibu dan Anak, pemberian keperluan asas ibu selepas bersalin seperti barangan penjagaan selepas bersalin, susu, lampin dan barangan keperluan bayi, seramai 2,000 ibu yang baru bersalin dalam kalangan B40 telah menerima manfaat terutama di kawasan PPR di Kuala Lumpur. Penerima bantuan ini seterusnya disusuli dengan program bantuan psikososial secara berterusan yang dijalankan oleh LPPKN dan agensi-agensi di bawah kementerian.

Pihak Kementerian juga ingin mengucapkan terima kasih kepada semua agensi dan kementerian lain, juga pihak NGO yang cakna kepada kesejahteraan keluarga Malaysia melalui program dalam kapasiti masing-masing yang turut membantu keluarga yang terkesan. Menyedari kesejahteraan keluarga adalah penting untuk pembangunan masyarakat dan negara, pihak Kementerian sedang merangka konsep dan prinsip Gagasan Keluarga Malaysia sebagai pegangan dan komitmen untuk memastikan keluarga di Malaysia dapat terus membangun secara mapan. Ini akan diikuti dengan program-program yang bersesuaian khususnya khidmat bantuan psikososial kepada keluarga yang terkesan akibat COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

TARIKH : 11 OKTOBER 2021 (ISNIN)

SOALAN

PUAN ISNARAISSAH MUNIRAH MAJILIS minta **MENTERI KANAN PENDIDIKAN** menyatakan perincian bagi kadar pelajar sekolah rendah dan menengah di negeri Sabah secara keseluruhan dan Parlimen Kota Belud secara khususnya yang tercicir dari sekolah disebabkan faktor kemiskinan sepanjang kaedah Pengajaran dan Pembelajaran di Rumah (PdPR) dilaksanakan.

JAWAPAN

Tuan Yang di-Pertua,

Kementerian Pendidikan Malaysia (KPM) mendefinisikan keciciran daripada sistem pendidikan sebagai situasi di mana murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat tempoh pendidikan.

Selain daripada keciciran daripada sistem pendidikan, KPM turut melihat keciciran dalam konteks penguasaan pembelajaran. Bagi memastikan tiada murid yang tercicir dalam pembelajaran semasa penutupan sesi persekolahan bersemuka, KPM telah melaksanakan pengajaran dan pembelajaran di rumah (PdPR). Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Data pelaporan pelaksanaan PdPR dari 1 Ogos hingga 30 September 2021 bagi negeri Sabah menunjukkan pelibatan murid sekolah rendah meningkat sebanyak 0.2 peratus iaitu daripada 99.6 peratus kepada 99.8 peratus. Bagi sekolah menengah pula, pelibatan murid meningkat sebanyak 0.1 peratus iaitu daripada 98.8 peratus kepada 98.9 peratus. Bagi daerah Kota Belud, data pelaporan pelaksanaan PdPR dari 1 Ogos hingga 30 September 2021 menunjukkan pelibatan murid sekolah rendah meningkat sebanyak 0.01 peratus iaitu daripada 99.97 peratus kepada 99.98 peratus. Bagi sekolah menengah pula, pelibatan murid meningkat sebanyak 0.53 peratus iaitu daripada 99.12 peratus kepada 99.65 peratus.

Selain itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian.

Bagi mengatasi isu keciciran murid dalam tempoh pelaksanaan PdPR, KPM telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui *Digital Educational Learning Initiative* Malaysia (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa.

Bagi membantu murid yang tidak mempunyai akses internet atau peranti yang sesuai, guru mengambil inisiatif untuk melaksanakan PdP secara luar talian melalui penggunaan buku teks. Buku aktiviti pula boleh digunakan untuk membuat latihan ulangkaji. Guru menyediakan modul pembelajaran dan membuat serahan bahan tersebut kepada murid. Guru

juga mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

Untuk makluman Ahli Yang Berhormat, KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM yakin kerangka holistik yang dirancang dan dilaksanakan ini membolehkan murid mengikuti PdP secara berkesan, seterusnya dapat menangani keciciran murid dan memastikan mereka kekal dalam sistem pendidikan negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 11 OKTOBER 2021 (RABU)

SOALAN

TUAN SIVAKUMAR VARATHARAJU NAIDU minta **MENTERI PENDIDIKAN** menyatakan secara terperinci mengenai Pengambilan Khas Pegawai Perkhidmatan Pendidikan Gred DG41 secara '*one off*' tahun 2021. Adakah sasaran pengambilan itu telah mencapai matlamatnya setakat ini.

JAWAPAN

Tuan Yang di-Pertua,

Pada 20 Jun 2021, Kementerian Pendidikan Malaysia (KPM) telah mengumumkan Pengambilan Khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* bagi mengisi kekosongan guru di sekolah KPM. Urusan pengambilan PPP ini adalah di bawah bidang kuasa Suruhanjaya Perkhidmatan Pendidikan (SPP) selaku Pihak Berkuasa Melantik.

Dari segi kriteria pemilihan, keutamaan akan diberikan kepada graduan yang mempunyai kelayakan ikhtisas pendidikan daripada Universiti Awam, Universiti Swasta dan universiti luar negara untuk dilantik secara tetap. Selain daripada itu, calon juga perlu memenuhi syarat skim perkhidmatan, memenuhi padanan Kluster Mata Pelajaran dan berjaya dalam temu duga SPP. Temu duga tersebut menilai kompetensi umum seperti sikap, penampilan diri, pengetahuan am dan kompetensi fungsional seperti kandungan mata pelajaran dan pedagogi.

Sekiranya bilangan calon yang berjaya dilantik dalam kalangan graduan yang mempunyai kelayakan ikhtisas pendidikan masih belum mencukupi, maka SPP akan melaksanakan kaedah lantikan secara *Contract of Service* (CoS) dalam kalangan calon-calon yang tidak memiliki kelayakan ikhtisas pendidikan.

Berdasarkan data sehingga 19 September 2021, terdapat 21,564 kekosongan guru di sekolah KPM seluruh negara. Dengan mengambil kira pengambilan *one-off* tersebut, baki kekosongan 2,862 akan diisi melalui proses lantikan biasa secara berterusan oleh SPP. KPM yakin dengan pengambilan *one-off* ini perkara berkaitan kekurangan guru yang telah berlanjutan bertahun-tahun lamanya akan dapat diselesaikan.

Untuk makluman Ahli Yang Berhormat, urusan pengambilan *one-off* ini telah bermula pada 7 Julai 2021 dan dijangka selesai pada bulan Disember 2021.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHD. AZIS BIN JAMMAN
[SEPANGGAR]**

TARIKH : 11 OKTOBER 2021 (ISNIN)

SOALAN

DATUK MOHD. AZIS BIN JAMMAN minta **MENTERI PENDIDIKAN** menyatakan status terkini bantuan kemudahan komputer riba, tablet dan data kepada pelajar B40 seperti yang diumumkan semasa Belanjawan 2021, dan berapakah yang telah diagihkan kepada pelajar di Sabah.

JAWAPAN

Tuan Yang di-Pertua,

Untuk makluman Ahli Yang Berhormat, inisiatif Tabung CERDIK seperti yang diluluskan dalam Belanjawan 2021 adalah satu inisiatif pemberian peranti digital lengkap dengan pelan data kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC) bertujuan menyediakan peranti digital kepada murid B40 yang dikenal pasti.

Yayasan Hasanah menguruskan sumbangan peranti digital dan pelan data daripada GLC dan GLIC serta menyelaras penghantaran peranti digital berkenaan ke Pejabat Pendidikan Daerah (PPD), Kementerian Pendidikan Malaysia (KPM).

Peranti digital yang diterima oleh KPM akan terus diagihkan kepada murid B40 yang telah dikenal pasti. Sehingga 22 September 2021, sebanyak 113,066 unit peranti digital telah diserahkan kepada murid B40 di 918 sekolah seluruh negara. Manakala, 18,066 unit telah diterima daripada Yayasan Hasanah dan akan diagihkan kepada murid dalam masa terdekat. Baki 18,868 unit lagi akan diagihkan sebaik sahaja diterima daripada Yayasan Hasanah.

Daripada jumlah tersebut, sebanyak 13,246 unit peranti digital lengkap dengan pelan data capaian Internet telah diagihkan kepada pelajar B40 di Sabah di 95 buah sekolah.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. PUAN NOR AZRINA BINTI SURIP
[MERBOK]
TARIKH : 11 OKTOBER 2021 (ISNIN)

SOALAN

PUAN NOR AZRINA BINTI SURIP [MERBOK] minta **MENTERI KEWANGAN** menyatakan adakah GST bakal dikembalikan dan cukai tafsiran individual akan dihapuskan atau dijadikan Combo GST + Cukai Tafsiran Individu.

JAWAPAN

Tuan Yang Di-Pertua,

1. Untuk makluman Ahli Yang Berhormat, Kerajaan masih mengkaji kesesuaian melaksanakan Cukai Barang dan Perkhidmatan (atau GST) dan model-model cukai kepenggunaan yang lain dengan mengambil kira semua aspek. Ini termasuklah kelemahan sistem cukai jualan dan cukai perkhidmatan di bawah sistem SST sedia ada serta kelemahan sistem GST yang dilaksanakan pada tahun 2015.
2. Kajian yang sedang dijalankan ini akan meliputi kesan ke atas ekonomi, kos sara hidup, kesan cukai ke atas harga barang serta keupayaan menangani kegiatan ekonomi gelap. Cukai kepenggunaan yang baharu tersebut, jika dilaksanakan, juga perlu bersifat mudah ditadbir dan tidak meningkatkan kos perniagaan di samping dapat mengukuhkan kedudukan fiskal negara.

3. Seperti Ahli Yang Berhormat sedia maklum, Malaysia telah mengamalkan pengenaan cukai kepenggunaan secara serentak dengan pengenaan cukai pendapatan (termasuk cukai pendapatan individu) sejak 1970-an lagi. Pada masa itu, cukai pendapatan individu telah berkuat kuasa di bawah Akta Cukai Pendapatan 1967 manakala cukai jualan diperkenalkan pada tahun 1972 dan cukai perkhidmatan pada tahun 1975. Amalan serupa diteruskan apabila GST diperkenalkan pada tahun 2015 serta apabila cukai jualan dan cukai perkhidmatan diperkenalkan semula pada tahun 2018. Selaras dengan amalan percukaian ini, jika terdapat sebarang cukai kepenggunaan yang baharu diperkenalkan di Malaysia pada masa hadapan, cukai yang baharu tersebut juga akan dikuatkuasakan secara serentak tanpa menghapuskan pengenaan cukai pendapatan ke atas individu.

4. Ahli Yang Berhormat juga sedia maklum bahawa cukai kepenggunaan, sama ada di bawah sistem SST atau sistem GST, hanya dikenakan apabila urusan tertentu dilakukan. Lazimnya, cukai ini terus dibayar oleh pengguna kepada penjual atau penyedia perkhidmatan semasa atau selepas urusan tersebut berlaku. Penjual dan penyedia perkhidmatan ini pula yang akan mengemukakan cukai kepenggunaan tersebut kepada Jabatan Kastam DiRaja Malaysia.

5. Ini berbeza dengan cukai pendapatan individu yang dikenakan ke atas pendapatan yang dijana oleh seseorang individu dalam suatu tempoh percukaian tertentu. Ini lazimnya dalam tempoh satu tahun percukaian. Cukai ini pula dibenarkan untuk dibayar secara bulanan atau tahunan mengikut situasi pembayar cukai tersebut setelah beliau mengemukakan anggaran pendapatan atau borang nyata cukai kepada Lembaga Hasil Dalam Negeri.

6. Oleh itu, adalah jelas bahawa cukai kepenggunaan dan cukai pendapatan individu masing-masing dikenakan berdasarkan konsep dan asas percukaian yang berbeza dan pengenaannya tidak dibuat secara kombinasi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. PUAN HANNAH YEOH TSEOW SUAN
[SEGAMBUT]
TARIKH : 11 OKTOBER 2021 (ISNIN)

SOALAN

PUAN HANNAH YEOH TSEOW SUAN [SEGAMBUT] minta **MENTERI KEWANGAN** menyatakan jumlah perbelanjaan Kerajaan secara perolehan darurat (tanpa tender terbuka) yang telah dilakukan semasa tempoh Darurat dengan mempericikan butir-butir perolehanan termasuk nama-nama syarikat yang terlibat.

JAWAPAN

Tuan Yang di-Pertua,

1. Untuk makluman Yang Berhormat, tempoh darurat yang dikuatkuasakan oleh Kerajaan adalah bagi mengawal penularan virus Covid-19 dan ia tidak bermakna bahawa semua perolehan boleh dilaksanakan secara darurat (tanpa tender terbuka). Agensi hanya diberi kelonggaran daripada mematuhi peraturan perolehan yang berkuat kuasa dengan melaksanakan perolehan darurat demi menjaga kepentingan awam dan Kerajaan, selaras dengan Pekeliling Perbendaharaan (PP)/Pengurusan Belanjawan (PB) 3.3: Garis Panduan Perbelanjaan Darurat (AP 55) dan Perolehan Darurat (AP 173.2). Darurat bagi tujuan perolehan ditakrifkan sebagai kejadian yang bersifat kecemasan dan/atau luar biasa yang memerlukan tindakan serta merta supaya tidak menjejaskan kepentingan awam, penyampaian perkhidmatan Kerajaan, mengekang berlakunya kerosakan berterusan dan menyekat penularan wabak dan seumpamanya.

2. Selain itu, proses digitalisasi perolehan Kerajaan melalui penggunaan sistem ePerolehan bagi perolehan bekalan dan perkhidmatan telah membantu Agensi Kerajaan memastikan perkhidmatan awam tidak terjejas dalam tempoh pelaksanaan Perintah Kawalan Pergerakan (PKP) termasuk semasa tempoh Darurat. Bagi tahun ini sehingga 15 September 2021, sebanyak 24,342 tawaran sebut harga dan 2,606 tender telah diiklankan manakala sebanyak 14,767 Surat Setuju Terima (SST) telah dikeluarkan dengan nilai keseluruhan perolehan sebanyak RM 4.63 bilion.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. DATUK MOHD AZIS BIN JAMMAN
[SEPANGGAR]
TARIKH : 11 OKTOBER 2021 (ISNIN)

SOALAN

Datuk Mohd Azis Bin Jamman [Sepanggar] minta **MENTERI KEWANGAN** menyatakan sepanjang tempoh darurat dan ordinan-ordinan darurat 2021 berkuatkuasa : -

(a) berapa jumlah perbelanjaan tambahan yang digunakan oleh Kerajaan (pecahan mengikut sumber, kategori perbelanjaan dan jenis perolehan ; dan

(b) jumlah individu dan syarikat yang telah dikenakan kompaun dan nilai keseluruhan.

JAWAPAN

Tuan Yang di-Pertua,

1. Untuk makluman Ahli Yang Berhormat, sepanjang tempoh darurat dan ordinan-ordinan darurat 2021 berkuat kuasa, tiada peruntukan tambahan telah diluluskan untuk perbelanjaan tahun 2021. Walau bagaimanapun, perbelanjaan tambahan tahun 2020 telah diluluskan melalui ordinan.

2. Sepertimana Ahli Yang Berhormat sedia maklum, Ordinan Darurat (Kuasa-Kuasa Perlu) 2021 ini telah diwartakan pada 14 Januari 2021 iaitu susulan perisytiharan Proklamasi Darurat oleh Yang Dipertuan Agong. Berdasarkan kepada Seksyen 14 dan 15 Ordinan tersebut, Parlimen dan Dewan Undangan Negeri tidak akan bersidang semasa tempoh darurat.

3. Walau bagaimanapun, perbelanjaan tambahan ini telah pun dibelanjakan dan Akaun Awam Kerajaan Persekutuan 2020 juga sedang dalam proses dimuktamadkan. Oleh itu, terdapat keperluan supaya perbelanjaan tambahan tahun 2020 segera dibentangkan di Parlimen bagi mendapatkan kelulusan.

4. Maka Ordinan Darurat (Kuasa-Kuasa Perlu) (Pindaan) 2021 telah digubal bagi membolehkan Kerajaan tidak mengguna pakai peruntukan di bawah perkara 98 dan 101 Perlembagaan Persekutuan, serta subseksyen 4(2) Akta Kumpulan Wang Pembangunan 1966 dalam tempoh darurat. Di bawah Ordinan berkenaan, apa-apa perbelanjaan tambahan yang dibuat oleh Perbendaharaan akan disiarkan dalam Warta Kerajaan Persekutuan sebagai pemberitahuan sahaja, tanpa perlu dibawa dan dibentangkan di Parlimen untuk kelulusan.

5. Untuk makluman Ahli Yang Berhormat, tambahan perbelanjaan bagi tahun 2020 ini melibatkan Perbelanjaan Mengurus dan Perbelanjaan Pembangunan. **Perbelanjaan Mengurus** bagi tahun 2020 yang diluluskan adalah sebanyak **665.9 juta ringgit**. Ia merangkumi Maksud Tanggungan

- T7 bagi Suruhanjaya Pilihanraya sebanyak 30,400 ringgit; dan
- Maksud T12 bagi Perbendaharaan sebanyak 11.9 juta ringgit.

6. Di bawah Maksud Bekalan yang telah diluluskan pula ialah
- Maksud B.4 bagi Suruhanjaya Pilihan Raya berjumlah 94.8 juta ringgit;
 - Maksud B.25 bagi Kementerian Perdagangan Dalam Negeri dan Hal Ehwal Pengguna berjumlah 84.4 juta ringgit;
 - Maksud B.12 bagi Peruntukan Kepada Kumpulan Wang Terkanun berjumlah 474.7 juta ringgit; dan
 - Maksud B.47 bagi Kementerian Komunikasi dan Multimedia berjumlah 20 ringgit sebagai Peruntukan Tanda.
7. Bagi **Perbelanjaan Pembangunan** pula, jumlah Anggaran Perbelanjaan Pembangunan Tambahan Pertama 2020 yang diluluskan adalah sebanyak **2,981 juta ringgit** yang merangkumi:
- Maksud P.28 bagi Kementerian Pengangkutan berjumlah 1,458 juta ringgit;
 - Maksud P.42 bagi Kementerian Kesihatan berjumlah 1,173.5 juta ringgit);
 - Maksud P.10 bagi Perbendaharaan berjumlah 160.5 juta ringgit;
 - Maksud P.22 bagi Kementerian Pembangunan Luar Bandar berjumlah 105.2 juta ringgit;
 - Maksud P.15 bagi Kementerian Hal Ehwal Ekonomi berjumlah 19.9 juta ringgit; dan
 - Maksud P.60 bagi Kementerian Pertahanan berjumlah 63.9 juta ringgit.
8. Sebanyak 210 ringgit pula merupakan Peruntukan Tanda yang telah diluluskan kepada beberapa Kementerian untuk mewujudkan butiran projek baharu dan membolehkan pindah peruntukan dibuat daripada butiran projek yang lain.
9. Selain itu, jumlah **individu dan syarikat yang dikenakan kompaun** bermula tahun 2020 sehingga 23 Ogos 2021 adalah sebanyak 179,290 dengan nilai keseluruhan kompaun yang telah dibayar berjumlah 71.8 juta ringgit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. TUAN WONG HON WAI
[BUKIT BENDERA]
TARIKH : 11 OKTOBER 2021 (ISNIN)

SOALAN

TUAN WONG HON WAI [BUKIT BENDERA] minta **MENTERI KEWANGAN** menyatakan menyenaraikan cukai yang dikutip mengikut tahun dan kategori industri di bawah *Windfall Profit Levy Act* 1998 dari tahun 1999 hingga 2020 dan sama ada Kerajaan berhasrat memansuhkan akta ini atau meluaskan ruang lingkup akta ini.

JAWAPAN

Tuan Yang di-Pertua,

Untuk makluman Ahli Yang Berhormat, *windfall profit levy* atau levi keuntungan luar biasa pada masa ini hanya dikenakan ke atas komoditi buah kelapa sawit berdasarkan paras ambang harga pasaran minyak sawit mentah (atau CPO) secara bulanan yang dikeluarkan oleh Lembaga Minyak Sawit Malaysia. Levi hanya dikenakan ke atas keuntungan yang melebihi paras ambang harga CPO.

Bagi Semenanjung, levi dikenakan pada kadar 3% sekiranya harga CPO melebihi paras ambang 2,500 ringgit se tan, manakala bagi Sabah dan Sarawak, levi pada kadar 1.5% dikenakan apabila harga CPO melebihi paras ambang 3,000 ringgit se tan.

Sepanjang tempoh tahun 1999 sehingga 2020, Kerajaan telah mengutip hasil levi keuntungan luar biasa berjumlah 2,921 juta ringgit. Dalam tempoh tersebut, levi tidak dikutip pada tahun-tahun di mana harga CPO tidak melebihi paras ambang yang ditetapkan.

Untuk makluman Ahli Yang Berhormat, buat masa ini Kerajaan juga tidak bercadang untuk memansuhkan Akta Levi Keuntungan Luar Biasa 1998.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN FAHMI BIN MOHAMED FADZIL
[LEMBAH PANTAI]**

TARIKH : 11 OKTOBER 2021 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan apakah dasar-dasar Kerajaan yang perlu diubah atau ditambah baik untuk membolehkan Malaysia menjadi lebih berdaya saing serta menjadi destinasi pilihan utama bagi syarikat-syarikat pangkalan data seperti Google dan sebagainya?

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan mengamalkan dasar terbuka dan sentiasa responsif dalam melaksanakan dasar-dasar yang mesra pelabur, khususnya kepada syarikat pangkalan data. Sepertimana kita sedia maklum, Rangka Tindakan Ekonomi Digital Malaysia atau MyDIGITAL merupakan suatu dasar induk yang komprehensif yang telah dibangunkan dan mempunyai sasaran yang ditetapkan menjelang 2050 iaitu menarik RM70 bilion pelaburan dalam pendigitalan. Fokus diberikan terhadap pembinaan ekosistem infrastruktur digital yang mesra pelabur secara menyeluruh dari segi dasar, tadbir urus dan prosedur. Pelbagai inisiatif telah digariskan dalam inisiatif MyDIGITAL yang sedang dilaksanakan oleh pelbagai pihak bagi mencapai sasaran ini.

SOALAN NO : 55

Berkaitan proses pelaksanaannya secara terperinci pula, Kerajaan telah menubuhkan Pasukan Petugas Penyelarasan Pelaburan Pusat Data atau DCICTF (*Data Centre Investment Coordination Task Force*) yang dipengerusikan bersama oleh KKMM dan MITI bagi memudah cara dan fasilitasi kepada para pelabur pangkalan data yang berminat melabur di Malaysia dalam menyediakan persekitaran pelaburan yang menarik. DCICTF ini akan meneliti isu-isu yang dibangkitkan oleh para pelabur pangkalan data, seterusnya mendapatkan penyelesaian seperti mengenal pasti dasar-dasar yang perlu diubah atau ditambah baik bagi membolehkan Malaysia lebih berdaya saing serta menjadi destinasi pilihan utama untuk pelabur.

KKMM juga terus komited untuk menarik pelaburan dan akan memperkasa *Digital Investment Office* (DIO) sebagai platform pemudahcara untuk membincangkan pelaburan berkualiti, khususnya berkaitan pendigitalan dari dalam dan luar negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. TUAN SU KEONG SIONG [KAMPAR]
TARIKH : 11 OKTOBER 2021 (ISNIN)

SOALAN

TUAN SU KEONG SIONG [KAMPAR] minta **MENTERI KEWANGAN** menyatakan kesan dan impak terhadap ekonomi negara akibat penularan pandemik COVID-19. Nyatakan keberkesanan pakej-pakej bantuan yang telah dilaksanakan oleh Kerajaan untuk membantu golongan M40 dan B40 yang terjejas akibat pandemik COVID-19.

JAWAPAN

Tuan Yang di-Pertua,

Kemelesetan ekonomi dunia pada tahun 2020 berikutan penularan wabak COVID-19 merupakan krisis yang terburuk sejak era *the Great Depression* pada tahun 1930an. Sebagai sebuah ekonomi terbuka, Malaysia turut mengalami kesan yang ketara dengan Keluaran Dalam Negeri Kasar (KDNK) benar mencatat penguncupan sebanyak 5.6 peratus pada tahun 2020 berikutan langkah pembendungan yang ketat bagi mengawal pandemik COVID-19.

Sehubungan itu, Kerajaan telah dan sedang melaksanakan pelbagai inisiatif bagi memulihkan ekonomi yang terjejas akibat pandemik COVID-19 di samping melindungi nyawa dan kehidupan rakyat. Antara inisiatif utama untuk terus menyokong sektor yang terkesan dan merancakkan semula aktiviti ekonomi adalah melalui pelaksanaan:

- i. Lapan (8) pakej rangsangan ekonomi dan bantuan yang komprehensif bernilai RM530 bilion sejak bulan Mac tahun 2020 (2020: RM305 bilion, 2021: RM225 bilion);
- ii. Pelan Ekonomi Negara yang menggunakan pendekatan strategi 6R (*Resolve, Resilience, Restart, Recovery, Revitalise* dan *Reform*);
- iii. Langkah dalam Belanjawan 2021 dengan peruntukan berjumlah RM322.5 bilion; dan
- iv. Pelan Pemulihan Negara atau PPN yang merupakan *roadmap* bagi memudahkan peralihan keluar daripada Perintah Kawalan Pergerakan secara berfasa.

Daripada nilai keseluruhan pakej rangsangan dan bantuan komprehensif yang telah diumumkan, setakat 27 Ogos 2021, sebanyak RM249.75 bilion telah disalurkan. Inisiatif-inisiatif di bawah pakej-pakej rangsangan ekonomi termasuk:

- a. Bantuan Prihatin Rakyat berjumlah RM9.6 billion yang memanfaatkan seramai 8.5 juta penerima;
- b. Geran Khas Prihatin yang bernilai RM6.08 billion memanfaatkan sebanyak 1 juta mikro perusahaan mikro;
- c. Bantuan Khas COVID(BKC) yang bernilai RM4.6 billion memanfaatkan sebanyak 10 juta penerima;
- d. Bantuan Bakul Makanan yang bernilai RM148 juta telah diagihkan kepada 2.29 juta ketua isi rumah;
- e. Program Subsidi Upah di mana RM18.3 billion telah disalurkan bagi memanfaatkan 353 ribu majikan dan 2.909 juta pekerja;
- f. Bantuan Moratorium Bersasar bernilai RM429 billion yang memanfaatkan 3.44 juta rakyat dan RM118 bilion yang memanfaatkan 98 ribu perniagaan; dan
- g. Diskaun bil elektrik yang berjumlah RM985 juta memanfaatkan 8.79 juta rakyat dan RM45 juta memanfaatkan 11.5 ribu perniagaan.

Bantuan-bantuan yang dirangka khusus ini adalah sejajar dengan objektif pelaksanaan PPN merentasi kelompok pendapatan rakyat serta usaha bagi memastikan kelangsungan perniagaan dan kehidupan rakyat serta kemampanan pertumbuhan ekonomi agar kesan buruk pandemik COVID-19 tidak berpanjangan. Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN HANNAH YEOH TSEOW SUAN
[SEGAMPUT]**

TARIKH : 11 OKTOBER 2021 (ISNIN)

SOALAN

Puan Hannah Yeoh Tseow Suan [Segambut] minta **MENTERI PEMBANGUNAN WANITA, KELUARGA DAN MASYARAKAT** menyatakan peranan “Pak Sas” dalam usaha melakukan penjenamaan baharu untuk Menteri dan skop kerja beliau serta butir-butir terperinci perbelanjaan yang ditanggung untuk tujuan ini secara rasional di sebalik penjenamaan baharu Menteri semasa tempoh pandemik COVID-19 ini.

JAWAPAN

Tuan Yang di-Pertua,

Kementerian tidak mempunyai sebarang rekod mengenai individu tersebut dan tidak ada sebarang peruntukan atau implikasi kewangan berkaitan individu yang dinyatakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN SIM TZE TZIN [BAYAN BARU]

TARIKH : 11 OKTOBER 2021 (ISNIN)

SOALAN

TUAN SIM TZE TZIN minta **MENTERI KANAN PENDIDIKAN** menyatakan menjelang pembukaan sekolah pada bulan Oktober apakah SOP terbaru pembelajaran di dalam sekolah, ko-kurikulum, di luar pagar sekolah dan di pusat tuisyen supaya ibu bapa, guru, pengusaha bas sekolah, pengusaha kantin dan pengusaha tuisyen memahami semua SOP dengan jelas.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengeluarkan Garis Panduan Pengurusan dan Pengoperasian Sekolah 3.0 sebagai persediaan bagi pembelajaran bersemuka secara berperingkat mulai 3 Oktober 2021. Garis panduan ini terpakai kepada semua sekolah rendah dan sekolah menengah termasuk prasekolah, kolej vokasional dan kolej tingkatan enam bawah KPM dan institusi pendidikan swasta termasuk pusat tuisyen yang berdaftar dengan KPM. Panduan ini merangkumi semua aspek pengoperasian di sekolah termasuk semasa sesi pengajaran dan pembelajaran (PdP) di dalam kelas, pelaksanaan sesi ko-kurikulum dan pengawalan serta penyuraian murid di pintu pagar sekolah. Garis panduan ini merupakan rujukan utama kepada jabatan pendidikan negeri (JPN), pejabat pendidikan daerah (PPD), pentadbir serta guru di sekolah dan ibu bapa/penjaga. Dokumen garis panduan boleh dimuat turun menerusi portal rasmi KPM.

Sebagai usaha melindungi kesihatan dan keselamatan murid yang kembali ke sekolah secara bersemuka, KPM telah mengambil beberapa ketetapan bagi mewujudkan persekitaran sekolah yang selamat. KPM menetapkan bahawa hanya guru dan anggota kumpulan pelaksana (AKP) yang lengkap divaksin sahaja dibenarkan untuk melaksanakan PdP di dalam kelas dan berinteraksi dengan murid. Selain itu, hanya pekerja perkhidmatan sokongan (PPS) yang terdiri daripada pekerja kebersihan bangunan kawasan (KBK), pekerja perkhidmatan kawalan keselamatan (PKK), pengusaha kantin, pekerja dewan makan asrama, pekerja kedai buku/koperasi dan pekerja-pekerja lain yang bertugas di sekolah yang lengkap divaksin sahaja dibenarkan memasuki dan bekerja di dalam kawasan sekolah.

KPM memantau rapi kadar vaksinasi warga sekolah yang layak divaksin. Sehingga 7 Oktober 2021, seramai 393,096 orang guru (95.1 peratus) telah lengkap divaksin. Manakala, seramai 62,248 orang AKP (92.9 peratus) telah lengkap divaksin. Selain daripada itu, seramai 95,396 orang PPS (81.1 peratus) telah lengkap divaksin. KPM sentiasa bekerjasama rapat dengan Pasukan Petugas Khas Imunisasi COVID-19 (CITF) bagi memastikan kadar vaksinasi dalam kalangan guru, AKP dan PPS dapat terus ditingkatkan.

KPM juga memantau rapi kadar vaksinasi murid di bawah Program Imunisasi COVID-19 Kebangsaan Remaja (PICK Remaja) yang dikendalikan oleh Pasukan Petugas Khas COVID-19 Remaja (CITF-A). Sehingga 7 Oktober 2021, seramai 3,886,576 murid berumur 12 hingga 18 tahun (76.7 peratus) telah divaksin sekurang-kurangnya satu dos, manakala seramai 443,384 murid berumur 12 hingga 18 tahun (8.7 peratus) telah menerima vaksin lengkap.

KPM turut mewajibkan pemakaian pelitup muka kepada semua warga sekolah termasuk murid. Murid yang bergejala tidak dibenarkan hadir ke sekolah bagi mengelakkan risiko jangkitan dalam kawasan sekolah. Semua sekolah perlu memastikan pengudaraan yang baik di dalam kelas. Murid akan makan di dalam kelas semasa waktu rehat dengan seliaan guru. Bagi kelas yang menggunakan penyaman udara pula, murid perlu makan di ruang terbuka dengan seliaan guru.

Pada masa yang sama, prosedur operasi standard (SOP) yang telah ditetapkan oleh KKM seperti kerap mencuci tangan, saringan suhu badan serta penjarakan fizikal akan terus dilaksanakan di dalam sekolah.

Bagi murid yang akan pulang ke sekolah asrama sepenuhnya, KPM akan melaksanakan ujian saringan COVID-19 menggunakan kit ujian sendiri COVID-19 ke atas murid sebanyak 3 kali, iaitu semasa pendaftaran masuk, hari ke-6 dan hari ke-14. Bagi murid asrama harian, ujian saringan COVID-19 menggunakan kit ujian sendiri COVID-19 akan dilaksanakan semasa pendaftaran masuk. Selain itu, kit ujian sendiri COVID-19 akan disediakan bagi kegunaan sekolah harian untuk membuat saringan awal sekiranya terdapat murid yang menunjukkan gejala ketika di sekolah.

Untuk makluman Ahli Yang Berhormat, waktu/masa hadir dan balik murid boleh dilaksanakan secara berperingkat. Bagi mengelakkan kesesakan, pihak sekolah boleh mengurus pergerakan keluar masuk murid berdasarkan pada model penyuraian yang telah dipilih. Semua murid perlu terus balik ke rumah apabila tamat sesi persekolahan.

Bagi pelaksanaan aktiviti sukan dan kokurikulum pula, KPM telah memutuskan bahawa sebarang aktiviti sukan dan kokurikulum secara bersemuka adalah tidak dibenarkan buat masa ini. Justeru, semua aktiviti kokurikulum iaitu Kelab/Persatuan, Pasukan Badan Beruniform, Sukan/Permainan dan perjumpaan mingguan dilaksanakan secara dalam talian. KPM akan memaklumkan sebarang perubahan terkini mengenai kaedah pelaksanaan aktiviti kokurikulum dari semasa ke semasa.

KPM sentiasa komited dalam memastikan pengoperasian sekolah secara bersemuka berjalan dengan teratur dan selamat.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB PUAN JUNE LEOW HSIAD HUI [HULU
SELANGOR]**

TARIKH : 11 OKTOBER 2021 (ISNIN)

SOALAN

PUAN JUNE LEOW HSIAD HUI [HULU SELANGOR] minta **MENTERI PELANCONGAN, SENI DAN BUDAYA** menyatakan inisiatif Kementerian untuk membantu pengusaha inap desa yang terkesan dengan wabak COVID-19 dan langkah menghidupkan kembali industri pelancongan berkonsep desa.

JAWAPAN

Tuan Yang di-Pertua,

1. Antara inisiatif yang telah diambil oleh Kementerian untuk membantu pengusaha inap desa yang terkesan dengan wabak COVID-19 adalah:

- (i) Pemberian bantuan kewangan secara kepada seramai 2,847 orang pengusaha Program Pengalaman Homestay Malaysia di bawah Program Strategik Memperkasa Rakyat dan Ekonomi (PEMERKASA); dan
- (ii) Pelaksanaan kursus kerjasama dengan pihak Akademi Usahawan Mikro (AUM) untuk melaksanakan Program Kursus *Global Digital Branding & Cross-Border Ecommerce* (GLODEEP) bagi meningkatkan kualiti perkhidmatan pengusaha Program Pengalaman Homestay Malaysia berkaitan keusahawanan, pemasaran secara digital dan hospitaliti secara atas talian sebagai persediaan bagi pembukaan sektor ekonomi melibatkan industri pelancongan;

2. Bagi menghidupkan kembali industri pelancongan berkonsep desa, Tourism Malaysia, sebuah agensi di bawah Kementerian Pelancongan, Seni dan Budaya (MOTAC) telah mewujudkan satu platform promosi secara digital melalui laman sesawang mikro *Deals & Packages* yang boleh diakses oleh para pengusaha Program Pengalaman Homestay Malaysia dengan melayari laman sesawang utama www.malaysia.travel. Platform promosi ini disediakan secara percuma kepada pengusaha Program Pengalaman Homestay Malaysia yang berminat dengan cara memuatnaik pakej-pakej yang ditawarkan kepada pelancong.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN
DARIPADA : YB PUAN YEO BEE YIN [BAKRI]
TARIKH : 11 OKTOBER 2021 (ISNIN)

SOALAN

YB PUAN YEO BEE YIN [BAKRI] minta **MENTERI TENAGA DAN SUMBER ASLI** menyatakan sama ada Kementerian akan menambah kuota untuk Program NOVA (*Net Offset Virtual Aggregation*). Apakah usaha Kementerian untuk menggalakkan NEM Rakyat dan NEM *Government Ministries and Entities*.

JAWAPAN

Tuan Yang di-Pertua,

1. Kerajaan telah memperkenalkan Program *Net Energy Metering* (NEM) 3.0 dengan penawaran kuota sebanyak 500MW, bermula 1 Januari 2021 hingga 31 Disember 2023, atau sehingga kesemua kuota tersebut habis, yang mana terdahulu.
2. Untuk kategori program *Net Offset Virtual Aggregation* (NOVA), kesemua kuota berjumlah 300MW telah dimohon oleh pengguna komersial dan industri. Daripada jumlah tersebut, sebanyak 203MW telah diluluskan untuk pelaksanaan kerana memenuhi syarat-syarat yang ditetapkan. Baki kuota sebanyak 97MW sedang dalam proses penilaian teknikal oleh Pihak Berkuasa Pembangunan Tenaga Lestari atau SEDA. Kuota NOVA yang tidak diluluskan akan dimasukkan kembali dalam sistem untuk penawaran semula.

3. Seperti Ahli Yang Berhormat sedia maklum, penetapan kapasiti solar dalam campuran bahan api penjanaan elektrik adalah berdasarkan perancangan yang diluluskan oleh Kerajaan dalam Pelan Pembangunan Penjanaan Elektrik 2021-2039. Berdasarkan pelan tersebut, terdapat jumlah kapasiti solar yang masih boleh ditawarkan bagi memenuhi sasaran 31% Tenaga Boleh Baharu dalam kapasiti penjanaan elektrik negara. Kementerian sedang memuktamadkan pengagihan kuota tersebut untuk dilaksanakan melalui pelbagai program termasuk program Net Energy Metering. Ia akan diumumkan dalam tempoh terdekat ini dengan mengambil kira had kemasukan solar ke dalam grid, keanjalan dan keselamatan sistem bekalan elektrik serta implikasi kos terhadap tarif pengguna.

4. Bagi menggalakkan penyertaan pengguna elektrik dalam Program NEM Rakyat, Kerajaan melalui SEDA Malaysia sedang melaksanakan aktiviti promosi melalui pelbagai saluran media. Di samping itu, syarikat-syarikat pembekal perkhidmatan solar turut bersaing secara kompetitif dengan menawarkan pelbagai pakej kepada pelanggan.

5. Selain itu, Kementerian ini bersama-sama Jabatan Kerja Raya turut memberikan khidmat nasihat kepada jabatan/agensi yang berhasrat untuk melaksanakan pemasangan sistem solar PV di bangunan-bangunan Kerajaan di bawah Program NEM GoMEn. Pendekatan ini secara tidak langsung turut mempromosikan program ini di kalangan orang ramai serta Kementerian/Jabatan Kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGKAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 11 OKTOBER 2021 (ISNIN)

SOALAN

minta **MENTERI KOMUNIKASI DAN MULTIMEDIA** menyatakan secara terperinci perkembangan data dan statistik yang inisiatif pendigitalan dalam Pelan Jana Semula Ekonomi Negara (PENJANA) melibatkan usaha pendigitalan untuk industri Perusahaan Kecil dan Sederhana (PKS) bagi tahun 2020 dan 2021.

JAWAPAN

Tuan Yang Dipertua,

Untuk makluman Ahli Yang Berhormat, inisiatif e-dagang adalah salah satu inisiatif di bawah Pelan Jana Semula Ekonomi Negara (PENJANA) pada tahun 2020 yang telah dilaksanakan oleh MDEC. Inisiatif ini bertujuan menggalakkan penggunaan platformm e-dagang serta teknologi digital dalam operasi perniagaan khususnya oleh Perusahaan Kecil dan Sederhana (PKS) dan Usahawan Mikro. Kempen-kempen yang dilaksanakan di bawah inisiatif ini adalah seperti berikut:

- a. Kempen E-dagang untuk PKS dan Usahawan Mikro (PMKS) yang bertujuan untuk menggalakkan PMKS menggunakan platform dan aplikasi e-dagang untuk meluaskan pasaran mereka. MDEC telah bekerjasama dengan rakan e-dagang

tempatan dan luar negara bersama dengan kementerian-kementerian dan agensi-agensi pembangunan usahawan lain bagi memastikan golongan sasaran ini mendapat manfaat daripada program ini. Sebanyak 93,000 PMKS telah mendapat manfaat daripada kempen ini. Jumlah jualan e-dagang yang dicapai menerusi kempen ini telah mencecah lebih RM929 juta. Kempen ini telah dilaksanakan dari Jun hingga September 2020.

- b. Kempen Shop Malaysia Online yang merupakan kempen jualan e-dagang untuk menggalakkan pembelian dalam talian melalui pemberian baucar, diskaun dan rebat. Kempen ini menumpukan usaha menggalakkan dan meningkatkan jualan dalam talian untuk produk dan barangan PKS tempatan. Di samping itu, kempen ini turut bertujuan untuk menarik lebih banyak PKS tempatan menggunakan platform e-dagang dan menggalakkan eksport produk tempatan melalui platform e-dagang antarabangsa. Kempen ini telah berjaya menjana jualan e-dagang melebihi RM945 juta, 8.2 juta jumlah transaksi dan telah memberi manfaat kepada lebih 202,000 peniaga Malaysia. Kempen ini telah dilaksanakan dari Ogos hingga September 2020.

Di bawah Inisiatif e-Dagang Belanjawan 2021, dua kempen sedang dilaksanakan iaitu, kempen Go-eCommerce *Onboarding* dan kempen Shop Malaysia Online. Inisiatif ini dijangka akan memberi manfaat kepada 300,000 peniaga mikro dan PKS yang terdiri daripada pelbagai sasaran komuniti. Melalui inisiatif ini penjaja dan pengusaha mikro yang terdiri daripada peniaga di pasar, pasar tani, pasar malam, pengusaha kenderaan bersaji (*food truck operator*) masih boleh mengurusniaga walaupun dalam keadaan perintah kawalan pergerakan. Inisiatif e-dagang ini telah bermula pada 1 Julai 2021 dan akan berakhir pada 31 Disember 2021.

PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14

PERTANYAAN : LISAN
DARIPADA : Y.B. PUAN TEO NIE CHING
[KULAI]
TARIKH : 11 OKTOBER 2021 (ISNIN)

SOALAN

Puan Teo Nie Ching [Kulai] minta **MENTERI KEWANGAN** menyatakan jumlah yang telah dibayar kepada Sin Chew Daily, The Star dan lain-lain untuk kesemua "*advertorial*", antaranya termasuk *advertorial* seperti berikut:-

(a) 21 Januari 2021 tentang Bantuan Permai 2021, 22 November 2019 dan 15 Disember 2019 tentang Belanjawan 2020; dan

(b) Disember 2020 tentang i-Sinar

JAWAPAN

Tuan Yang di-Pertua,

1. Untuk makluman ahli Yang Berhormat Kulai, dalam melaksanakan hebahan berkaitan pakej rangsangan ekonomi, Kementerian Kewangan menggunakan pendekatan strategi komunikasi pemasaran bersepadu (*intergrated marketing communication*) menerusi medium media cetak, elektronik dan *online* (portal berita/*infotainment*). Usaha ini bertujuan untuk menyalurkan maklumat berkaitan inisiatif-inisiatif pakej rangsangan ekonomi kepada rakyat menerusi lanskap komunikasi yang pelbagai.
2. Bagi hebahan Pakej Bantuan Perlindungan Ekonomi dan Rakyat Malaysia (PERMAI), sejumlah RM1.8 juta telah dibelanjakan bagi tempoh Januari hingga Mac 2021 melibatkan 12 agensi media termasuk Sin Chew dan The Star. Perbelanjaan hebahan ini merangkumi komponen *advertorial*, laporan khas TV, *public service annoucement*, *talkshow*, kapsul, penulisan kreatif dan *infoboard*. Hebahan PERMAI juga turut menguar-uarkan inisiatif-insiatif yang dilaksanakan oleh 27 buah Kementerian di bawah penyelarasan Pejabat Perdana Menteri.
3. Dari segi pelaksanaan hebahan, Kementerian Kewangan membuat hebahan secara menyeluruh dan bersepadu bagi memastikan maklumat berkaitan inisiatif dapat disalur serta diketahui oleh rakyat secara konsisten merangkumi liputan media *mainstream* dan media digital. Bagi hebahan inisiatif i-Sinar ianya telah dibuat bersekali (terangkum) di bawah hebahan Belanjawan 2021.
4. Untuk makluman ahli Yang Berhormat Kulai, hebahan Belanjawan 2020 dilaksanakan menerusi pendekatan *below the line* dengan komponen publisiti sahaja serta tiada peruntukan yang dibelanjakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN CHONG CHIENG JEN [STAMPIN]

TARIKH : 11 OKTOBER 2021 (ISNIN)

SOALAN

TUAN CHONG CHIENG JEN minta **MENTERI KANAN PENDIDIKAN** menyatakan apakah langkah yang telah diambil oleh Kementerian untuk memastikan bahawa murid-murid di luar bandar di Negeri Sarawak dapat mengikuti pelajaran mereka secara maya. Apakah hasil kajian Kementerian sama ada murid-murid itu telah ketinggalan dalam pelajaran mereka.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR).

Pengajaran dan pembelajaran (PdP) dalam talian merupakan satu pendekatan pengajaran dan pembelajaran di rumah (PdPR) yang dilaksanakan mengikut kesesuaian guru dan murid. Pihak sekolah dan guru mengatur strategi untuk memastikan PdPR dilaksanakan secara optimum berdasarkan pertimbangan tiga prinsip asas iaitu tiada murid tercicir dalam pembelajaran, keperluan asas pembelajaran dipenuhi dan kesejahteraan murid diutamakan.

Untuk makluman Ahli Yang Berhormat, KPM telah menyediakan pelantar *Digital Educational Learning Initiative Malaysia* (DELIMa) bagi memperkasakan pelaksanaan PdPR dalam talian. Pelantar ini merupakan pusat rujukan sehati yang menyediakan pelbagai aplikasi, perkhidmatan dan sumber pendidikan digital seperti buku teks digital, video pendidikan, kuiz dan permainan pendidikan bagi tujuan PdP yang boleh digunakan oleh guru, murid dan ibu bapa.

Mulai Ogos 2021, KPM juga telah menaik taraf dan menambah baik pelantar DELIMa dengan fitur baharu (DELIMa 2.0) bagi meningkatkan pengalaman pengguna, analitis data, kandungan dan pembelajaran diperibadikan. Semua kemudahan yang disediakan dapat memberikan pengalaman pembelajaran yang menyeronokkan dan memperluas peluang murid untuk belajar, meningkatkan motivasi dan prestasi bagi membangunkan potensi serta bakat mereka secara menyeluruh. Murid juga berupaya melaksanakan pembelajaran aktif secara sendiri melalui akses kandungan pembelajaran dalam pelbagai format yang disediakan.

KPM juga telah menambah lebih banyak bahan PdP dalam pelantar DELiMa. Sehingga 4 Oktober 2021, KPM telah menyediakan sebanyak 3,245 video kurikulum, 324 video pedagogi, 2,538 video DidikTV KPM dan 631 buah buku teks digital.

KPM juga menyedari bahawa tidak semua murid mempunyai akses kepada talian internet dan peranti digital yang sesuai. Bagi membantu murid ini melaksanakan pembelajaran, KPM terus memperkasakan siaran pendidikan di DidikTV KPM. Selain itu, siaran TV Pendidikan di TV Okey RTM dan Tutor TV Astro juga diteruskan. Murid juga boleh meneruskan kaedah pembelajaran PdPR secara luar talian dengan menggunakan buku teks yang dibekalkan.

Untuk makluman Ahli Yang Berhormat, KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirancang dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran melibatkan murid sekolah rendah dan sekolah menengah.

Untuk makluman Ahli Yang Berhormat, KPM telah melaksanakan Kajian Keberkesanan Pelaksanaan *Home-based Learning* yang ditadbir secara dalam talian. Kajian ini memfokuskan kepada PdPR semasa Perintah Kawalan Pergerakan (PKP). Skop kajian meliputi aspek pelaksanaan PdPR dalam tempoh Mac hingga Julai tahun 2020 yang merangkumi pendekatan, kaedah, strategi, aplikasi dan peralatan yang digunakan. Selain itu, kajian tersebut juga melihat kepada penjadualan PdPR, penyusunan semula Rancangan Pelajaran Tahunan (RPT) dan pentaksiran. Kajian ini melibatkan 13,156 orang pentadbir sekolah,

39,967 orang guru, 52,413 orang murid dan 59,624 orang ibu bapa/penjaga.

Dapatan kajian menunjukkan pelibatan murid di bandar dalam PdPR secara dalam talian adalah sebanyak 59.3 peratus berbanding 51.4 peratus bagi murid di luar bandar. Bagi RPT pula, 46.2 peratus guru di bandar mencapai sasaran pelaksanaan berbanding dengan 39.1 peratus guru di luar bandar.

Dapatan kajian ini juga menunjukkan tahap keberkesanan PdPR adalah pada tahap sederhana. Sebanyak 34.1 peratus murid menyatakan hasil pembelajaran di rumah adalah tidak seperti yang diperoleh di sekolah.

Selain itu, 51.2 peratus murid berasa tertekan semasa pembelajaran di rumah. Daripada kumpulan tersebut, 48.9 peratus murid menyatakan sebab tertekan adalah kerana interaksi yang terhad dengan guru manakala 55.0 peratus murid tertekan disebabkan interaksi terhad dengan rakan-rakan. Sebanyak 53.4 peratus murid pula tertekan disebabkan kurang bimbingan dalam sesi pembelajaran.

Sebaliknya, terdapat murid menganggap PdPR merupakan suatu pengalaman baharu. Sebanyak 56.6 peratus murid berjaya melibatkan diri secara aktif semasa sesi pembelajaran di rumah dan 49.7 peratus murid berasa seronok semasa mengikuti PdPR. Sebanyak 57.5 peratus murid berjaya menyiapkan tugas atau latihan yang diberikan oleh guru dalam masa yang ditetapkan. Dapatan kajian juga menunjukkan sebanyak 36.0 peratus murid boleh belajar sendiri menggunakan bahan pembelajaran di rumah dalam tempoh PKP.

Untuk makluman Ahli Yang Berhormat, bagi memantau keberkesanan PdPR pada suku tahun pertama 2021, KPM telah menjalankan Tinjauan Pelaksanaan PdPR yang melibatkan 500 buah sekolah melalui pemerhatian terhadap PdPR yang dilaksanakan dalam talian atau gabungan dalam dan luar talian. Pemerhatian dilaksanakan melalui kehadiran Nazir Sekolah dalam kelas PdPR secara dalam talian. Pemerhatian ini dimaklumkan lebih awal kepada guru yang terlibat.

Sebanyak 1,053 pemerhatian dilaksanakan ke atas PdP guru. Tinjauan mendapati 98.7 peratus guru dapat mengelola isi pelajaran yang diajar mengikut peruntukan masa yang ditetapkan. Sebanyak 97.4 peratus guru berjaya membimbing murid untuk memahami dan menguasai isi, konsep dan fakta berkaitan pelajaran. Sementara itu, 96.7 peratus guru berjaya menarik perhatian murid untuk memberi respons terhadap pembelajaran dan memastikan keterlibatan murid semasa PdPR secara *real-time*.

Hasil tinjauan juga mendapati murid memberi respons positif terhadap tugas yang diberikan oleh guru dalam 97.5 peratus PdPR yang diperhatikan. Murid juga dapat melengkap dan menghantar tugas dengan pelbagai cara antaranya, melalui rakaman video, slaid pembentangan dan *voice call*.

Secara keseluruhannya, tinjauan ini menunjukkan bahawa guru telah berupaya merangsang murid berfikir dan berkomunikasi dalam PdPR. Guru juga dapat melaksanakan aktiviti pembelajaran yang menyeronokkan dan menarik minat murid untuk belajar.

KPM sentiasa komited untuk memastikan murid dapat meneruskan pembelajaran dalam keadaan yang selamat dan mendapat akses kepada pembelajaran yang berkualiti pada setiap masa. KPM yakin kerangka holistik yang dirancang dan dilaksanakan ini membolehkan murid mengikuti PdPR secara lebih berkesan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK MOHAMADDIN BIN KETAPI
(LAHAD DATU)**

TARIKH : 11 OKTOBER 2021 (ISNIN)

SOALAN

DATUK MOHAMADDIN BIN KETAPI [LAHAD DATU] minta **MENTERI PENGANGKUTAN** menyatakan apakah status terkini cadangan untuk menaik taraf atau membina baru Lapangan Terbang Lahad Datu.

JAWAPAN:

Tuan Yang Dipertua,

Sebarang cadangan cadangan untuk menaik taraf atau membina baru Lapangan Terbang Lahad Datu akan dipertimbangkan mengambil kira kemampuan kewangan Kerajaan.

Di samping itu, cadangan tersebut juga adalah tertakluk kepada Kajian Pelan Strategik Lapangan Terbang Negara (NASP) yang akan dimulakan pada awal tahun 2021 bagi semua 42 lapangan terbang sedia ada. Cadangan ini perlulah disokong unjuran-unjuran yang realistik dan tepat khususnya unjuran permintaan perkhidmatan penumpang dan kargo serta komitmen syarikat penerbangan yang ingin menggunakan Lapangan Terbang Lahad Datu, lebih-lebih lagi dalam era pasca COVID-19.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 11 OKTOBER 2021 (ISNIN)

SOALAN

DR. MASZLEE BIN MALIK minta **MENTERI KANAN PENDIDIKAN** menyatakan apakah langkah untuk memperbaiki SOP yang diambil oleh KPM untuk membendung dan mengelakkan kes gangguan seksual di institutsi pendidikan di bawah KPM.

JAWAPAN

Tuan Yang di-Pertua,

Berdasarkan peraturan sedia ada, murid **wajib** melaporkan gangguan seksual kepada guru atau ibu bapa/penjaga agar pihak sekolah dapat mengambil tindakan segera bagi menangani isu tersebut. Ibu bapa/penjaga juga wajib melaporkan isu gangguan seksual kepada pihak Polis Diraja Malaysia (PDRM) agar siasatan dan tindakan dapat diambil.

KPM telah melaksanakan penelitian dan semakan berkaitan keseluruhan salah laku murid termasuk salah laku gangguan seksual. Peraturan-peraturan disiplin murid baharu yang lebih komprehensif sedang dirangka bagi menggantikan peraturan-peraturan sedia ada. Bagi pencegahan isu gangguan seksual di sekolah, KPM melalui perkhidmatan bimbingan dan kaunseling melaksanakan intervensi secara berfokus melalui Modul Intervensi Jenayah Seksual Kanak-Kanak di Sekolah (IHSAN) untuk memberi pemahaman dan meningkatkan kesedaran murid berkaitan jenayah seksual kanak-kanak.

Guru Bimbingan dan Kaunseling di sekolah berperanan memberikan sokongan kepada murid yang menjadi mangsa gangguan seksual melalui sesi-sesi kaunseling bagi memastikan kesejahteraan, kesihatan, keselamatan serta kebajikan murid terjaga.

Program kesedaran berterusan turut dilaksanakan oleh KPM dengan kerjasama agensi kerajaan atau bukan kerajaan dalam menyebarkan maklumat psikopendidikan kesihatan reproduktif dan ancaman gangguan seksual melalui program-program anjuran sekolah seperti program awal remaja, edaran brosur serta infografik.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN BARU BIAN [SELANGAU]

TARIKH : 11 OKTOBER 2021 (ISNIN)

SOALAN

TUAN BARU BIAN minta **MENTERI KANAN PENDIDIKAN** menyatakan berkenaan sekolah daif di Sarawak, apakah status kerja-kerja membaik pulih sekolah tersebut yang dibiayai dengan peruntukan sebanyak RM1 bilion daripada duit pembayaran pinjaman oleh Kerajaan Negeri Sarawak kepada Kerajaan Persekutuan. Berapa buah sekolah daif lagi di Sarawak yang tidak dimasukkan di dalam kerja-kerja pembaikan tersebut.

JAWAPAN

Tuan Yang di-Pertua,

Pelaksanaan projek naik taraf dan pembangunan semula sekolah yang mempunyai bangunan daif di negeri Sarawak yang dibiayai melalui peruntukan RM1 bilion merupakan kontra bayaran balik pinjaman mengikut mekanisme khusus yang telah dipersetujui secara bersama oleh Kementerian Pendidikan Malaysia (KPM) dan Kerajaan Negeri Sarawak. Sehingga Julai 2020, sejumlah RM700 juta pinjaman telah dibayar balik oleh Kerajaan Negeri Sarawak.

Pelaksanaan projek baik pulih bangunan daif ini merangkumi pelbagai skop seperti pembinaan bilik darjah, blok pentadbiran, asrama, kuarters, dewan makan, pusat sumber, bilik sains, tandas dan kemudahan yang lain. Secara keseluruhannya, projek baik pulih bangunan daif di sekolah dengan dana RM1 bilion ini dilaksanakan melalui 3 fasa.

1. Fasa 1 melibatkan 41 buah sekolah dengan kos projek berjumlah RM350 juta;
2. Fasa 2 melibatkan 52 buah sekolah dengan kos projek berjumlah RM350 juta; dan
3. Fasa 3 telah dimuktamadkan senarai dan skop projek oleh KPM bersama dengan Kerajaan Negeri Sarawak melibatkan 54 buah sekolah dengan kos projek sebanyak RM300 juta.

Sehingga 26 Ogos 2021, kerajaan telah meluluskan 147 projek bagi ketiga-tiga fasa dengan kos berjumlah RM1 bilion. Bagi status pelaksanaan projek Fasa 1, sebanyak 2 projek telah siap, 34 projek berada di fasa pembinaan dan 5 projek lagi berada di fasa prabina, iaitu dalam proses pengeluaran Surat Setuju Terima (SST).

Bagi status pelaksanaan projek Fasa 2 pula yang melibatkan 52 projek, 6 projek berada dalam fasa pembinaan dan 46 projek berada dalam fasa pra bina.

Manakala, bagi pelaksanaan projek di Fasa 3 pula sebanyak 54 projek telah diluluskan pada 3 Jun 2021 dan kesemua projek ini berada dalam fasa pra bina.

Sehingga 30 September 2021, jumlah peruntukan yang telah dibelanjakan bagi naik taraf dan pembangunan semula bangunan daif di sekolah di Negeri Sarawak menggunakan peruntukan di bawah RM1 bilion adalah berjumlah RM74.04 juta.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. TUAN CHANG LIH KANG
[TANJONG MALIM]
TARIKH : 11 OKTOBER 2021 (ISNIN)

SOALAN

Tuan Chang Lih Kang [Tanjong Malim] minta **MENTERI KEWANGAN** menyatakan jumlah cukai CITA, PITA dan cukai individu yang telah dikutip dari Januari 2021 sehingga kini.

JAWAPAN

Tuan Yang Di-Pertua,

1. Untuk makluman Ahli Yang Berhormat, bagi tempoh separuh pertama tahun 2021, jumlah kutipan cukai pendapatan yang merangkumi terutamanya dari syarikat, individu dan petroleum adalah sebanyak 54.4 bilion ringgit. Ini merupakan peningkatan sebanyak 24.2% berbanding tempoh yang sama pada tahun yang lepas.

2. Namun, angka kutipan cukai berdasarkan komponen cukai berkenaan hanya dapat dikongsi setelah maklumat kutipan cukai tersebut diselaras dan dibentang dalam Penyata Kewangan Kerajaan Persekutuan 2021 di Parlimen pada tahun hadapan kelak.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 11 OKTOBER 2021 (ISNIN)

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI PERTANIAN DAN INDUSTRI MAKANAN** menyatakan langkah yang telah dilaksana dan perancangan masa hadapan oleh MAFI bagi memastikan kelestarian rantai bekalan makanan terjamin dan tidak terputus.

JAWAPAN:

Tuan Yang Di Pertua,

Untuk makluman Ahli Yang Berhormat, antara langkah-langkah yang telah dilaksanakan oleh Kementerian Pertanian dan Industri Makanan (MAFI) bagi memastikan rantai bekalan makanan terjamin adalah seperti berikut:

- i. merancang aktiviti pengeluaran makanan dengan pemberian subsidi dan insentif input tanaman seperti benih, baja dan racun khususnya untuk tanaman utama seperti padi;
- ii. meningkatkan keberkesanan pengeluaran dengan menambahbaik infrastruktur dan kemudahan seperti jalan dan fasiliti ladang, pengaliran dan saliran kawasan sawah padi serta kompleks dan jeti pendaratan ikan;
- iii. meningkatkan kecekapan rantai bekalan melalui pusat pengumpulan, penyimpanan, pemprosesan, pengedaran dan pemasaran serta kemudahan logistik dan pengangkutan;
- iv. memperluas akses pasaran petani melalui outlet pemasaran seperti pasar tani, pasar nelayan, Agrobazaar dan MyFarmOutlet serta menggalakkan penyertaan usahawan dalam platform e-dagang seperti Agrobazaar Online, NEKMATBIZ dan platform kerjasama strategik dengan pihak swasta seperti Lazada dan Shoppe; dan
- v. menyediakan bantuan dan sokongan kepada pengeluar makanan seperti geran dan pinjaman bagi meningkatkan pengeluaran melalui mekanisasi dan automasi. Dalam hal ini, Skim Pembiayaan Mikro Kredit dengan kemudahan pembiayaan sehingga maksima RM50,000 untuk tempoh sehingga 5 tahun dengan kadar faedah 3.5% setahun telah ditawarkan oleh Agrobank di bawah Pelan Jana Semula Ekonomi Negara (PENJANA).

Sehubungan itu, perancangan masa hadapan oleh MAFI bagi memastikan kelestarian rantai bekalan makanan terus terjamin adalah seperti berikut:

- i. mendukung pemodenan dan digitalisasi rantai nilai agromakanan dengan menerapkan elemen IR4.0 seperti *internet of things* (IoT), *big data* dan *artificial intelligence* (AI);
- ii. menggalakkan penyertaan swasta dalam sektor agromakanan dengan memperluas skop insentif pelaburan seperti industri benih dan perikanan laut dalam;
- iii. membangunkan lebih ramai tenaga kerja mahir dan bakat untuk memenuhi keperluan industri;
- iv. meningkatkan amalan pertanian baik dan mengurangkan kehilangan pasca tuai serta pembaziran makanan di sepanjang rantai nilai dengan meningkatkan kecekapan penggunaan sumber; dan
- v. memperkemas dan memperkukuh tadbir urus industri agromakanan termasuk aspek guna tanah, kewangan dan ekosistem perniagaan.

Perancangan di atas akan direalisasikan melalui program dan projek dalam tempoh pelaksanaan Rancangan Malaysia Kedua Belas (RMKe-12) 2021-2025 dan Dasar Agromakanan Negara 2021-2030 (DAN 2.0).

Di samping itu, Kerajaan juga telah menubuhkan Jawatankuasa Kabinet Mengenai Dasar Sekuriti Makanan Negara (FSCC) yang dipengerusikan oleh YAB Perdana Menteri untuk merangka dasar sekuriti makanan yang holistik. Menerusi platform ini, satu pelan tindakan khusus bagi meningkatkan kemampanan sistem makanan dan rantai bekalan makanan iaitu Pelan Tindakan Dasar Sekuriti Makanan Negara (Pelan Tindakan DSMN) 2021-2025 telah dibangunkan dan akan dilaksanakan secara kerjasama dengan agensi dan kementerian lain. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 11 OKTOBER 2021 (ISNIN)

SOALAN:

minta **MENTERI PENGAJIAN TINGGI** menyatakan apakah langkah untuk memperbaiki SOP bagi KPT membendung dan mengelakkan kes gangguan seksual di institusi pendidikan di bawah KPT.

JAWAPAN

Tuan Yang di-Pertua,

Dalam isu yang membabitkan gangguan seksual di Institusi Pendidikan, Kementerian dan IPT sama sekali tidak akan bertoleransi dimana tindakan tanpa '*fear or favour*' dan kerjasama sepenuhnya akan diberikan kepada pihak berkuasa dalam menyiasat insiden tersebut agar pelaku dapat dibawa ke muka pengadilan.

Sebagai langkah kawalan dan pencegahan, sekiranya pelaku adalah pelajar IPT, Seksyen 15D, Akta Universiti dan Kolej Universiti 1971 (Akta 30) atau AUKU akan dirujuk. Seksyen 15D ini memperuntukkan bahawa sekiranya seorang pelajar dituduh dengan kesalahan boleh daftar, maka dia boleh, mengikut budi bicara Naib Canselor digantung daripada menjadi seorang pelajar, dilarang berada dalam atau memasuki kampus selagi prosiding belum selesai, serta boleh dikenakan tindakan tatatertib. Sekiranya kes gangguan seksual ini melibatkan kakitangan IPTA pula,

tindakan tatatertib boleh dikenakan mengikut Peraturan 3(2)(d), Jadual Kedua, Akta Badan-badan Berkanun (Tatatertib dan Surcaj) 2000 (Akta 605). Peraturan ini antara lain menyebut bahawa seseorang pegawai tidak boleh berkelakuan dengan sedemikian cara sehingga memburukkan atau mencemarkan nama badan berkanun.

Selain itu, Kementerian melalui Jabatan Pendidikan Politeknik dan Kolej Komuniti (JPPKK) terus melaksanakan pelbagai inisiatif bagi membendung dan mencegah kes gangguan seksual termasuklah:

- (a) Melaksanakan program kesedaran dan pencegahan melalui modul Cakna Diri kepada pelajar dengan kolaborasi bersama agensi yang berkaitan seperti Lembaga Penduduk dan Pembangunan Keluarga Negara dan NGO;
- (b) Menggunapakai Garis Panduan Pengaduan Kes Gangguan Seksual Di Institusi untuk pelajar atau staf untuk membuat aduan;
- (c) Sesi taklimat berkenaan sahsiah dan disiplin pelajar dengan menerapkan elemen melibatkan isu gangguan seksual, tindakan dan hukuman; dan
- (d) Memperkasa peranan Majlis Perwakilan Pelajar dan Jawatankuasa Pelajar Kolej Kediaman sebagai penghubung pelajar dengan pengurusan institusi berkaitan masalah sosial

Dalam perkara ini, pihak Kementerian, institusi dan warga IPT perlu sama-sama memainkan peranan dalam mempromosi persekitaran IPT yang bebas daripada segala bentuk ancaman termasuk gangguan seksual bagi memastikan keselamatan dan kesejahteraan warga IPT secara keseluruhan. Sekian, terima kasih.

**]PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 11 OKTOBER 2021 (ISNIN)

SOALAN

PUAN TEO NIE CHING minta **MENTERI PENDIDIKAN** menyatakan bilangan guru sementara yang telah diupah melalui MySTEP dan jumlah guru sementara yang telah ditempatkan di SK, SJKC, SJKT, SMK dan lain-lain.

JAWAPAN

Tuan Yang di-Pertua,

Kerajaan Di Bawah Inisiatif Short-Term Employment Program Tahun 2021, telah mengumumkan pelaksanaan inisiatif MySTEP sebagai langkah jangka pendek menangani isu pengangguran, membantu meningkatkan peluang pekerjaan dan pendapatan kepada rakyat dan seterusnya membantu Kerajaan mempercepatkan pemulihan ekonomi negara.

Pelantikan perkhidmatan Personel MySTEP di sekolah-sekolah bertujuan untuk menampung kekosongan guru dalam jangka masa pendek di sekolah atas faktor-faktor seperti guru cuti bersalin, cuti menjaga anak dan berkursus jangka panjang.

Sehingga 28 September 2021, seramai 4,608 orang telah dilantik melalui perolehan perkhidmatan Personel MySTEP yang ditempatkan di sekolah-sekolah seperti berikut:

- i. Sekolah Kebangsaan seramai 2,115 orang;
- ii. Sekolah Menengah Kebangsaan seramai 1,952 orang;
- iii. Sekolah Jenis Kebangsaan Cina seramai 374 orang;
- iv. Sekolah Jenis Kebangsaan Tamil seramai 78 orang;
- v. Sekolah Menengah Kebangsaan Agama seramai 63 orang;
- vi. Sekolah Rendah Agama seramai 16 orang; dan
- vii. Sekolah Agama Bantuan Kerajaan seramai 10 orang.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. TUAN LIM GUAN ENG [BAGAN]
TARIKH : 11 OKTOBER 2021 (ISNIN)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan impak kerugian ekonomi kepada negara kesan daripada pandemik COVID-19. Adakah sasaran 3.5% kadar pengangguran, 5.4% defisit Bajet, pertumbuhan GDP 7.5%, hutang dan liabiliti Kerajaan bawah RM1.25 trilion akan dicapai.

JAWAPAN

Tuan Yang di-Pertua,

1. Kemelesetan ekonomi dan perdagangan dunia pada tahun 2020 berikutan penularan wabak COVID-19 merupakan krisis yang terburuk sejak era, dengan izin, *the Great Depression* pada tahun 1930an. Sebagai sebuah ekonomi terbuka, ekonomi Malaysia turut terjejas dengan Keluaran Dalam Negeri Kasar (atau KDNK) benar menguncup sebanyak 5.6 peratus pada tahun 2020 disebabkan oleh langkah pembendungan yang ketat bagi mengawal pandemik COVID-19.

2. Berikutan pelbagai inisiatif bagi memulihkan ekonomi yang terjejas akibat pandemik COVID-19 di samping melindungi nyawa dan kehidupan rakyat, trend pemulihan ekonomi telah dapat dilihat di mana ekonomi negara telah berkembang sebanyak 7.1 peratus pada separuh pertama tahun 2021 berbanding penguncupan sebanyak 8.4 peratus pada tempoh yang sama tahun 2020. Walau bagaimanapun, pelaksanaan semula langkah pembendungan pandemik yang lebih ketat mulai Mei 2021 susulan ancaman varian baharu COVID-19 telah menjejaskan momentum pertumbuhan ekonomi pada tahun 2021. Justeru, unjuran pertumbuhan ekonomi tahun 2021 telah disemak semula pada bulan Ogos 2021 kepada antara 3 hingga 4 peratus, iaitu lebih rendah berbanding anggaran awal pada bulan Mac 2021 antara 6 hingga 7.5 peratus.

3. Pasaran buruh juga masih belum stabil sepenuhnya. Walau bagaimanapun, kadar pengangguran telah menyederhana kepada 4.8 peratus pada Julai 2021 atau 778,200 orang berbanding 5.3 peratus atau 826,100 orang pada Mei 2020, iaitu kadar tertinggi yang pernah dicatatkan sejak 1990. Di samping itu, pelaksanaan Pelan Pemulihan Nasional (atau PPN) secara berfasa dijangka dapat mengukuhkan kedudukan ekonomi negara dan terus mengurangkan kadar pengangguran.

4. Pasaran buruh dijangka akan pulih semula pada tahun hadapan dengan andaian pembukaan semula sektor ekonomi dan sosial pada suku keempat tahun ini berikutan kemajuan dan keberkesanan pelaksanaan program imunisasi COVID-19 yang memberangsangkan, serta penerusan pelaksanaan program penstabilan pekerjaan seperti program subsidi upah, insentif pengambilan pekerja serta peningkatan kemahiran dan latihan semula pekerja. Oleh itu, kadar pengangguran dijangka terus berkurang bagi keseluruhan 2021 dan ekonomi dijangka kembali mencatat guna tenaga penuh pada 2022.

Tuan Yang di-Pertua,

5. Dalam Belanjawan 2021, defisit fiskal tahun 2021 telah diunjurkan sebanyak 5.4 peratus berbanding KDNK berdasarkan jangkaan awal ekonomi akan berkembang pada kadar 6.5 hingga 7.5 peratus. Walau bagaimanapun, bagi membendung gelombang ketiga penularan COVID-19, Kerajaan telah melaksanakan semula Perintah Kawalan Pergerakan (atau PKP). Pelaksanaan PKP bukan sahaja memberi kesan kepada kehidupan rakyat, malah dijangka turut mempengaruhi pertumbuhan ekonomi dan kutipan hasil Kerajaan.

6. Kerajaan telah mengumumkan empat pakej bantuan tambahan tahun ini, iaitu PERMAI, PEMERKASA, PEMERKASA Tambahan dan PEMULIH bernilai RM225 bilion dengan suntikan fiskal baharu yang dianggarkan berjumlah RM25 bilion, bagi terus meningkatkan kapasiti kesihatan awam, memelihara kebajikan rakyat dan kelangsungan perniagaan. Justeru, paras defisit fiskal 2021 dijangka akan meningkat kepada sekitar 6.5 hingga 7 peratus daripada KDNK.

7. Susulan daripada itu, sehingga akhir Ogos 2021, hutang keseluruhan Kerajaan Persekutuan mencatat 965.3 bilion ringgit atau 63.3 peratus berbanding KDNK. Daripada jumlah ini, hutang statutori yang merangkumi instrumen Sekuriti Kerajaan Malaysia (atau MGS), Terbitan Pelaburan Kerajaan Malaysia (atau MGII) dan Bil Perbendaharaan Islam Malaysia (atau MITB) mencatat 59.2 peratus berbanding KDNK, iaitu masih di bawah had statutori 60 peratus.

8. Selain daripada hutang Kerajaan Persekutuan, Kerajaan juga menanggung komitmen liabiliti lain, seperti komitmen jaminan hutang syarikat berkaitan Kerajaan yang diberi peruntukan untuk pelaksanaan pelbagai projek infrastruktur dan utiliti awam, hutang prinsipal syarikat 1Malaysia Development Berhad (atau 1MDB) serta liabiliti kewangan lain yang meliputi projek kerjasama awam swasta (atau PPP) dan projek di bawah inisiatif pembiayaan swasta (atau PFI) dan PBLT Sdn. Bhd. Secara keseluruhannya, kedudukan pendedahan hutang dan liabiliti Kerajaan Persekutuan pada akhir Jun 2021 dianggarkan berjumlah 1,333.3 bilion ringgit atau 87.5 peratus berbanding KDNK.

Tuan Yang di-Pertua,

9. Bagi mengurangkan impak pengurangan hasil dan keperluan perbelanjaan tambahan, Kerajaan akan melaksanakan langkah rasionalisasi perbelanjaan dan mengenalpasti sumber hasil tambahan dalam ekosistem fiskal Kerajaan. Pada masa ini, keutamaan Kerajaan adalah melindungi rakyat daripada ancaman COVID-19 selain memastikan prospek pertumbuhan ekonomi kekal kukuh dalam jangka sederhana dan panjang, disokong oleh PPN serta pengurusan kewangan yang berhemat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : Y.B. TUAN LIM GUAN ENG [BAGAN]
TARIKH : 11 OKTOBER 2021 (ISNIN)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan kedudukan kewangan syarikat penerbangan tempatan seperti MAS, Air Asia dan Firefly ekoran PKP dan penutupan ekonomi yang dilaksanakan serta cadangan menjual Lapangan Terbang Subang. Nyatakan bantuan Kerajaan dan bilangan staf yang diberhentikan atau menerima pemotongan gaji.

JAWAPAN

Tuan Yang di-Pertua,

1. Sepertimana yang ahli Yang Berhormat sedia maklum, dalam mengawal penularan wabak COVID-19, Kerajaan telah melaksanakan Perintah Kawalan Pergerakan dan Pelan Pemulihan Negara. Oleh itu, kedudukan kewangan syarikat penerbangan tempatan terjejas berikutan penutupan sempadan, serta larangan rentas negeri. Ini telah mengekang keupayaan mereka untuk beroperasi seperti biasa.
2. Untuk makluman Ahli Yang Berhormat, Malaysia Airlines Berhad (MAB) dan FireFly Sdn Bhd (FireFly) merupakan syarikat milik penuh Malaysia Aviation Group Berhad (MAGB). Sehingga bulan Jun 2021, MAGB telah mengalami penurunan pendapatan sebanyak 69 peratus di peringkat kumpulan, berbanding tempoh yang sama pada tahun 2019.
3. Berhubungan dengan isu pekerja, setakat ini MAGB hanya melaksanakan pemberhentian awal pekerja kontrak berusia 60 tahun ke atas, dan melibatkan 88 orang. Dari segi pemotongan gaji pula, hanya pekerja yang berpendapatan tinggi sahaja yang terkesan, dan ini merangkumi 15 peratus dari jumlah pekerja MAGB.
4. Bagi AirAsia Group Berhad (AirAsia) pula, ia merupakan sebuah syarikat swasta yang tersenarai di Bursa Malaysia, dan bukan syarikat milik Menteri Kewangan Diperbadankan.
5. Oleh itu, soalan berkaitan AirAsia adalah lebih wajar dirujuk dan dijawab oleh Kementerian Pengangkutan (MOT) kerana industri penerbangan awam dikawal selia menerusi Suruhanjaya Penerbangan Malaysia (MAVCOM) selaku Kementerian Pengawal.

Tuan Yang di-Pertua,

6. Dari segi bantuan kepada sektor penerbangan awam, mengambil kira kesan pandemik COVID-19 terhadap ekonomi secara menyeluruh,

Kerajaan berpandangan bahawa pemberian bantuan wajar dilaksanakan secara meluas dan tidak terhad kepada syarikat penerbangan sahaja.

7. Bantuan ini telah dilaksanakan oleh Kerajaan melalui lapan pakej bantuan dan rangsangan ekonomi berjumlah 530 bilion semenjak wabak COVID-19 melanda negara bagi membantu pekerja dan rakyat yang terjejas, serta perniagaan yang mengalami masalah aliran tunai termasuklah syarikat penerbangan tempatan.

8. Seperti yang pernah saya nyatakan dalam Dewan yang mulia ini, setakat ini, bantuan tunai secara langsung kepada rakyat adalah berjumlah 33 bilion ringgit, manakala bagi perniagaan pula, jumlah adalah hampir 30 bilion ringgit.

9. Ini adalah sebagai tambahan kepada langkah yang telah dilaksanakan termasuklah moratorium bayaran balik pinjaman perniagaan, skim jaminan pembiayaan perniagaan, skim kredit mikro, dana pembiayaan PKS dan banyak lagi.

10. Tambahan lagi, di peringkat pemegang saham pula, Khazanah Nasional Berhad (KNB) selaku pemilik majoriti MAGB iaitu syarikat induk kepada MAB dan Firefly sedang terus berusaha dalam memulihkan kedudukan kewangan syarikat penerbangan tersebut.

Tuan Yang di-Pertua,

11. Buat masa ini, selaras dengan Kenyataan Media yang saya terbitkan pada 26 Jun 2021 yang lalu, Kerajaan tiada perancangan untuk menjual mana-mana hartanah lapangan terbang di Malaysia. Ini termasuklah Lapangan Terbang Sultan Abdul Aziz Shah (LTSAAS), atau yang lebih dikenali sebagai Lapangan Terbang Subang.

Sekian, terima kasih.